


Ndondehamba



The New Testament in the Ndonde Hamba language of Tanzania:
Ndondehamba

Ndondehamba

The New Testament in the Ndonde Hamba language of Tanzania: Ndondehamba

copyright © 2024 The Word for the World International

Language: Ndondehamba (Ndonde Hamba)

Contributor: The Word for the World International

The New Testament in Ndondehamba Language.

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-17

PDF generated using Haiola and XeLaTeX on 17 May 2025 from source files dated 17 May 2025

96147360-c098-5115-913c-4d3476c71a09

Contents

Amatayo	1
-------------------	---

Ngani jammbone chijijaandikwe na Amatayo Nnongolelo

Gagabhile mu chitabu

Nnongolelo gwa Ngani Jammbone handa chijijaandikwe na Amatayo nga chimo nkati ja hitabu ncheche mu lilagano liyono hiikongolela umomi gwa Ayesu Kilisito. Kila chimo chabhe chikemwa “Injili,” yakubhee maana gakwe nga “Ngani Jammbone,” Hitabu heyo hikajandikwa na Amatayo, Amaluko, Aluka, na Ayohana baada ja kujomoka Ayesu.

Akaachomi bhajingi ngaimanyanga lii Injili jikajandikwa na Amatayo, nambo komboleka jikibha muuda teno kubhandikila na yaaka 60 pabhakabhelekwa Akilisito. Kabhele, ngamanyika mahali pajikajaandikwa, nambo bhandu bhajingi bhaganikianga kubhee jikajandikwa konokwe chilambo cha Palesitina na hata mu chilambo cha ku Yelusalemu.

Bhabhakajandika chitabu chenjeni nga Amatayo, bhabhakibha atocha kodi kabula ja Ayesu kwaajopa bhabhee anapunji bhabhe. Lina lyengi lya Amatayo bhakemitwa Alawi. Amatayo bhakibha bhamo bha akaandundame komi na bhabhele na bhakajandika kwa akaachomi bha Bhayahudi. Jenjeni jikomboleka kubhonekana kwa kubhujila muno kupunda yaaka ya 60 ya Majaandiko ga lolo.

Amatayo bhakapala kulangia kubhehe Ayesu nga Amasiha, Akomboi bhabhaagulikwe na Annoongo, yakubhee bhakalondolekwa nnani jabhe. Amatayo kabhele bhakajandika ngani hijingi nnani ja Umwenye gwa Annoongo. Bhayahudi bhakalolekeanga Amasiha bhabhee Amwenye bha kutandaha chilambo. Amatayo bhakakongolela maha kwa kugalambua maganikilo gabhenji kwa kongolela umwenye gwa Mboomo ja Annoongo.

Ngani Jammbone nga chammbone kujemeka mu Lilagano liyono ligongo chitendakubhujila hikubho hiiibhile mu lilagano lya lolo. Chitendakulondanika malagano gabhele. Akaachomi kabhele bhakongolile kubhee labuda Amatayo bhakibha bhatendita kujiiga namuna ja kujandika hitabu ya Amusa, yakubhee nga hitabu nhano ya kujemeka ya Lilagano lya lolo. Injili ja Ayesu palitombi 5-7 gakomboleka kulinganikwa na Annoongo kwaapekeke Amusa Malagilo. Ngombokelo ja Tolati 19:3-23:33

Gagabhile Mu chitabu

Amatayo bhajijemeka Ngani Jammbone kwa kongolela nnani ja kubhelekwa kwa Ayesu Kilisito na kujemeka kwa lihengo lyabhe, mu chula ja 1-4.

Pabhakajomola genago Amatayo bhakongolela lihengo lya Ayesu na majigano gabhe, mu chula ja 5-25.

Chehemu ja kujomolekeka ja Ngani Jammbone handa chiikajandikwa na Amatayo jilangia chikubho chikolongwa muno cha kujomoka na kuyoka kwabhe Ayesu, mu chula 26-28.

*Chilagwa cha Ayesu Kilisto
Aluka 3:23-38*

¹ Gangani nga mahina ga chilagwa cha Ayesu Kilisto, mwana bha Adaudi na mwana bha Aaibulahimu,

² Aaibulahimu bhakaabheleka Aisaka, na Aisaka bhakaabheleka Ayakobo, na Ayakobo bhakaabheleka Ayuda na akaanung'una bhabhenji,

³ Ayuda bhakaabheleka Apelesi na Azela yakubhehe anyongo bhabhenji bhakibha Atamali, na Apelesi bhakaabheleka Ahesilomu, na Ahesiloni bhakaabheleka Aalamu.

⁴ Aalamu bhakaabheleka Aaminadabu, na Aaminadabu bhakaabheleka Anashoni, na Anashoni bhakaabheleka Asalumoni,

⁵ Asalumoni bhakaabheleka Aboazi, na anyongo bhabhe Aboazi bhakibha Alahabu, Aboazi na Alutu bhakiabhanga akaabhelei bha Aobedi, na Aobedi bhakaabheleka Ayese,

⁶ Ayese bhakaabheleka amwana yakubhehe bhakibha Amwenye Adaudi. Adaudi bhakaabheleka Asolomoni, yakubhehe anyongo bhabhe nga bhenibhala bhabhakibha hanu bha Aulia.

⁷ Asolomoni bhakaabheleka Alehoboamu, na Alehoboamu bhakaabheleka Aabiya, na Aabiya bhakaabheleka Aasa,

⁸ Aasa bhakaabheleka Ayehoshafati, na Ayehoshafati bhakaabheleka Ayolamu, na Ayolamu bhakaabheleka Auzia,

⁹ Auzia bhakaabheleka Ayotamu, na Ayotamu bhakaabheleka Aahazi, na Aahazi bhakaabheleka Ahezekia,

¹⁰ Ahezekia bhakaabheleka Amanase, na Amanase bhakaabheleka Aamoni, na Aamoni bhakaabheleka Ayosia,

¹¹ Ayosia bhakaabheleka Ayekonia na akaanung'una bhabhenji. Gono gukibha muda Bhayahudi chibhakakumukanga kuhamilanga ku Babeli.

¹² Bhayahudi pabhakibhanga kuubhanda ku Babeli, Ayekonia bhakaabheleka amwana Asheliteli, na Asheliteli bhakaabheleka Azelubabeli,

¹³ Azelubabeli bhakaabheleka Abiudi, na Abiudi bhakaabheleka Aeliakimu, na Aeliakimu bhakaabheleka Aazoli,

¹⁴ Aazoli bhakaabheleka Azadoki, na Azadoki bhakaabheleka Aakimu, na Aakimu bhakaabheleka Aeliudi,

¹⁵ Aeliudi bhakaabheleka Aeleezali, na Aeleezali bhakaabheleka Amatani, na Amatani bhakaabheleka Ayakobo,

¹⁶ na jonojwe Ayakobo akaabheleka Ayusufu, na habha Ayusufu akibha hangwana habhe Amalia, na habha Amalia nga jwakaabheleka Ayesu, bhakemitwa Kilisto.

¹⁷ Bahi, penapo kukabhehe na ibhelei komi na ncheche kubhoka Aaibulahimu mpaka Adaudi, ibhelei komi na ncheche kubhoka Adaudi mpaka Bhayahudi chibhakatolekwa akaabhanda ku Babeli, na ibhelehi komi na ncheche kubhoka kutolekwa akaabhanda mpaka muda gwa kubhelekwa kwa Kilisto.

Kubhelekwa kwa Ayesu Kilisto

Aluka 2:1-7

¹⁸ Bahi, kubhelekwa kwa Ayesu Kilisto kukabhehe henela, Amalia anyongo bhabhe Ayesu bhakibha bhalombwite na Ayusufu. Nambo bhakibha tangu bhakakongana na kutama pamo handa analome na haikege, Amalia bhakabhonokana bhabhi na chitumbo kwa uwecho gwa Mboomo ja Annoongo.

¹⁹ Kwa kubhehe Ayusufu nga hanalome bhabhakibha bhaalombite Amalia bhabhakibha amundu bha majendelo gammbone, bhangapala kwaalekela honi palundwaje, henela bhakapala kwaaleka kwa kuchiiya.

²⁰ Pabhakibha tangu bhatenda kuganikia ngani hejo, antumichi bha kumahunde bha Hangwana bhakaabhokela mu agamii, na kwaalobholela, "Ayusufu, amwana bha Adaudi, nkotokujogopa kwaapetula Amalia bhabhe hana bhinu, maana gakwe bhatekola chitumbo kwa uwecho ga Mboomo Ja Annoongo.

²¹ Na bhenabho bhapakuchijogola mwana mwanalome, mpakunkema lihina lyabhe Ayesu, maana gakwe bhenabho nga bhapakwabho hanga bhandu bhabhe mu mabhou gabhenji."

²² Bahi, genego goha gapitila ili likweele lyela lilobhe lya Hangwana lilikalongelwa kwa ndela ja alondohi kubhee,

²³ "Mwaali bhangaamanya analome bhapakola chitumbo na bhapakubheleka mwana mwanalome, na bhenabho bhandu bhapakwaakema liina Aemanueli" Maana gakwe, "Annoongo pamo na tweenga"

²⁴ Henela, Ayusufu bhakajimuka kubhoka mu lugono na bhakatenda handa antumichi bha kunani kulihunde bha Annoongo chibhakaalobholela, bhakaapetula Amalia kubhee hana bhabhe.

²⁵ Nambo Achupu bhangatyanga nabho Amalia mpaka chibhakachijogola mwana mwanalome, na bhenabho Achupu bhakaapeka amwana bhenabho lihina lyakwe Ayesu.

2

Akaageni kubhoka Kuulabho

¹ Ayesu bhakabhelekwa ku chilambo cha ku Betelehemu, ku nkoa gwa ku Yudea, gono muda Ahelode bhakibha Amwenye. Mala tu baada ja kubhelekwa kwabhe, bhandu bha kumanyanga ngani ja ndondwa kubhoka kuulabho bhakahikanga ku Yelusalemu,

² Bhakakonyanga, "Bholi, habhi koji mwana jwaabhelikwe, Amwenye bha Bhayahudi? Tujilolite ndondwa jabhe kubhoka kuulabho, na tweenga tuhikite pambani kwaalum-balila."

³ Amwenye Ahelode pabhakajoha genego, bhakahechuka, bhenabho pamo na bhandu bhoja bhabhatamanga ku Yelusalemu.

⁴ Amwenye Ahelode bhakaakemanga pamo akaakolo bha akaakung'i na bhabhajigana bhandu bha malagilo ga Amusa, bhakakonyanga, "Akilisito bhabhelikwe koji?"

⁵ Na bhenabho bhakaajangula, "Mu chilambo cha ku Betelehemu, ja ku Yudea, kwa kubhee henela nga chiikajandikwa na alondohi bha Annoongo kubhee,

⁶ Mwe chilambo cha ku Betelehemu

Mwenga ngabha mwachoko choko pakati ya hilambo hikolongwa ya ku Yudea, ligongo kwinu bhakupitila chilongola bhapakwalongolea bhandu bhangu bha ku Isilaeli.’”

⁷ Penapo Ahelode bhakaakemanga bhenibhala bhakumanyanga ngani ja ndondwa kwa kuchihya na kwaakonyanga, muda chibhakajibhona ndondwa.

⁸ Penapo bhakaalagikia bhajendange ku Betelehemu bhabhi kwaalobholelana, “Nnyahulange nkaalolekeange maha ngani ya jono mwana. Na handa mumpatite, nnetelange ngani jabhe ili nanenga ngombole kujaula kwaachalila.”

⁹ Pabhakajomolanga kwaajohanikia Amwenye, bhenibhala bhakumanyanga ngani ja ndondwa bhakajaula, na jela ndondwa chibhakajilola kuulabho jikaalongolela, na jika-jema nnani ja penipala pabhahhile mwana.

¹⁰ Pabhakajilola jene ndondwa, bhakaachukilanga muno.

¹¹ Pabhajingilanga nkati ja jenijela nyuumba, bhakaabhona mwana pamo na Amalia anyongo bhabhe, bhakatindibhala majugwa, bhakanchalila. Ngapena bhakajogolanga mhiko jabhenji na kwaapekea ngwahupa ja bunyu, ubhani na mahuta ga bei ngolongwa gakemitwa manemane.

¹² Na Annoongo bhakaakanikihanga mu agamii bhakotokubhujanga kwa Ahelode, ila bhakabhujanga kwaachabhenji kupetela ndela jengi.

Kubhutukila ku Chilambo cha Misili

¹³ Akaageni pabhakajaulanga, antumichi bha kunani kulihunde bha Annoongo bhakaabhokela Ayusufu mu agamii, bhakaalobholela, “Nnyimuke! Mwapetule mwana bhinu pamo na anyongo bhabhe ntilie ku Misili. Nkatamange konokwe mpaka pambakunobholelana, maana Ahelode bhapala kunkoma habha mwana.”

¹⁴ Henela, Achupu bhakajimuka kubhoka mulugono, bhakaapetula mwana bhabhe na anyongo bhabhe kwa muda gwa kilo, na bhenangota bhakajaulanga kuchilambo cha Misili.

¹⁵ Bhakatama konokwe mpaka Ahelode pabhakajomoka. Ngani hejo jikatendeka ili lilobhe lya Hangwana kwa ndela ja akaalondohi likwele handa chibhalongile, “Ngankema mwana jwangu kubhoka kuchilambo cha Misili.”

Bhaana bhachoko bhatenda komekwa

¹⁶ Ahelode chibhakahimanya yakubhee bhenibhala bhandu bhakumanyanga ngani ja ndondwa bhakibha bhatekwaatempa, bhakatumbala muno. Akalagia bhaana bhoo bhanalome mu chilambo cha Betelehemu na kubhandikila na penapo bhaabhilinge na yaaka hibhele au pahi jabhe bhakomekwe. Akatenda henela kubhokana na muda chibhakagupata kuhimanya kubhoka kwa bhenibhala bhandu bhakumanyanga ndondwa.

¹⁷ Henela nga henela chigakweela malobhe gagalobhwilike kwa ndela ja akaalondohi Ayelemia kubhee,

¹⁸ “Amundu bhakajoahanika bhabhi kuguta konokwe kuchilambo cha Lama, nguto na majopelo gajingi. Alaheli bhatenda kuguta ligongo lya bhaana bhabhe, wala bhangapala amundu bhoo bhala bhabhapembelee bhakotoke kuguta, kwa kubhee bhana bhabhe bhoo bhatekujomoka.”

Kubhuja kubhoka kuchilambo cha Misili

¹⁹ Baada ja kujomoka Ahelode, antumichi bha kunani kulihunde bha Annoongo bhakaabhokela Ayusufu mu agamii konokwe kuchilambo cha Misili,

²⁰ bhakaalobholela, “Nnyimuke! Mwaatole mwana bhinu pamo na anyongo bhabhe, mmuje kabhele kuchilambo cha Isilaeli, kwa kubhee bhenibhala bhabhakapala kwaakoma mwana bhatekujomoka.”

²¹ Bahi, Achupu bhakajimuka, bhakampetula mwana bhabhe na anyongo bhabhe, na kubhujanga kuchilambo cha Isilaeli.

²² Nambo Achupu pabhakajoha yakubhee Aakelao mwana bhabhe Ahelode, bhatenda kutabhala badala ja atati bhabhe chilambo cha Yudea, bhakajogopa kujaula konokwe. Na bhenabho baada ja kwaakanikiha mu agamii, bhakajaula kuchilambo cha Galilaya,

²³ na bhenabho bhakajaula kutama mu chilambo chichikemitwa Nazaleti. Kwa ndela heje nga chilikakweela lilobhe lilikalobholekwa na akaalondohi, “Apakemwa Nnazaleti.”

¹ Pagakapeta machobha gajingi Ayohana ambatichaji bhakapitila, bhakajemeka kutan-gacha lilobhe lya Annoongo mu likonja lya kuchilambo cha Yudea bhakatangacha bhabhi kulobhola,

² “Mutendebhukange na kugalekanga mabhou ginunji, kwa kubhee Umwenye gwa Annoongo gutekubhandikila.”

³ Habha nga Ayohana nga bhenibhala yakubhee Alondohi Aisaya bhakalobhola nnani jabhe pabhakalobhola,

“Mundu bhatenda kema kubhoka kulikonja,
‘Nhalakihange ndela ligongo lya Hangwana,
nchibhekange maha kwaapokela Hangwana.’ ”

⁴ Ayohana bhakawala ngobho jijikatotwa kwa manjoja ga chinyama jwakemitwa ngamia, na bhakachitabha nkanda gwa limbendela mu chibhuno chabhe. Chakulya chabhe chikabhee mapalale na bhuchi.

⁵ Bahi, bhandu kubhoka mu chilambo cha Yelusalemu, na kubhoka kuchilambo cha Yudea, na hilambo yoha kubhandikila na loochi lwa Yoludani, bhakaajabhulila,

⁶ na bhhenabho bhakagalekanga mabhou gabhenji na kwabhujila Annoongo, na bhen-abho Ayohana hakabhabatichanga mu loochi lwa Yoludani.

⁷ Nambo Ayohana pabhakabhabhonanga Mafalisayo na Masadukayo bhajingi, bhab-hikuhikanga ligongo lya kubatichwa, akabhakonyanga, “Mwangota chibhelei cha lijoka, Nga bheneke bhannobholile mujibhutuke hukumulo ja Annoongo jijihika?

⁸ Ntendange kwa hikubho kulangia yakubhee ntekugalekanga mabhou ginu.

⁹ Nkotokuganikiha na kuchilobholelanga, mu mitima jinunji yakubhee, ‘Atati bhitu nga Aaibulahimu!’ Ndekunnobholelanga kweli, Annoongo bhakombola kugatendebhua maganga haga kubhee bhaana bha Abulahamu.

¹⁰ Bahi libhago libhekitwe maha mu mikega ja mikongo, henela kila nkongo gwangao-gola mbeju jammbone gupakuheketa na kugujeha pa mooto.

¹¹ Nenga ndenda kumbatichanga kwa machi na kulangia kubhee ntekugalekanga mab-hou ginu. Nambo bhabhapakuhika baada ya nenga bhatekubhee na machili kupunda nenga, na nenga ngakombola hata kuipetula hilatu yabhe. Bhenabho bhapakumbat-ichanga kwa mboomo ja Annoongo na kwa mooto.

¹² Bhenabho bhakamwile mmabhoko gabhe chipalo ligongo lya kupetela mapemba gabhe, na bhena bhapakupyagila lubhagala lwabhe lwa kupetela mapemba, bhapaku-umba na kubheka mapemba mu ngokwe, na mapoi bhagajochi kwa mooto gwan-gahimika.”

Kubatichwa kwa Ayesu

Amaluko 1:9-11; Aluka 3:21-22

¹³ Gono muda Ayesu bhakabhoka kuchilambo cha Galilaya na bhakahika mu loochi lwa Yoludani, ligongo lya kupala kubatichwa na Ayohana,

¹⁴ Nambo Ayohana bhakajiga kwaahibhila bhabhi kwaalobholela, “Mwenga nhika kwaachangu kupala nimbatichwa?” Nenga mbala kubatichwa na mwenga.

¹⁵ Nambo Ayesu bhakajangula, “Nneke tu nangocheni jibhee henela, maana nga chiji-palikwa kwa jenje ndela kutama nago genigala goha Annoongo chibhagapala.” Penapo Ayohana bhakakoonda.

¹⁶ Popopo Ayesu pabhakabatichwa, bhakabhoka mmachi, penapo kunani kulihunde kukajogoka, na bhena bhakajibhona Mboomo ja Annoongo chijitenda kutuluka kubhoka nnani handa nguunda na kutoola nnani jabhe.

¹⁷ Pangaganikia lilobhe kubhoka kunani kulihunde likajohanika libhi kulobhola, “Hojo nga mwana jwangu junampalite, ndekubhajilwa nabho.”

4

Kulengekwa kwa Ayesu

Amaluko 1:12-13; Aluka 4:1-13

¹ Ngapena Mboomo ja Annoongo bhakaalongolea Ayesu mpaka palulemba bhaleengekwe na lichenani bhaalenge Ayesu.

² Ayesu bhakatabha machobha makomi ncheche muhi na kilo pangali kulyehe choha chela, bhakajemeka kwaabhina njala.

³ Bahi, bhakupembelea bhakahikila na kwaalobholela, “Handa mwenga nga mwana bha Annoongo mugalobholele maganga haga gabhee nkate.”

⁴ Ayesu bhakaajangula, “Jijaandikwe, ‘Amundu ngatama kwa nkate tu, ila kwa malobhe galalobholekwa na Annoongo.’ ”

⁵ Ngapena bhakupembelea bhakaapetula Ayesu mpaka ku Chilambo cha ku Yelusalemu, Chilambo cha Annoongo, bhakaabheka nnani kundepela kunnala gwa Nyuumba ja Annoongo,

⁶ bhakaalobholela, “Handa mwe nga mwana bha Annoongo nchigwie pahi. Kwa kubhee jijaandikwe,

‘Annoongo bhapakwaatuma antumichi bhabhe ligongo lya mwenga, bhapakumpetula mmabhoko ga bhenaangota, nkoto kobhanduka paliganga.’ ”

⁷ Ayesu bhakaajangula, “Jijaandikwe kabhele, ‘Nkoto kwaalenga Hangwana, Annoongo bhinu.’ ”

⁸ Ngapena bhakupembelea bhakaatola Ayesu mpaka kunani kundepela kulitombi litan-damao na kwaalanga hilebhe yoha ya pachilambo na goha gakubhajila pamiho.

⁹ Bhakupembelea bhakaalobholela Ayesu, “Heye yoha imuilola mbakumpekeha handa mpakutindibhala majugwa na kunjilila nenga.”

¹⁰ Penapo Ayesu bhakaajangula, “Nnyabhule mwe bhakupembelea! Jijaandikwe, ‘Mpakwaachalila Hangwana Annoongo bhinu na kwaatumikila bhenabho jikajabhe.’ ”

¹¹ Bahi, bhakupembelea bhakaaleka Ayesu, bhatumichi bha kunani kulihunde bha Annoongo bhakahikanga, na kwaatumikila.

Ayesu bhatendakujemeka mahengo gabhe ku Galilaya

Amaluko 1:14-15; Aluka 4:14-15

¹² Ayesu pabhakajoha yakubhee Ayohana bhatabhwitwe kuligelecha bhakajaula kuchilambo cha Galilaya.

¹³ Akabhoka kuchilambo cha ku Nazaleti na kujaula kutama kuchilambo cha ku Kafalanaumu, chilambo chichibhile kubhandikila na bahali ja Genezaleti, mumpaka gwa chilambo cha ku Zabuloni na chilambo cha ku Nafutali, bhakatama konokwe.

¹⁴ Akatenda henela ili gakwele malobhe gabhakalobhola alondohi Aisaya, kubhehe,

¹⁵ “Chilambo cha ku Zabuloni na chilambo cha ku Nafutali,

mu ndela ja kujaula ku bahali, kuntundu ja loochi lwa Yoludani, na Galilaya kubhatamanga bhandu bhangha Bhayahudi!

¹⁶ Bhandu bhabhatamitinge mulubhendu bhaluweni lumuli lwene.

Na bhenaangota bhandu bhabhatamanga pakujogoa muno, nhana gutekwaamulikila!”

¹⁷ Kubhoka gono muda Ayesu bhakajemeka kutangacha bhabhi kulobhola, “Nnekange mabhohu ginu, kwa kubhee Umwenye gwa kulihunde gutekubhandikila!”

Ayesu bhatendakwakema akaakoka homba ncheche

Amaluko 1:16-20; Aluka 5:1-11

¹⁸ Ayesu pabhakibha bhatenda nngulugula ja litanda lya ku Galilaya, bhakaabhona akaanung’una bhabhele akaakoka, Asimoni jwakemitwa Apetulo, na Aandulea anung’una bhabhe. Bhabhikoka homba kwa hipelele mu litanda.

¹⁹ Ayesu bhakaalobholelana, “Ngagulange, na nenga mbakuntendanga mmangange bha kwaletanga bhandu kwa Annoongo.”

²⁰ Popopo bhakalekanga mapelele gabhenji na kwaakagula Ayesu.

²¹ Pabhakajenda nnoni kachoko, bhakaabhonanga akaanung’una bhangi bhabhele, Ayakobo na Ayohana, bhaana bha Azebedayo. Bhenabho bhakibhanga mu ntumbwi pamo na atati bhabhenji Azebedayo, bhabhikuhalakihanga mapelele gabhenji. Bahi, Ayesu bhakaakemanga,

²² na bhenaangota bhakagulekanga ntumbwi pamo na atati bhabhe, bhakaakagula Ayesu.

Ayesu bhatenda kwaajigana bhandu na kwalamihanga akaatamwa

Aluka 6:17-19

²³ Ayesu bhakajenda koha muchilambo cha ku Galilaya bhakaajigananga bhandu mu Nyuumba ya konganilanga Bhayahudi na kutangacha Ngani Jambbone nnani ja umwenye gwa Annoongo. Akaalamihanga bhandu itamwa yabhenji yoha hiikibha nnani jabhenji.

²⁴ Ngani jabhenji jikajohanikiha koha kuchilambo cha ku Silia. Akaatamwa bhoa bhabhabhilinge na itamwa ya kila namuna na bhenibhala bhabhalaganga, bhandu bhabhabhilinge na mahoka, akaatamwa chiinduindu na akanangwabha, bhakaapelekanga kwa Ayesu, na bhenabho bhakaalamihanga bhoa.

²⁵ Mabhoga makolongwa ga bhandu kubhoka kuchilambo cha ku Galilaya, kubhoka ku Dekapoli, ku chilambo cha ku Yelusalemu na kubhoka kuchilambo cha Yudea na kubhoka kuntundu ja loochi lwa Yoludani bhakakaagula.

5

Ayesu bhajigana na bhandu palitombi

¹ Ayesu pabhakagabhona malubhalo ga bhandu, bhakakweela nnani ja litombi bhakatama konokwe. Bhabhachijigana bhabhe bhakaajendela,

² na bhenabho bhakajemeka kwaajigananga,

Kuhangalala kwa kweli

Aluka 6:20-23

³ “Bhakupachukanga bhenibhala bhabhaalea Annoongo, kwa kubhee umwenye gwa Annoongo nga gwabhenji.

⁴ Bhakupachukanga bhenibhala bhabhaumalanga nangocheni kwa kubhee Annoongo bhakupwaapembelea.

⁵ Bhakupachukanga bhabhabhii bhakutonganika kwa kubhee bhakupwapekeanga chilambo chibhee chabhenji.

⁶ Bhakupachukanga bhabhapalanga muno kutenda gabhagapala Annoongo, ligongo Annoongo bhakupwajangatilanga kutenda henela.

⁷ Bhakupachukanga bhenibhala bhabhakolela kia bhangi, kwa kubhee Annoongo bhakupwaabhonela kia.

⁸ Bhakupachukanga bhabhabhilinge na ntima gwa kualala, kwa kubhee bhakupwaabhona Annoongo.

⁹ Bhakupachukanga bhenibhala bhabhakamuanga bhandu, kwa kubhee bhenabho bhakupemwa bhaana bha Annoongo.

¹⁰ Bhakupachukanga bhabhapotekwa ligongo lya kutenda gagapalikwa na Annoongo, kwa kubhee umwenye gwa kunani kulihunde nga gwabhenji.”

¹¹ “Ntekuchukanga mwangota handa bhandu bhakupuntukananga, kongo bhabhi kunnagianga na kumkopokeanga kila namuna ja ubhou ligongo lya nenga.

¹² Nhachukange na kuhangalala kwa kubhee ngwahupa jinunji nga ngolongwa kunani kulihunde. Henela nga chibhakaatendelanga akaalondoi bha Annoongo bhabhakibha tangu ja mwangota.”

Ngeleka na lumuli

Amaluko 9:50; Aluka 14:34-35

¹³ “Mwangota nga ngeleka pakati ja bhandu pachilambo. Nambo ngeleka handa jihobhite kunong’a kwabhe jipakunong’ea niki? Ngapalikwa kabhele, nambo kujijea panja na kulebhatikwa na bhandu.”

¹⁴ “Mwangota nga lumuli lwa chilambo. Mwangota nga handa nyumba jijichengikwe nnani ja litombi ngakomboleka kuchiiya.

¹⁵ Na bhandu ngajaakiha taa na kujibheka pachitombenga. Badala jabhe bhakalubheka lumuli kunani kundepela, na jenejo jikamulikila kwa bhandu bhoa mu nyumba jela.

¹⁶ Hela hela, lumuli gwinu gumulikile nnoongi ja bhandu, ili bhapate kugabhona mahengo ginu gammbone, bhaalumbalile Atati bhinu bhabhabhii kunani kulihunde.”

Ayesu bhatendakujigana bhandu malagilo

¹⁷ “Nkoto kuganikiha ndekuhika kubhoa malagilo ga Amusa gabhapatite kubhoka kwa Annoongo na majigano ga akaalondoi, ila ndekuhika kunnangianga genago malagilo nga ga kweli.

¹⁸ Ndendakunnobholelanga kweli, mpaka penapo lihunde na chilambo pachipakupeta, jaakwa hata chipande chichokochoko cha malagilo ga Amusa chichipakuhutwa mpaka goha gateendeke.

¹⁹ Bahi, amundu bhoa bhala bhangajeketela hata lilagilo limo lichoko, na kwaajigana bhangi bhatendange henela, bhenabho bhakupubhehe achoko muno mu umwenye gwa kunani kulihunde kwa Annoongo. Nambo bhenibhala bhabhapakujeketela malagilo ga Annoongo na kwaajigana bhajingi bhakupubhee umwenye mu umwenye gwa kunani kulihunde kwa Annoongo.”

²⁰ Ndenda kunnobholelanga kweli, handa ngatenda maha hikubho hiyaabhajila Annoongo handa chibhatendanga bhabhajiangananga malagilo ga Amusa na Mafalisayo, ng’o ngajingilanga mu umwenye gwa Annoongo.

Majigano nnani ja lilaka

Aluka 12:57-59

²¹ “Ntekujohanikia yakubhehe bhandu bha lolo pabhakalobholelwanga, ‘Nkotokoma!’ Bhoa bhala bhabhapakoma bhapakuhukumulwa.

²² Nambo nenga ndendakunnobholelanga, bhoabhala bhabhapakwaachimwa anung’una bhabhe bhapakuhukumulwa. Na bhoabhala bhabhapakwaabhelua anung’una jwabhe na kwabhona ngabha chilebhe bhapachitakiana kwa annyumbe. Na bhabhapakwaakema anung’una bhabhe, ‘Apumbavu,’ bhapalikwa kujingila mu lihembo lya moto gwangahimika machobha goha.

²³ Bahi, handa mpeleka mabhokeo ginu nnoongi ja Annoongo, ngapena mkombokela anung’una bhinu abhi na bulwa na mwenga, ²⁴ mmoe mbeeko jinu nnongi ja Annoongo, mmuje nkwelekane na anung’una bhinu, ngapena mmuje nnoongi ja Annoongo kubhoa mabhokeo ginu.”

²⁵ “Nkwelekane na apwati bhinu muda mmi nndela pamo na bhenabho kujaula kwa annyumbe. Apwati bhinu bhapakunpeleka kwa annyumbe, na bhenabho annyumbe bhapakunpeleka kwa linyemba, na mwenga mpakutabhikwa kuligelecha.

²⁶ Ndendakunnobholela kweli, mmokahopo monomwe mpaka nnyomole kulepa ulohi gwoha.”

Majigano nnani ja kuleka ngoongola

²⁷ Ayesu akapunda kulongela, “Ntekujohanikianga yakubhehe bhandu bhatekulobholelwa, ‘Nkotokutendanga ngoongola!’ ”

²⁸ Nambo nenga ndendakunnobholelanga, bhoabhala bhabhapa kunnola mwikege kwa kunnokolila, bahi bhatekutenda ngongola na bhenabho mwikege muntima gwabhe.

²⁹ Bahi, handa lio linu lya kunnelo handa lunyambwie kutenda mabhohu, mulibhoe na mulijee kutali. Mbaya muno kwaachinu kuchihobha chiungo chinu cha mmele gwinu, kuliko mmele gwinu goa kulekelekwa mu litanda lya mooto gwangahimika machobha goa.

³⁰ Handa lubhoko lwinu lwa kunnelo lunyambwie kutenda mabhohu, muluheketi na kulujee kutali. Mbaya kwaachinu kuhobha chiungo chimo cha mmele gwinu, kuliko mmele gwinu goa kujingila mu lihembo lyangapela.

Ngani ja talaka

Amatayo 19:9; Amaluko 10:11-12; Aluka 16:18

³¹ “Jijaandikwe mu majaandiko ga Annoongo, ‘Mundu joajola jwaapala kwaaleka hanu bhabhe, apalikwa kwaajandikila talaka.’ ”

³² Nambo nenga ndendakunnobholelanga, “Mundu handa apala kwaaleka hanu bhabhe ligongo lya lyohalela na ngabha ligongo lya ngoongola, atendakwatenda mwikege jonojwe kubhee jwa ngoongola, na jonojwe jwaapakwaalombela mwikege jonojwe jwaalekitwe na jono atenda ngoongola.”

Majigano nnani ja kulapila

³³ “Ntekujohanikianga yakubhee bhandu bha lolo pabhakalobholelwa, ‘Nkotokuleka kutenda chinnongile, nambo hipalikwa kutenda yoha hintekuhaidi kwa Hangwana.’ ”

³⁴ Nambo nenga ndendakunnobholelanga, nkotokulapilanga choachela pantendakuhaidi, wala nkotokulapilanga kwa kunani kulihunde, kwa kubhee chenecho nga chitengu cha umwenye cha Annoongo,

³⁵ Nkotokulapilanga kwa chilambo, kwakubhee nga mahali pakwe pa kubheka makongono, au ku Yelusalemu, wala nkotokulapilanga kwa Yelusalemu kubhee nga chilambo cha Amwenye akolo.

³⁶ Na mwangota nkotokulapilanga kwa mutwe gwinu, maana ngakombola kulitenda hata lijunju linu limo kubhee lihuu au lipili.

³⁷ Handa mpakulobhola, ‘Elo,’ bahi jibhee, ‘Elo.’ Na handa mpakulobhola, ‘Ngabha’ bahi jibhee, ‘Ngabha,’ chocha chela chipakupunda genago kubhoka kwa bheni bhala Abhou.”

Majigano nnani ja kuchibhujikia

Aluka 6:29-30

³⁸ Ayesu akapunda kulongela, “Ntekujohanga yakubhee jikalobholekwa, ‘Lio kwa lio, na lino kwa lino.’ ”

³⁹ Nambo nenga ndendakunnobholelanga, nkotokummujikia chikubho amundu abohu. Mundu handa ampotite lijegwa lya kunnelo, mumtendebhukie kabhele lijegwa linu lya kunchiji.

⁴⁰ Handa mundu ampelike kuchebele kupala bhapetule lichati linu, mwaaleke bhapetule kabhele na likoti linu.

⁴¹ Mundu handa bhapakunkulumikia kupetula nhigo gwinu maili jimo, mgupetule maili jibhele.

⁴² Bhabhapakunnyopa chilebhe mwapekee, nkokotkwaajima bhabhapakuhika kunyahika chilebhe choachela mwapekee.”

Kwaapalanga akaapwati

Aluka 6:27-28, 32-36

⁴³ “Ntekujohanikianga yakubhee jitekulobholekwa, ‘Mwaapale andami ajinu, na kwaachimwa apwati bhinu.’

⁴⁴ Nambo nenga ndendakunnobholelanga, mwaapalange akaapwati bhinu na kwaajopelanga kwa Annoongo bhabhampotekanga mwangota,

⁴⁵ kupala mmangange bhaana bha Atati bhinu bhabhabhii kunani kulihunde kwa Annoongo. Kwa kubhee bhenabho bhatendakwabhalakia lyobha lyabhe bhandu akaabhou na bhammbone, na kwaakomelekea hula bhandu bhammbone na akaabhou.

⁴⁶ Jakwa ngwaupa joajela jimpakupatanga handa mpakwapalanga bhenibhala bhabhampalanga mwangota? Kwa kubhee hata bhabhatochanga kodi bhatendanga hela hela!

⁴⁷ Hela hela handa mpakwapekeanga chalamu akaanung'una bhinu jikajabhe, bholi, ntekutendanga chilebhe changa yobheleka? Hata bhandu bhangaamanyanya Annoongo na bhenabho bhatendanga hela hela.

⁴⁸ Bahi, mmangange bhandu mwangalemwa handa Atati bhinu bha kunani kulihunde kwa Annoongo chibhabhile bhangalemwa!”

6

Ngani ja kwajangatilanga bhangi

¹ Ayesu bhakapunda kulongela, “Ntamange maha, nkokotutendanga hikubho yinu yammbone kupala bhandu bhannolange. Kwakubhee handa mpakutendanga henela jaakwa ngwahupa kubhoka kwa Atati bhinu bhabhabhii kunani kwa Annoongo.”

² “Bahi, pamwajangatila chilebhe ahocho, nkokotulobhola kwa bhandu. Nkokotutenda handa andendemundu chibhatendanga mu Nyuumba ja konganilana Bhayuhudi na ndela ligongo lya bhandu bhalumbalilwe. Ndendakunnobholelanga kweli bhenabho bhatekupatanga ngwahupa jabhenji.

³ Nambo mwenga pampakwapekea chilebhe ahocho, ntende henela hata aganja bhinu bhabhammandikile bhakotokuhimanya chintenda.

⁴ Henela ngani hejo jipakubhee jakuchiiya kwaachinu, na Atati jwinu jwaalola gantendite kwa kuchiiya, bhapakumpekea ngwahupa.”

Majigano nnani ja kujopa

Aluka 11:2-4

⁵ “Mwangota pantendanga kujopa, nkokotutenda handa andendemundu. Bhena angota bhapala kujema na kujopa Mu Nyuumba ja konganilana Bhayuhudi kuntundu ja ndela ligongo lya bhandu bhabhalolange. Ndendakunnobholelanga kweli, bhenaangota bhatekupatanga ngwahupa jabhenji.

⁶ Nambo mwenga pannyopa Annoongo, nnyingile mu chuumba chinu nchitabhile nnyango, ngapena mwajope Atati bhinu bhangabhonekana. Na bhena bhabhagabhona gagatekuchiiya bhapakunpekea ngwahupa.”

⁷ “Na mwangota pantenda kujopanga, nkokotulobhola kwa malobhe gajingi handa bhandu bhangaamanyanya Annoongo. Bhena angota bhaganikia yakubhee Annoongo bhapakwaajohanikia ligongo lya malobhe gajingi.

⁸ Nkokotubhee handa bhenabho, kwa kubhee Atati bhinu bhagamanyanya mumugapala hata kabula mwangaajopa.

⁹ Bahi, henela nga chiipalikwa kujopa, ‘Atati bhitu bhammile kunani kulihunde kwa Annoongo, lihina linu lya kuhalala lilumbalilwe.

¹⁰ Umwenye gwinu guike.

Upalyo gwinu gutendeke pamba pachilambo handa kunani kulihunde kwa Annoongo.

¹¹ Ntupekee leneni chakulya chitu cha machobha goa.

¹² Ntulekelele kulemwa kwitu,

handa na twenga chitutenda kwaalekelela bhabhatulemwite.

¹³ Nkokotutujingia mu malengelo,

nambo ntulekelee kubhoka kwa bhenibhala abohu. Kwa kubhee Umwenye nga gwinu, na machili na ng'anyimo hata machobha goa. Elo.’”

¹⁴ “Ligongo handa mwalekejelinge bhandu kulemwa kwabhenji chibhantendile, na atati bhinu bha kunani kulihunde kwa Annoongo nga chibhapakunlekelela na mwangota.

¹⁵ Nambo handa mwangaalekelela bhandu kulemwa kwabhenji, na bhenabho Atati bhinu bha kunani kulihunde kwa Annoongo bhannekelelanga hopo kulemwa kwinu.”

Majigano nnani ja kutabha

¹⁶ Ayesu akapunda kulobhola, “Pampakutabha nkokotokuhumalika handa akaandende-mundu. Bhenaangota bhatenda kubheka lukenja pamiho jabhe ligongo bhahhonekane na bhandu kubhee bhatabhite. Nannobholelanga kweli, bhena angota bhatekupatanga ngwahupa jabhenji.

¹⁷ Nambo mwenge pamtenda kutabha, nkue pamihon jinu na mpakale mahuta mu mutwe gwinu na mkwemule majunju ginu,

¹⁸ kubhee amundu bhola bhala bhakoto kuhimanya yakubhehe ntabhite, ila bhamanyike tu kwa Atati bhahbe bhangabhonekana. Na bhenabho Atati bhinu bhahabhona gachiite bhapakunpekea ngwahupa.”

Tuchibhekele ngokwe kunani kwa Annoongo

Aluka 12:33-34

¹⁹ Ayesu akapunda kwaalobholelanga, “Nkoto kuchibhekela hilebhe pambani pachil-ambo hikoko ya bhakuhalabiana na kuutu bhatenda kombola kujingila na kusalabiana na akaabwihi kujingila na kujibha.

²⁰ Nchibhekele hilebhe kulihunde kwa Annoongo kwa kubhee hikoko na kuutu ngakom-bola kusalibiana wala akaabwihi ngakombola kujiingila na kujibha.

²¹ Maana penipala pajibhile ngokwe jinu, ngapena kabhele pagupakubhee ntima gwinu.”

Lumuli lwa mmele

Aluka 11:34-36

²² “Lio nga lumuli gwa mmele. Handa lio linu nga likoto, mmele gwinu goa gupakubhee pa nhana.

²³ Nambo handa lio linu nga libhou, mmele gwinu goa gupakubhee mu lubhendu. Bahi, handa nhana gugubhile nkati jinu nga lubhendu, bahi gonogwe nga lubhendu lwa kujogoa!”

Annoongo na hilebhe

Aluka 16:13; 12:22-31

²⁴ “Ayesu akaalobholela bhaakwa amundu bhakombola kwaatumikila akaakolo bhah-hele. Kwa kubhee bhapakwaachimwa bhamo na kwaapala bhenabho jwabhele, au bha-pakubhee na bhamo na kwaabhelua bhenabho bhangi. Ngakombolanga kwaatumikila Annoongo pamo na hilebhe.”

²⁵ “Nga kwa maana nannobholelanga, nkoto kubhee na lipamba kwa ngani ja chakulya chichimpakulyee na ching'welo chichimpakung'wee, wala ngani ja ngobho yakuwala mu mmele jinunji. Bholi, umomi nga chakulya jikajabhe au kupunda echocho? Na mmele, bholi nga kupunda ngobho?

²⁶ Muilolange hijuni. Ngapandanga na kuuna, wala bhangakola ngokwe joha jela. Hata henela Atati bhinu bha kunani kwa Annoongo bhapakunpekea yakulyee. Bholi, mwangota ngabha bhammbone kupunda hijuni?

²⁷ Nga aganiki nkati jinunji kwa kuchilagia bhakombola kuchijonjokea kutandamala kwabhe hata lichaa limo lya kutama kwabhe?”

²⁸ “Ngani ja ngobho, ya niki kubhee na lipamba? Mugalolange malobha ga kumanyahi chigapunda kusalala. Gateendahopo lihengo wala kuchihalakia ngobho.

²⁹ Nambo ndendakunnobholelanga, hata Asolomoni bheene na kukola kwabhe hilebhe koha Annoongo bhangaaweka maha handa lilobha limo lyabhe lya gangani.

³⁰ Bahi, ikabhee Annoongo bhakagawekela mahamba ga kunng'onda, yakubhee leleni gabhile, malabhi gatenda kujoma na kulekelwa pamooto, bholi, ngabha bhapakuntende-langa maha muno? Bholi, mwangota mwangahobhalelanga!”

³¹ “Bahi, nkokotubhee na lipamba, ‘Tupakulyee niki?’ Au kabhele, ‘Tupakung'wee niki?’ Au ‘Tupakuwala niki!’

³² Kwa kubhee genago goa gatenda kulolekewa na bhandu bhangaamanya Annoongo. Atati bhitu abhile kunani kwa Annoongo atenda kuhimanya hilebhe yoha tuhipala.

³³ Henela, nnyemekange kugulolekea Umwenye gwa Annoongo kupeta yoha na gaaga-pala Annoongo, na Annoongo bhapakumpekea genago goa na kunnyonjokeanga.

³⁴ Bahi, nkokotubhee na lipamba nnani ja malabhi, kwa kubhee malabhi jitekubhee na hilebhe yabhe. Kila lichobha litekubhee na hilebhe ya lichobha elyo.”

¹ “Nkotokwaahukumula bhandu bhangi, na mwangota mpakuhukumulwa na Annoongo,

² maana chimpakunhukumula nnyinu na mwangota chimpakuhukumulwa, na chipemelo chela chela chimpakupemela bhandu nga chochocho Annoongo nga chibhapakunpemelanga mwangota.

³ Kwaniki muchibhona chipande chichoko chichibhile mu lio lya anung'una bhinu, na kongo chipalapata chichibhile nkati ja lio linu ngachilola?

⁴ Nkombola bholi, kunnobholela anung'una bhinu, 'Anung'una bhangu, nnende nim-moe chipande chichoko mu lio linu na kongo mwabhene nkweni chipalapata mu lio linu?

⁵ Mwe andendemundu! Nnyemeke kubhoa chipalapata chichibhile mu lio linu, penapo nga pampakombola kulola kweli chimpakwaabhoa chipande chichibhile nkati ja lio lya anung'una bhinu.' ”

⁶ “Nkoto kwaapekeanga bhandu hilebhe yammbone ya Annoongo, wala nkoto kwaajelea magolobhe hilebhe yammbone kwa kubhee bhapakuilebhatanga.”

Nnyope, Nlolekee, nng'ombe pannyango

Aluka 11:9-13

⁷ “Nnyopange, mwangota mpakupatanga, nnoleange na mwangota mpakupatanga, nng'ombange pannyango, na mwangota mpakujogolelwa.

⁸ Kwa maana amundu bhola bhala pabhajopa bhatendakwaapekea, na bhola bhala bhabhalolekea bhapekewa, na bhabhalala bhang'omba pannyango bhajogolelwa.

⁹ Bholi, bhabhi amundu nkati jinu handa mwana bhabhe bhaajopite nkate, bhapakwaapekea liganga?

¹⁰ Handa bhaajopite litobhi, bhapakwaapekea lijoka?

¹¹ Mwangota bhammilinge mwaabhou, nambo mmanyanga kwaapekea bhana bhinu hilebhe yammbone, nga henela Atati bhinu bhaabhile kunani kulihunde kwa Annoongo bhapakwaapekeanga yammbone muno bhenibhala bhabhaajopa.”

¹² “Mwatendelange bhandu bhangi handa chimpalanga bhantendelange bhantendele mwangota. Hejeje nga maana ja malagilo ga Amusa na majigano ga Akaalondoi bha Annoongo.”

Nnyango gwakunying'inyala

Aluka 13:24

¹³ “Nnyingilange kupetela nnyango gwa kunying'inyala, ligongo ndela jijijaula kwa-hobheanga bhandu nga jitekupanuka, na nnyango gwa kujingila monomwe nga gutekupanuka, bhabhajaula mu ndela ejo nga bhajingi.

¹⁴ Nambo ndela jijijaula mu umomi nga jakunying'inyala, na nnyango gwa kujingila monomwe nga gwakunying'inyala, nga bhandu kachoko bhakombola kujimanya jene ndela.”

Nkongo gumanyika kwa matunda gabhe

Aluka 6:43, 44

¹⁵ “Nchibhekange kutali na akaalondoi bha unami. Bhenaangota bhaikanga kwaachin-unji bhabhi kubhonekana panja handa ngondolo, nambo nkati jabhe nga mamei gagahika kunhulaanga.

¹⁶ Mpakubhamanyanga kwa hikubho yabhe. Bholi, bhandu bhakabhanga zabibu mu nkongo gwa miibha, au mbendembe mumkongo gwa mpengo? Ngabha!

¹⁷ Bahi, nkongo gwammbone guogola matunda gammbone, na nkongo mbhou guogola matunda mabhou.

¹⁸ Nkongo gwammbone ngakombola kuogola matunda gabhou, wala nkongo mmohu ngakombola kuogola matunda gammbone.”

¹⁹ Kila nkongo gwangaogola matunda gammbone gupakueketwa na kulekelwa pamooto.

²⁰ Henela, mpakubhamanyanga akaalondoi bha unami kwa hikubho yabhenji.

Nimmanyangahopo mwangota

Aluka 13:25-27

²¹ “Ngabha kila mundu jwaangema nenga, 'Hangwana, Hangwana,' bhapakujingilanga mu Umwenye gwa kunani kwa Annoongo, ila bhenibhala bhabhapakupangananga chibhapala Atati bhangu bhabhabhile kunani.

²² Bhandu bhajingi bhapakunobholela nenga lichobha lyela lya kuhukumula, 'Hangwana, Hangwana! Kwa lihina linu tukatangacha ngani jinu kwa bhandu, na kupetela lihina linu tukaabhoanga bhandu mahoka na kupangananga gajingi gakangachika!'

²³ Penapo mbakunnobholelanga, ‘Nimmanyanga hopo mwangota, mmokange kwaachangu, mwenga mwaangota akaabohu!’ ”

Akaachengi bha nyuumba bhabhele

Aluka 6:47-49

²⁴ “Henela, kila amundu bhabhajoha malobhe gangu na kugakamula, bhalandana na mundu jwaabhile na luunda, jwaachengite nyuumba panani ja liganga.

²⁵ Handa hula jipakoma na loochi lukatweelela machi, na handa mboongo ngolongwa jipakuhika na kujipota jela nyuumba. Nambo jangagwee kwa kubhee jikachengwa panani pa liganga.”

²⁶ “Nambo amundu bhoha bhala bhabhajoha malobhe gangu na kugaleka, bhatenda kulandana na amundu bhapoganike bhabhakachenga nyuumba jabhe panani jamihanga.

²⁷ Hula jikakoma, machi gakatweelela mu loochi, na mboongo ngolongwa jikapoga na kujipota nyuumba ejo, nga jikagwee, na nhindo gwakwe gukibha nkolongwa muno.”

Mamulaka ga Ayesu

²⁸ Ayesu pabhakajomola kulobhola malobhe genago, lilubhalo likolongwa lya bhandu bhakakangachanga kwa henela chikajigana bhandu.

²⁹ Kwa kubhee bhakajigana handa amundu bhabhabhile na uwecho, wala ngabha bhabhajigana Malagilo ga Amusa.

8

Ayesu bhaalamia amundu bhabhile na mambujupuju

Amaluko 1:40-45; Aluka 5:12-16

¹ Ayesu pabhakatuluka kubhoka palitombi, lilubhalo likolongwa lya bhandu bhajingi likaakagula.

² Bahi, bhakahika amundu bhamo bhabhi atamwa mambujupuju, bhakaatindibhalila majugwa na kwaalobholela, “Hangwana, handa mpalite, nkombola kulamia nenga!”

³ Ayesu bhakanyulula lubhoko lwabhe na kunkwaa na kulobhola, “Ndenda kupala! Nname.” Mala bhena amundu bhakalama mambujupuju gabhe.

⁴ Ngapena Ayesu bhakaalobholela, “Nnole nkoto kunnobholela mundu bhoabhala, nambo nnyaule kwa akaakung’i na kubhoa ngwahupa jijikahukumulikwa na Amusa ili kwaalangia yakubhee ntekulama.”

Ayesu bhaalamia akolo bhamo bha manyemba ga ku Lumi

Aluka 7:1-10

⁵ Ayesu pabhakahika pannyini ku Kafalanaumu, akolo bhamo bha manyemba ga ku Lumi bhakaajendelela na kwaapembelela bhaanyangatile.

⁶ Kongo bhabhi kulobhola, “Hangwana, antumichi bhangu bhatekugoloka kaaja atamwa muno na bhatekupola.”

⁷ Ayesu bhakaalobholela, “Mbakuhika kwaalamia.”

⁸ Bhenabho akolo bha manyemba ga ku Lumi bhakaalobholela Ayesu, “Hangwana, ngapalikwa mwenga nnyingile mu nyuumba jangu. Nambo nlagie tu lilobhole limo na antumichi bhangu bhapakulama.

⁹ Kwa kubhee nenga na mwene nga amundu nibhekitwe pahi ja mamulaka, ngweti manyemba pahi jangu. Handa mbakwaalobholela habhabha, ‘Nnyaule,’ na bhenabho bhakajaula. Na bhangi handa naalobholile, ‘Nhike,’ bhenabho bhatenda kuhika. Na handa mbakwaalobholela antumichi bhangu, ‘Npangane henela,’ na bhenabho bhapakungana.”

¹⁰ Ayesu pabhakajoha genago, bhakakangacha muno, akabhalobholelanga bhandu bhabhakibha bhakaakagula, “Ndendakunnobholelanga kweli, nangapata kwaabhona amundu bhoha bhala mu chilambo cha ku Isilaeli bhakuhobhalela muno handa bhenabho.

¹¹ Bahi ndendakunnobholelanga yakubhee bhandu bhajingi bhapakuhika kubhoka kuluabho na kuuwelo, na bhena angota bhapakutamanga ili bhalyee pamo na Aaibulahimu, na Aisaka, na Ayakobo mu Umwenye gwa kunani kulihunde kwa Annoongo.

¹² Nambo bhenibhala yakubhee Umwenye gonogwe gwa Annoongo nga gwabhenji bhapakwaajeha panja, palubhendu, konokwe bhapakugutanga na kuyaga mino.”

¹³ Kubhoka penapo Ayesu bhakaalobholela bhenabho akolo bha manyemba ga Ku Lumi, “Nnyaule kwaachinu na ibhee handa chinhobhalile.”

Na antumichi bhabhe bhakalama muda gogogo.

Ayesu bhaalamia bhandu bhajingi

Amaluko 1:29-34; Aluka 4:38-41

¹⁴ Ayesu bhakahika kwaachabhe Apetulo, bhakaakolela hakibhabhe haikege bhagol-wike pachindanda, bhatenda kulwala muno.

¹⁵ Bahi, Ayesu bhakaakamula lubhoko bhenibhala haikege, na bhakalama bhakajema na kujemeka kwabhekela tayali chakulya.

¹⁶ Pajikahika kimuo, bhakaalelta bhandu bhajingi bhabhakibha na mahoka, na bhen-abho Ayesu bhakaakulumikiha mahoka gabhoke kwa bhandu. Kabhele bhakaalamia bhandu bhoha bhabhakibha akaatamwa.

¹⁷ Akatenda henela kupala genigala malobhe gaakalongela alondoi bhakeemitwa Aisaya galenganile, “Bhenabho bheene bhatekutupetula na kupongokewa kwitu, na bhatekuhipetula itamwa yitu.”

Namuna chibhapalikwa kubhee bhabhaakagula Ayesu

Aluka 9:57-62

¹⁸ Ayesu pabhakabhona lilubhalo likolongwa lya bhandu litekwaatindila, nga bhakaakulumikia bhabhachijigina bhabhe bhajombokange kujenda kuntundu ja litanda.

¹⁹ Bhabhajigana bhamo bha Malagilo ga Amusa bhakaajendelela Ayesu na kwaalob-holela, “Bhannyigana, nenga mbakunkagula koha kola kumpakujenda.”

²⁰ Ayesu bhakaajangula, “Mabwea gakweti macheembo, na hijuni hikweti hiyua, nambo amwana bha amundu bhakwetihopo chehemu ja kupomolelela.”

²¹ Ngapena amundu bhamo nkati ja bhabhachijigina bhabhe bhakaalobholela Ayesu, “Hangwana, naanjinu nneke oti ngaachike Atati bhangu.”

²² Nambo Ayesu bhakaalobholela, “Nkagule nenga! Nneke bhandu bhabhabhilinge handa bhajomwike bhachikane na bhandu handa bhabhawilinge.”

Ayesu bhajikotoa mboongo jikotoke

Amaluko 4:35-41; Aluka 8:22-25

²³ Ayesu bhakakwela mu mtumbwi nkolongwa, na bhabhachijigina bhabhe bhakaak-agula.

²⁴ Mala mboongo ngolongwa jikabhokela mulitanda, na mawimbi gakajemeka kugupukunyapukunya ntumbwi nkolongwa. Na muda gonogwe Ayesu bhabhi tangu bhagolwike lugono.

²⁵ Bhabhachijigina bhakaajendelela na kwaajimua, bhabhi kulobhola, “Hangwana ntuchobhole.” “Tutendakujomoka!”

²⁶ Ayesu akaajangulanga, “Mwe mwangota mmilinge na kuhobhalela kuchoko!” “Mboni ntenda kujogopanga?” Bahi, bhakajinuka na bhakajikalipila mboongo na mawimbi, na mboongo jikakotoka.

²⁷ Bhandu bhoha bhakakangachanga, bhabhi kulobhola, “Nga mundu jwa namuna niki hojojo?” “Hata mawimbi na mboongo jitendakwaajohanikia!”

Ayesu bhaalamia bhandu bhabhele bhabhilinge na mahoka

Amatayo 5:1-20; Aluka 8:26-39

²⁸ Ayesu pabhakahika ku chilambo cha bha Gadala, kuntundu ja litanda, na konokwe bhandu bhabhele bhabhakapoganikwa na mahoka gabhou bhakakongana nabho bhabhi kubhokanga kumakabuli. Bhandu habha bhakibha bhakalipa muno, hata pangabhee na amundu bhabhakajiga kupeta mu ndela jenejo.

²⁹ Bhenaangota bhakajemeka kupotanga nyenye, “Mmi na niki na tweenga, mwe Mwana bha Annoongo? Bholi, ntekuhika kutulagia tangu muda gwangahika?”

³⁰ Kubhandikila na penapo pakibha na magolobhe gajingi bhatendita kugaliyanga.

³¹ Bahi, genago mahoka gabhou gakaapembelela Ayesu, “Handa mpakutubhoa, bahi ntuluke tukagajingile magolobhe gala.”

³² Ayesu akaalobholelanga, “Nnyaulange, penapo bhakaabhoanga bhenibhala bhandu, na kujingila mumagolobhe gala. Lilubhalo lyoa lya magolobhe likabhutukila mu chiholelo chikolongwa, likajingila mu bahali, magolobhe goa gakawee na machi.”

³³ Bhenibhala bhandu bhabhalanga genigala magolobhe bhakabhutukanga na bhaka-jaula kunnyiini, konokwe bhakakongolela ngani joha jijikapetela kwa bhenibhala bhandu bhabhi na mahoka.

³⁴ Kubhoka penapo bhandu bhoha bha pannyini bhakabhoka na kwaajendelela Ayesu, na pabhakaabhona bhakaapembelela bhabhoke pachilambo chabhe.

9

Ayesu bhaalamia amundu jwaapolite mmele

Amaluko 2:1-12; Aluka 5:17-26

¹ Ayesu bhakakweela mu mtumbwi, na bhakajomboka litanda na kuhika mu chilambo chabhenji.

² Ngapena bhandu bhajingi ngabhanneta mundu jwaapolite mmele goa, bhabhagonekwwe nnani ja njeega. Ayesu pabhakabhona kuhobhalela kwabhenji, nga akaalobholela jonijola mundu jwaapolite, “Mwanangu nchipee ntima! Mabohu ginu gatekulekelwa.”

³ Bhandu bhangi bha bhenibhala bhabhamanyanga malagilo ga Amusa bhakajemekanga konyananga akaachinabhene, “Hojo mundu atekwaaponja Annoongo!”

⁴ Ayesu akagamanya chibhatenda kuganikia, akaakonyanga, “Kwaniki ntendanga kuganikia mabohu mu mitima jinunji?”

⁵ Bholi, nga niki chichibhile changalimba, kulobhola, ‘Ntekulekelwa mabohu ginu’ au kulobhola, ‘Nnyeme nnyaule?’ ”

⁶ Nambo, mbala muimanyange yakubhehe amwana bha amundu bhakombola kwaalekelela bhandu mabhou gabhe pamba pachilambo. Penapo akaalobholela jonojwe mundu jwapolite mmele, “Nnyimuke ntote njeega chinu, nnyaule kwaachinu.”

⁷ Jonojwe mundu jwaapolite mmele bhakajimuka, na bhakajaula kwaachabhe.

⁸ Bhandu bhoo mu lilubhalo lyela pabhakagalola genago bhakajogopanga, bhakaalum-balila Annoongo bhabhaapekie bhandu machili ga henela.

Ayesu bhaakema Amatayo

Amaluko 2:13-17; Aluka 5:27-32

⁹ Ayesu bhakabhoka penapo, na pabhakajaula, bhakaabhona amundu bhamo bhakemitwa Amatayo, bhatamite panyuumba ja kutochela kodi, Ayesu bhakaalobholela, “Ngagule nenga.”

Na bhenabho Amatayo bhakajema, na kwaakagula.

¹⁰ Ayesu pabhakibha kwaachabhe Amatayo kulyee chakulya, bhakutochanga kodi bhajingi na akaabohu bhakahikanga bhakatama na kulyee nabho na bhabhachijigana bhabhe.

¹¹ Mafalisayo pabhakabhona genago, bhakaakonyanga bhabhachijigana bhabhe, “Kwaniki bhannyigana bhinu bhalyee pamo na bhandu bhabhachilinge na mabohu?”

¹² Ayesu pabhakajoha genago, bhakaalobholelanga, “Bhandu bhanga itamwa bhaapalanga hopo ang’anga, nambo bhenibhala akaatamwa nga bhaapala ang’anga.

¹³ Bahi, nnyaulange nkachijigane maana ga malobhe aga, ‘Mbala kia, ngabha mbeeko,’ kwa maana nangahika kwaakemanga bhandu bhabhilinge bhammbone, nambo bhabhilinge na mabhou.”

Majigano nnani ja kutabha

Amaluko 2:18-22; Aluka 5:33-39

¹⁴ Penapo bhabhachijigana bha Ayohana ambatichaji bhakaajabhulila Ayesu, bhakaakonya, “Tweenga na Mafalisayo tutenda kutabha mala jijingi, kwa niki bhabhachijigana bhinu ngatabha?”

¹⁵ Ayesu bhakaajangulanga, “Bholi, akaageni bhabhalaalikwe ku ulombela bhapakuhumalanga na kutabha pabhabehe pamo na hangwana bha ulombela? Nga henela! Nambo muda gupakuhika hangwana bha ulombela chibhapakubhokekwa nkati jabhenji, gono muda nga pabhapakutabhanga.”

¹⁶ “Bhandu ngatotela chibhamba cha ngobho jiyono mu ngobho ja lolo. Handa bhatenditinge henela, jenejo ngobho ja lolo jipakujonjokeka lipobhole, na jenejo ngobho jipakuhilibika muno.

¹⁷ Wala bhandu ngalekelanga divai jiyono mu mihuko jijilalite jijitotitwe na mam-bendela ga ngondolo. Handa bhatenditinge henela, divai hejo hipakuipapulana yeneyo mihuko jenejo, na divai jipakujitika na mihuko jipakupapuka. Divai jiyono jilekelwa mu mihuko miyono na henela divai na mihuko kubhee maha!”

Amwali bha akolo na mwikege bhabhalamite

Amaluko 5:21-43; Aluka 8:40-56

¹⁸ Ayesu pabhatendita kulobhola genago, akolo bhamo Annyahudi bhakahika, bhaakatindibhalila majugwa na kulobhola, “Amwali bhangu bhatekujomoka nangocheni. Nambo nhike nkaabhekele lubhoko lwinu na bhenabho bhapakulama.”

¹⁹ Ayesu bhakajimuka na kujaula pamo na bhabhachijigana bhabhe bhakaakagula.

²⁰ Na pabhatendita kujaula haikege bhamo, atamwa ncholocholo kwa yaaka komi na jibhele, bhakaakagula Ayesu kuyeto, bhakamula mbendo ja ngobho jabhe.

²¹ Kwakubhee bhakachilobholela muntima gwabhe, “Handa ngamwile tu ngobho jabhe, mbakulama.”

²² Ngapena Ayesu bhakatendebhuka bhakaabhona haikege, bhakaalobholela, “Amwali, nchipeeke ntima! Kuhobhalela kwinu kutekunlamia.” Haikege bhenabho bhakalama popopo.

²³ Ngapena Ayesu pabhakahika kwaachakwe bhenibhala akolo. Na bhakaabhona bhandu bhagomba hipenga ya nguto na kuguta muno,

²⁴ bhakaalobholela, "Mmokange pamba! Amwali abha bhangawee, bhatekugoloka tu." Nambo bhandu bhakaahaka.

²⁵ Bahi, lilubhala lya bhandu pabhakaabhoanga panja, Ayesu bhakajingila nkati, bhakaakamula lubhoko bhena amwali, na bhenabho bhakajema.

²⁶ Bhandu bhoa bha chilambo echo bhakajoanga ngani hejo.

Ayesu bhaalamia bhangalola bhabhele

²⁷ Ayesu pabhakabhoka penapo, na pabhatendita kujenda, bhangalola bhabhele bhakaakagula kongo bhabhi kupotanga nyenye, "Amwana bha Adaudi, ntukolee kia!"

²⁸ Ayesu pabhakajingila mu nyuumba, bhangalola bhabhele bhakaajendelela Ayesu na bhakaakonya, "Bholi, nhobhalelanga kubhehe nenga ndenda kombola kunnamiana?"

Na bhenaangota bhakaajangula, "Eloo, Hangwana."

²⁹ Penapo Ayesu bhakakwahanga miho gabhenji, bhakalobhola, "Na hibhee kwaachin-unji handa chinhobhalilinge."

³⁰ Miho gabhenji ngagakajogoka kulola. Na bhenabho Ayesu bhakaakanikia muno, "Nkotokwaalobholelanga amundu bhoabhala chilebhe chenjeni."

³¹ Nambo bhenaangota bhakabhokanga, bhakajaula kutandahaa ngani ya Ayesu mu chilambo chela choa.

Ayesu bhaalamia amundu bhangalongela

³² Bhandu pabhatendita kujenda kwaachabhe, bhangi bhakaaleta kwa Ayesu amundu bhangalongela ligongo bhakibha na mahoka.

³³ Ayesu pabhakalibhoa lyenilyela lihoka, popopo bhenibhala amundu bhangalongela bhakajemeka kulongela kabhele. Bhandu bhakakachanga na kulobhola, "Chilebhe handa chenjeni changabhokana mu chenje chilambo cha ku Isilaeli."

³⁴ Nambo Mafalisayo bhakalobhola, "Amundu abha bhatenda kugabhoa mahoka kwa machili ga akolongwa bha mahoka."

Ayesu bhaabhonela kia bhandu

³⁵ Ayesu bhakatyanga mu hlambo yoa na hijiji, na bhakajigana mu majuumba gabhenji ga konganilanga Bhayahudi, bhabhi kulongela Ngani Jammbone ja Umwenye gwa Annoongo, na kulamia bhandu itamwa yoa.

³⁶ Ayesu pabhakaabhonanga bhandu mabhoga mabhoga bhakaakole kia kwa kubhehe bhakibhanga na lipamba na bhangabhee bha kwaajangatila.

³⁷ Penapo bhakaalobholelanga bhabhachigana bhabhe, "Hilebhe ya kuhuna nga hijingi ila bhakuhuna na ngachoko.

³⁸ Mwapjopange bhenabho bhabhakweti hilebhe ya kuhuna bhaatume bhandu bhakahunange hilebhe yabhe."

10

Akaatumi komi na bhabhele

Amaluko 3:13-19; Aluka 6:12-16

¹ Ayesu bhakaakema bhenibhala bhabhaajigana bhabhe komi na bhabhele, bhakaapekeanga machili ga kubhoa mahoka na kalamia akaatamwa na hibhini yoa.

² Ganga nga mahina ga bhabhaajigana bhabhe bhabhakaakema akaatumi komi na bhabhele, bhabhakajemeka, Asimoni jwakemitwa Apetulo, na Aandulea bhabhakibha anung'una bhabhe Apetulo, Ayakobo mwana bha Azebedayo na anung'una bhabhe bhabhakemitwa Ayohana,

³ Afilipo na Abatolomayo, Atomaso na Amatayo bhabhakibha bhatocha kodi, Ayakobo mwana bha Aalufayo, na Atadei,

⁴ Asimoni bha ku Kanaani, na Ayuda Isikaliote bhabhakaagaluka Ayesu.

Ayesu bhatendakwaatuma akaatumi komi na bhabhele

Amaluko 6:7-13; Aluka 9:1-6

⁵ Ayesu akaatuma bhenabho akaatumi komi na bhabhele na kwaapekea Malagilo gangani, "Nkotokujaulanga kwa bhandu bhanga Bhayahudi, na wala nkokotokujingilanga mu hilambo ya ku Samalia.

⁶ Nambo nnyendange kwa bhandu bha chilambo cha ku Isilaeli bhenaangota nga handa ngondolo hiiyobhite.

⁷ Nnyaulange nkaalobholelange bhandu, 'Umwenye gwa kunani kwa Annoongo gub-handikile,'

⁸ Nnamiange akaatamwa, mwayohange bhabhawilinge, mwalamiange bhabhabhile na mambujupuju, mmoange mahoka. Mpatitinge hiyoyo, mmoange hiyoyo.

⁹ Nkotokupetulanga bunyu mu mihuko jinu, wala madini ga mbiya wala njeejeka ya chaba.

¹⁰ Nkotokupetulanga nhuko gwa kujopela hilebhe nndela, wala ngobho ya kutindiganya, wala ilatu, wala ntindio. Kwa kubhehe bhabhatenda lihengo bhapalikwa kupokela chichipalikwa.

¹¹ Pampakujingilanga pachilambo au chijiji choachela, munnoleange mundu jwaapakumpokelanga na handa bhammpokilinge ntamange monomwe mpaka pampakubhokanga.

¹² Pampakujingilanga mu nyuumba hejo, mwaalobholelange bhandu, 'Kuhengwa kubhee na mwangota.'

¹³ Handa akaakola nyuumba bhampokilinge amani jipakubhee na bhenaangota. Nambo handa bhangopakela bahi amani jinunji jipakummujilanga mwaachina bhene.

¹⁴ Handa mundu joajolas jwapakana kumpokelanga au kunnyohanikianga, bahi pampakubhoka mu nyuumba hejo au chilambo hecho, mpyatange lutukunda mumakongono ginu hibhee chilolelo kubhee bhakanitinge kwaapokela Annoongo.

¹⁵ Ndendakunnobholelange kweli, bhandu bha namuna jenejo Annoongo bhapakwalinga kupunda bhandu bhabhatamitanga chilambo cha ku Sodoma na chilambo cha ku Gomola."

Kulaga kukupakuhika

Amaluko 13:9-13; Aluka 21:12-17

¹⁶ "Nangocheni, nenga ndendakuntumanga mwangota handa ngondolo pakati ja mamei. Mmangange na luunda handa lijoka na mmangange bhakutungamanika handa ngunda.

¹⁷ Nchibhekange kutali bhandu bhapakuntaukanga bhapakunkamulanga na bhapakumpelekanga kuchebele na kumpotanga luyaakato mu majuumba gabhe ga kuchaalila.

¹⁸ Bhapakumpelekanga nnoongi ja akaatabhala na manyewe ligongo lya nenga, mpate kwakongolela kwabhenji kwa bhandu bhangaamanyo Annoongo.

¹⁹ Nambo pampakupelekewanga mwangota kuchebele, nkoto kubhehe na lipamba kuganikia chichimpakulongela, kwa kubhehe mpakupekewa lilobhe lya kulongela.

²⁰ Kwa kubhehe ngabha mwangota bhampakulongelanga nambo bhapakulongela nga Mboomo ja Annoongo bhena nga Atati bhinunji."

²¹ "Amundu bhapakung'aluka anung'una bhabhe bhakomekwe, na bhenabho atati bhapakung'aluka mwana bhabhe, na bhenabho bhaana bhapakwaapotanga akaabhelei bhabhe na kwaakomanga.

²² Bhandu bhoa bhapakunchimwanga mwangota ligongo lya lihina lyangu, nambo bhabhapakuchitimalika mpaka kupela, Annoongo bhapakwaokoa.

²³ Handa bhandu bhakampoteka muchilambo chimo, ntilange mpaka muchilambo chengi. Ndendakunnobholelange kweli, ngajomolanga kutyanga mu hilambo yoa ya chilambo cha ku Isilaeli tangu Mwana bha Amundu bhangahika."

²⁴ "Bhabhachijigana ngakombola kwaapunda bhabhanyigana bhabhe, na abhanda ngaapunda Hangwana bhabhe.

²⁵ Bhabhachijigana na bhabhee tu handa bhabhaajigana bhabhe na abhanda bhabhee bhabhe handa Hangwana bhabhe. Handa akolo bha nyuumba bhakemitwe akolo bha Abelizebuli, bholi! Bhandu bhangi bha nyuumba jabhe ngati bhapakemwanga mahina mabhou muno?"

Bhabhapalikwa Kujogopwa

Aluka 12:2-7

²⁶ "Henela nkokwaajogopanga bhandu. Atenda kuhiyanga hilebhe hibhatendanga nambo muda gupakuhika bhandu bhapakugabhona genago gagabhatendanga na Kila jumo bhapakugamanya gagatekuchiiya.

²⁷ Genigala ninnobholilinge pajika jitu, mwalobhololange bhandu, na genigala ganannobholilinge kwa kunong'ona mwaalobholele kila mundu.

²⁸ Nkotokwaajogopanga bhenibhala bhabhakombola kugukoma mmele gwinu, nambo ngakombola kujikoma mboomo jinu, nambo mwaajogope bhenibhala bhabhakombola kukoma mmele na mboomo jinunji mu mooto gwangahimika machobha goa.

²⁹ Njehe huuchwa kwa ulohi nchoko. Nambo jwaakwa hata jumo jwabhe jwapakugwee pahi pangali atati bhinu kuimanya.

³⁰ Nambo kwinunji mwangota, hata majunju mu mimutwe jinunji gatekubhalan-ganikwa goa.

³¹ Henela ntokujukogopa, mwangota nga bha maana muno nnongi ja Annoongo kupeta hijuni hijingi.”

Kwaakonda na Kwaakana Akilisto

Aluka 12:8, 9

³² “Mundu bhoa bhala bhabhapakoonda nnongi ja bhandu kubhee bhangu nenga, nanenga mbakwaaeketela nnongi ja Atati bhangu bhabhabhile kunani kulihunde kwa Annoongo.

³³ Nambo bhoabhala bhabhapakungana nenga nnongi ja bhandu, na nenga mbak-waakana nnongi ja Atati bhangu bhaabhile Kunani kulihunde kwa Annoongo.”

Nangahika kuleta amani nambo ngoondo

Aluka 12:51-53; 14:26, 27

³⁴ “Nkotokuganikiha yakubhee ndekuhika kujileta amani pachilambo. Nangahika kujileta amani ila ndekuhika kuleta ngoondo.

³⁵ Ndekuhika kwaanenda bhakoto kwelekana nkati ja mundu na atati mundu, pakati ja amwali na anyongo jwabhe na pakati ja akoano na akimundu,

³⁶ na apwati bha mundu bhapakubhee bhandu bha kwaachabhe, akaalongo mundu.”

³⁷ “Bhoabhala bhabhaapala atati bhabhe au anyongo bhabhe kupeta chibhambala nenga, ngapalikwa kubhee bhangu nenga. Na bhenibhala bhabhaapala mwana mwanalome au mwana mwikege kupeta chibhambala nenga, ngapalikwa kubhee bhangu nenga.

³⁸ Amundu bhoabhala bhabhapetula nchalaba gwabhe na kungagula, bhapalikwa kubhee bhabhachijigana bhangu.

³⁹ Amundu bhoabhala bhabhapala kugulolekea umomi gwabhe, bhenabho bha-pakugubhoa, nambo bhoa bha bhabhapakugubhoa umomi ligongo lya nenga, bhakupata umomi gwa machobha goa.”

Bhabhapakupokela Ngwahupa

Amaluko 9:41

⁴⁰ “Bhabhampokelanga mwangota mu nyuumba yabhenji, bhambokela nenga, na mundu bhabhambokela nenga, bhampokela bhenibhala bhabhandumite.

⁴¹ Amundu bhoabhala bhabhaapokela alondoi, bhapakupokela ngwahupa ja alondoi, na amundu bhabhampokela mundu bha ntima gwammbone kwa kubhee na ntima gwammbone bhapokela ngwahupa ja ntima gwammbone.

⁴² Ndendakunnobholelanga kweli, bhoabhala bhabhapakwaapekea mundu bhamo hata chikombe cha maachi gakuhiha bhamo bha abha bhachoko kwa kubhee nga bhanaajigana, Annoongo bhapakwaapekea ngwahupa jabhe.”

11

Ayesu bhaalumbalila Ayohana Ambatichaji

Aluka 7:18-35

¹ Ayesu pabhakajomola kwaalagianga bhaajigana bhenibhala komi na bhabhele bhak-abhoka penapo, bhakajenda kujigana na kwaanatangachiana bhandu Ngani Jammbone mu hilambo ya ku Galilaya.

² Ayohana Ambatichaji pabhakibha kuchitabho bhakajoha hikubho hibhatenda Ayesu Kilisto. Ayohana ngabhaatuma bhabhaajigana bhabhe bhakaakonye Ayesu.

³ “Bholi, mwenga nga bhenibhala bhabhapakuhika, au twaalende bhangi?”

⁴ Ayesu bhakaajangula, “Nnyendange nkaalobholele Ayohana hikubho muijoine na kuilola,

⁵ bhangelola, bhatenda kulola, na bhabhi na mambujupuju bhatenda kulama, na bhangajoha bhatenda kujoha, bhabhawile bhatenda kuyoka na akaahocho bhatangachi-wanga Ngani Jammbone.

⁶ Bhatekutendelwa gammbone bhenibhala bhandu bhagakolanga lipamba na nenga!”

⁷ Bhaajigana bha Ayohana pabhakajaulanga, Ayesu bhakajemeka kugalobholela malub-halo ga bhandu ngani nnani ja Ayohana, “Nkajaulanga kulola niki konikola kululemba? Bholi, nkapa kuilola linyai lilikajelwa kutali na mboongo?

⁸ Handa nga henela, nkajaulanga kulola niki? Nkajaulanga kwaalola mundu bhab-hawalite ngobho ya bei ngolongwa? Bhandu bhawalanga ngobho ya bei ngolongwa hutamanga mu nyuumba ja akaakolo bha hilambo.

⁹ Nambo nkajaulanga kulola niki? Nkajaulanga kwaalola Alondoi? Kweli, ngabha, nga kupunda alondohi.

¹⁰ Jonojwe nga jwakalangelwa mu Majaandiko ga Annoongo, abhikulobhola 'Ndendak-waatuma antumichi jwangu jwa kunani kwa Annoongo annongolelange, kwa kubhee bhapakunhalakia ndela jinu.'

¹¹ Ndendakunnobholelanga kweli, pakati ja bhaana bhoa bha bhandu, bhangabhokela bhabhile akolo kupeta Ayohana Ambatichaji. Hata henela, bhenibhala bhabhile ahocho muno mu umwenye gwa kunani kulihunde kwa Annoongo nga akolongwa kupunda Ayohana.

¹² Kubhokela muda gwa Ayohana Ambatichaji mpaka nangocheni, umwenye gwa kunani kulihunde kwa Annoongo gupetulikwa na bhandu bhabhi na machili, na bhandu bhabhilinge na machili bhapalanga kugutola kwa machili.

¹³ Maana gakwe majigano goa na Malagilo ga Amusa gagajigana muda gwa Ayohana Ambatichaji.

¹⁴ Handa nkombolanga kujeketela kubhee Ayohana nga Aelia bhabhapakuhika

¹⁵ Bhabhilinge na machikilo gakujoa na bhajoange!"

¹⁶ "Bhandu bha nangocheni nichilandanikie na niki? Handa achikakombo bhatamitinge palubhanja pabhahuchilanga hilebhe na kuhemela hilebhe bhatendakutamanga na kwaakemanga akaajabhe na kwaalobholelanga,

¹⁷ "Tumpotilinge ng'oma nambo mwangota mwangakina! Tujembite nyembo ya malilo nambo mwangota mwangagutanga kwa nnyembo gwa kokoleka!"

¹⁸ Ayohana akahika, akatabha na wala jwangang'wee divai, na bhenaangota bhakalob-holanga, "Atekupoganikwa na mahoka gabohu!"

¹⁹ Mwana jwa Amundu akahika, akalyee na kung'wee, na bhenaangota bhakalob-hola, "Munnolange hojo mundu jwakumenyeka na jwakung'wee muno, aganja bhabhe bhabhakumbanga kodi na bhabhilinge na mabohu!" Hata henela Machili ga Annoongo gabhonekana gammbone kwa ndela ja hikubho yabhe."

Hilambo ya bhandu bhangahobhalela

Aluka 10:13-15

²⁰ Kubhoka penapo, Ayesu bhakajemeka kwaalongelelanga mabhou bhandu bha hil-ambo yela, yakubhee pamo na kuitendela yakangachika hijingi, kwa kubhee bhandu bhabhe bhangapala kuleka mabhou gabhenji.

²¹ Akaalobholelanga, "Kulaga kupakubhee kwaachinu mwangota bhandu bha chilambo cha ku Kolasini! Kulaga kupakubhee kwa mwangota bhandu bha chilambo cha ku Betisaida! Kwa kubhee handa hikubho yakangachika hiikateendeka kwaachinu nga ikatendeka konikola ku chilambo cha Tilo na kuchilambo cha Sidoni, bhandu bhakwe bhakawala ngobho ja majunia, na kuchipakala lihu kulangia kubhee bhatenda kuleka mabohu gabhenji!"

²² Nambo ndendakunnobholelanga, lichobha lya kuhukumulwa lipakubhee chindema muno kwa bhandu bha chilambo cha ku Tilo na chilambo cha ku Sidoni bhapakupatanga hukumulo ngolongwa kupeta mwangota.

²³ Na mwangota, bhandu bha chilambo cha ku Kafalanaumu, bholi, bhapakuntuluanga mpaka kunani kwa Annoongo? Ngabha hopo, mpakutulukwa pahi mpaka kuwee. Hilebhe yakangachika hiikateendeka kwaachinu handa hikatendeka konokwe ku chilambo cha ku Sodoma, chilambo hecho chikabhee mpaka leneni!

²⁴ Nambo nannobholela yakubhee, ipakubhee chindema muno kwachinu bhandu bha chilambo cha ku Sodoma kulaga mu lichobha lya kuhukumulwa kupeta mwenga!"

Nhikange kwaachangu Mpomolele

Aluka 10:21, 22

²⁵ Gono muda Ayesu bhakalobhola, "Ndendakunchukulu mwee Atati, Hangwana bha kunani kulihunde kwa Annoongo na chilambo, kwa kubhee ntekwaahiya hikubho heyo bhandu bhabhilinge na luunda na malango na mwenga ntekwahunukulila bhenibhala bhabhilinge handa bhaana bhachoko.

²⁶ Elo, Atati, henela nga chimpalite hibhokele."

²⁷ "Atati bhangu bhambekie hilebhe yoha. Bhaakwa bhakwamanya mwana ila Atati, na wala bhakwamanya Atati ila mwana, na bhoa bhala yakubhee bhapala kuhunukumulilwa na mwana."

²⁸ "Nhikange kwaachangu mwangota bhoa chintenda kuhabhukanga na kutopelwa na mihigo, na nenga mbakumpomoleanga.

²⁹ Ngoondange nenga, na nndumikilange nenga na nkachijigane kubhoka kwangu nenga, kwa kubhee nenga nga mundu bha kalipa na wala ngachipuna na mwangota mpakupomolelanga.

³⁰ Kwa kubhee majigano nganannyigananga mwangota nga gakulimba.”

12

Majigano nnani ja Lichobha lya Kupomolela

Amaluko 2:23-28; Aluka 6:1-5

¹ Gono muda, lichobha limo lya kupomolela Ayesu bhakibha bhatenda kupeta mu migonda ja ngaano. Penapo bhabhaajigana bhabhe bhakakola njala, na bhena angota bhakajemeka kukwachula maache na kupikicha mapemba na kutaunanga njelegwa jabhe.

² Mafalisayo pabhakalola genago, bhakaalobholela Ayesu, “Nnole! Bhabhaajigana bhinu bhatendanga chilebhe changapalikwa mu malagilo ga Lichobha lya Kupomolela.”

³ Ayesu bhakaajangula, “Bholi, mwangachoma chibhakatenda Adaudi na akaajabhe pabhakibha na njala?”

⁴ Akajingilanga mu Nyuumba ja Annoongo bhakalyee jenijela mikate jijikabhekwa nnongi ja Annoongo. Bhenabho na akaajabhe bhangapalikwa kulyee mikate hejo nambo akaakung’i jikajabhe.

⁵ Bholi, mwangachomanga mu Malagilo ga Amusa gagakalobhola kila Lichobha lya Kupomolela Akaakung’i bhagaalibiana Malagilo ga Lichobha lya Kupomolela mu Nyuumba ja Annoongo kwa kutenda gangapalikwa mu Lichobha lya Kupomolela, nambo ngaganikiwa kubhee bhatenda kulemwa?

⁶ Bahi, nannobholelanga yakubhee pambani pabhile na akolo kupunda Nyuumba ja Annoongo.

⁷ Handa nkahimanyite maana gakwe malobhe gangani, ‘Mbala kwabhonelanga kiha na ngabha mbeeko,’ nkahukumulinge hopo bhandu bhangalemwa.

⁸ Kwa kubhee Mwana bha Mundu nga bhabhatabhala mu Lichobha lya kupomolela.”

Ayesu bhaalamia amundu jwapolite lubhoko

Amaluko 3:1-6; Aluka 6:6-11

⁹ Ayesu bhakabhoka penapo, bhakajenda mu Nyuumba ja konganilananga Bhayahudi.

¹⁰ Monomwe akibha mundu jumo jwapolite lubhoko. Bahi bhandu bhakaakonya Ayesu, “Bholi, hipalikwa kunlamia mundu Lichobha lya Kupomolela?” Bhakaakonya henela kwaapala atangile bhatatange ndela ja kwaahukumula.

¹¹ Nambo Ayesu akaalobholela, “Tulobhole abhi mundu nkati jinu jwabhihile na ngondolo jwabhe atekujingila mu liembo, bholi, ngaakamula na kummoa kwa kubhee nga Lichobha lya Kupomolela?”

¹² Nambo mundu nga bhammbone kupunda ngondolo! Bahi, hipalikwa kutenda gammbone mu Lichobha lya Kupomolela.”

¹³ Ngapena Ayesu bhakaalobholela bhini bhala mundu, “Nnyulule lubhoko lwinu.”

Nga bhakagunyulula, lubhoko gukalama gukabhee gumomi handa gonigola gongi.

¹⁴ Bahi, Mafalisayo bhakabhoka panja, bhakabhekanga chikomiti chibhou chakupala kwaakoma Ayesu.

Antumichi bhabhaagulikwe na Annoongo

¹⁵ Nambo Ayesu pabhakajoa genigala bhakabhoka penipala. Bhandu bhajingi bhakaakagula nga bhakaalamia akaatamwa bhoha.

¹⁶ Bhakaakanikia bhakoto kwaalobholela bhandu hikubho yabhe.

¹⁷ Akatenda henela kupala genigala gagonalolikwe na Annoongo kwa ndela ja alondoi Aisaya gapate kukweela

¹⁸ “Nnole antumichi bhangu ndekunhagula, mpaliyon bhangu naampalite muno mu ntima gwangu.

Mbakujibheka mboomo jangu nnani jabhe,

na bhenabho bhapakutangacha hukumu jangu kwa bhandu bhanga Bhayahudi.

¹⁹ Bhapakubhee hopo na kutaukana wala kupota nyenye, na bhaakwa mundu bhabhapakujoha lilobhe lyabhe lipakujohanika hopo mu ndela.

²⁰ Nnai gugutekandaganika ngahengela, wala chibatali chichibhoa lyohi ngachiima,

mpaka pabhapakujitenda hukumu jammbone jitabhale.

²¹ Kwa lina lyabhe bhandu bhanga Bhayahudi bhapakuobhalela kwa bhenabho.”

*Ayesu na Abelizebuli**Amaluko 3:20-30; Aluka 11:14-23*

²² Penapo bhandu bhakaaletelela Ayesu mundu bhamo bhangelola na bhakangombola kulongela, kwa kubhee bhakibha bhatekuchukilwa na mahoka. Ayesu bhakaalamia penapo bhakakombola kulongela na kulola.

²³ Bhandu bhoo bhakakangachanga na kulobholanga, “Bholi, komboleka habha nga Mwana bha Adaudi?”

²⁴ Nambo Mafalisayo pabhakajoha genago, bhakalobhola, “Habha mundu bhatenda kugabhoo mahoka kwa machili bhabhagapatite kubhoka kwa akolo bha mahoka bhabhakemitwa Abelizebuli.”

²⁵ Ayesu bhakibha bhagamanya bhabhaganikia, bhakaalobholela, “Umwene goa gola gugumetunike kwa malubhalo gagapotana, ngakombola kutama machobha goa na chilambo choachela au akaalongo bhoabhala bhabhametunike malubhalo malubhalo gagatekukanangana, gapakugwee.

²⁶ Handa Lichetani lijomana na Lichetani lijakwe bhatenda kuchimetula bheene mu mabhoga mabhoga bheene. Bahi umwenye gwabhe gupakujema bholi?

²⁷ Mwangota ntenda kulobholanga nenga ndenda kugabhutua mahoka kwa machili ga Abelizebuli, bholi bhandu bhinu bhagabhenga mahoka kwa machili ga aganiki? Ligongo helyo bhenaangota nga bhapakunhukumulanga mwangota.

²⁸ Nambo handa nenga ndenda kugabhutua mahoka kwa machili ga Annoongo, bahi mmanyange yakubhee umwenye gwa Annoongo guikite kwaachinu.”

²⁹ “Bhaakwa mundu bhabhakombola kujingila mu nyuumba ja mundu jwaabhikile na machili na kwaapoka hilebhe yabhe, pangali kwaatabha oti jono mundu jwabhi na machili? Mpalikwa oti kwaatabha penapo nga pampakombola kwaapoka hilebhe yabhe.”

³⁰ “Mundu bhoo bhala bhangelondanika na nenga, bhanganana nenga, na bhoo bhala bhangelondanika pamo na nenga bhatenda kupwilingania.

³¹ Nangocheni nannobholelana, bhandu bhapakulekelwa mabhoo gabhenji na matukano gabhe goa, nambo bhandu ngalekelwa mabhoo gabhe ga kwaaponja Mboomo ja Annoongo.

³² Kabhele, bhabhapakulobhola lilobhe lya kwaakana Mwana bha Mundu bhabhapakulekelwa mabhoo gabhe, nambo bhenibhala bhabhapakulobhola lilobhe lya kunkana Mboomo Ja Annoongo ngalekelwa mabhoo gabhe, ngabha mu chenje chilambo au mu chilambo chichipakuhika.”

*Nkongo na matunda gabhe**Aluka 6:43-45*

³³ “Nkongo gwa kuhalala guogola matunda gakuhalala, na nkongo gwangammbone guhogola matunda gabhou. Nkongo gwamanyika kwa matunda gabhe gagabheleka.

³⁴ Mwangota nga mwangalimmbone handa majoka gagabhile na uchoongo! Mkombolanga bholi kulobhola hilebhe yammbone na kongo mmile akaabhou? Kwa kubhee amundu bhatenda kulobhola kubhokana na genigala gagabhile muntima gwabhe.

³⁵ Mundu bhakuhalala bhagapia gagabhile gakuhalala kubhoka muntima gwabhe, na amundu abhou bhapia hilebhe hibhou kubhoka muntima gwabhe.”

³⁶ “Bahi, ndendakunnobholelana, lichobha lya hukumu kila amundu bhapalikwa kulongela nnani ja kila lilobhe lyangammbone libhalongile.

³⁷ Kwa malobhe ginu mpakubhonekana mwangalimmbone, na kwa malobhe ginu mpakuhukumulwa kubhee bha kulemwa.”

*Kupala kuibhona yakangachika**Amaluko 8:11-12; Aluka 11:29-32*

³⁸ Kubhoka penapo bhabhajigana Malagilo ga Amusa na Mafalisayo bhakaalobholela Ayesu, “Bhannyigana, tupala kuibhona yakangachika kubhoka kwaachinu.”

³⁹ Nambo Ayesu bhakaajangula, “Chibhelei changaamanya Annoongo! Mpalanga hilolelo, nambo chibhelei heche ngapata hilolelo yoha yela nambo jeni jela hilolelo ya alondoi Ayona.

⁴⁰ Handa henela Ayona chibhakatama machobha gatatu muhi na kilo mulutumbo lwa hoomba, nga chiipakubhee kwa bhena Mwana bha Amundu chibhapakutama pahi ja undopi kwa machobha gatatu muhi na kilo.

⁴¹ Bhandu bha kubhoka chilambo cha ku Ninawi bhapakubhokela Lichobha lya Kuhukumulwa, na bhenaangota bhapakuchikopokea chenje chibhelei chichitekulemwite. Kwa kubhee bhandu bha chilambo cha ku Ninawi bhenaangota bhakalekanga gabhou gabhe ligongo lya kutangacha kwa Ayona, na pamba bhabhi akolongwa kupunda Ayona!

⁴² Haikege bha kuchini bhapakujema muda kwa chebhelei chenjeni pachipakuhumu-luwa, na bhenabho bhapakuchikupokea kwakubhee chilemwite. Kwa kubhehe bhenabho bhakajaula ulendo kubhoka kutali, bhakahika kugajohanikia malobhe ga malango ga Asolomoni, na pamba nangocheni bhabhile akolongwa kwaapunda Asolomoni.”

Kubhujia kwa lihoka

Aluka 11:24-26

⁴³ “Muuda lihoka palyabhoka amundu, lihoka lityanga tyanga panga machi bhabhiku-lolea amundu bha kwaajingila na bhangaapata.

⁴⁴ Penapo bhabhikuchilobholela, ‘Mbakubhujia ku nyumba jangu kumokite.’ Na bhen-abho pabhapakubhujia kujikolela jela nyumba jikibha janga chilebhe, jitekupyagilwa na kubhekwa maha,

⁴⁵ Ngapena bhajenda na kubhatola mahoka bhangi saba, bhabhilinge na machili kupunda bhenabho, na bhoa bhatenda kuhika na kwaajingila bhena amundu. Na bhena mundu bhabhee na abhou kupunda pena kandahi. Nga chiipakubhehe kwa habha bhandu akaabhou.”

Akaalongo na anyongo bha kweli bha Ayesu

Amaluko 3:31-35; Aluka 8:19-21

⁴⁶ Ayesu bhakibha tangu bhatendakulongela na nkutuli gwa bhandu muda gono anyongo mundu na akaanung'una bhabhe bhakahikanga kujema panja, bhakapalanga kulongela na bhenabho.

⁴⁷ Nnole, amundu bhamo bhakaalobholela Ayesu, “Anyongo bhinu na anung'una bhinu bhabhi panja, bhapala kulongela na mwenga.”

⁴⁸ Ayesu bhakaajangula bhena amundu, “Anyongo bhangu nga bheneki? Na anung'una bhangu nga bheneki?”

⁴⁹ Ngapena bhakagunyolola lubhoko lwabhe na kwaalangia bhabhaajigana bhabhe, bhakalobhola, “Habha nga anyongo bhangu na anung'una bhangu!”

⁵⁰ Kwa kubhehe bhoabhala bhabhatenda chibhapala Atati bhangu bhabhile kunani kulihunde kwa Annoongo, bhenabho nga anung'una bhangu na alombo bhandu na anyongo bhangu.”

13

Lijigano lya mundu bhabhapanda mbeju

Amaluko 4:1-9; Aluka 8:4-8

¹ Lichobha lyolyolyo, Ayesu bhakabhoka mu jeni jela nyumba, bhakajaula kutama nngulugulu mwa litanda.

² Nkutuli nkolongwa muno gwa bhandu gukaatindila mpaka Ayesu bhakakweela muntumbwi, bhakatama. Na popopo bhandu bhoa bhakajemanga kubhandikila na litanda.

³ Penapo Ayesu bhakaalobholela malobhe gajingi kwa kulengania.

“Nnyohanikiange mwangota! Kukibha na mundu jumo jwakajaula kupanda mbeju ku mgonda gwabhe.

⁴ Pabhatendita kumicha mbeju, yengi hikagwee pandela, hijuni hikaika na kumila mbeju.

⁵ Yengi hikagwee pamaganga pangali na undopi nnyingi. Hikabhonekana kumela kwa kujomboteka ligongo undopi gukibha nchoko.

⁶ Nambo lyobha palikajaka, mimela jikajoma kwa kubhehe mikega jakwe jikibha jangatibhila pahi muno.

⁷ Mbeju yengi hikagwela pamiibha, na jenejo jikajoma na kuchitabha tabha.

⁸ Yengi hikagwee papabhile na undopi gwakoondea mimela, na mimela hikahogola mbeju makomi komi yengi mbeju makomi chita na yengi makomi gatatu.”

⁹ Na Ayesu akajomolekea kulongela, “Bhabhakweti na machikilo gakujonikia na bhajo-hanike!”

Ligongo lya kujigana kwa kulenganikia

Amaluko 4:10-12; Aluka 8:9-10

¹⁰ Ngapena bhabhaajigana bhabhe bhakahikanga kwaachabhe na Ayesu, “Kwaniki mwenga nnongela na bhandu kwa kulenganikia?”

¹¹ Ayesu bhakaajangula, “Mwangota mpatitinge kuhimanya hikubho yangahunukulilwa ya Umwenye gwa kunani kulihunde kwa Annoongo, nambo bhenaangota bhangapatanga kuimanya hikubho heyo.

¹² Kwa kubhee amundu bhabhile na chilebhe bhapakujonjokewa, nambo bhanga chilebhe na hata chenecho chichoko chibhabhinacho bhapakupokonyolwa.

¹³ Nga kwa maana ndendakulongela na bhenaangota kwa kulengania, ligongo bhatendalola nambo ngabhona, bhatenda kujohanikia nambo ngajohanga, na wala ngahimanya.

¹⁴ Kwa bhenaangota gatekweela genigala gabhakalobhola alondoi Aisaya kubhee, 'Habha bhandu bhapakujoanikia na kujohanikia, nambo ngaimanya Bhapakulolanga na kukulola, nambo ngalolanga.

¹⁵ Kwa kubehehe habha ngakombola kuimanya kwa kupepeka, ngajoha kupetela machikilo gabhenji, na bhakanitinge kukola ukweli.

Handa hopo bhakalolite kupetela miho gabhenji, na kupetela machikilo gabhe, bhakaimanyite kwa luunda lwabhe lwabhenji, na kundende bhukia, bhalobhola Hangwana, na nenga mbakwaalamia.' "

¹⁶ "Nambo nhachukange mwangota, kwa kubhee miho ginunji gatendakulola na machikilo ginu gatendakujohanikia.

¹⁷ Ndendakunnobholelanga kweli, alondoi na bhandu bhajingi bhammbone bhakapalanga kugalola genigala gamugalola bhangagalola, na kugajoha genigala gamugajohanga, na bhakoto kugajoha."

Ayesu bhaatambula ngani ja kulengania kwa amundu bhabhapanda mbeju

Amaluko 4:13-20; Aluka 8:11-15

¹⁸ "Bahi, mwangota nnyohanikiange maana ja kulengania kwa bhabhapanda mbeju.

¹⁹ Amundu bhabhajoha lilobhe nnani ja Umwenye gwa Annoongo pangali kuhimanya, nga handa jenijela mbeju hihikagwee kubhandikila nndela, na Abohu bhahika kuukula chichipanditwe muntima gwa amundu habho.

²⁰ Jenijela mbeju jijipanditwe pahi ja mwala handa amundu bhabhajoha lilobhe lya Annoogo na kulipokela kwa kuhangalala.

²¹ Nambo kwa kubhee Lilobhe lya Annoongo ngajiingila nkati ja mitima jabhenji. Lyela lilobhe lipakutama kwa muda nchoko tu. Ngapena muda gwa kulaga na kupotekwa hihipakubhokela ligongo lya lilobhe helyo, bhenabho bhalekanga kuhobhalela.

²² Jenijela mbeju jijikagwee pakati ya mikongo ja miibha, nga handa amundu bhabhajoha lilobhe helyo, na lipamba lya umomi hogo na kupala kubhee na hilebhe hijingi ya pachilambo pani kuliminyaminyanya lilobhe helyo lilipandikwe nkati jinu, ngakombola kutenda gabhapala Annoongo.

²³ Jenijela mbeju jijipanditwe mu undopi gwammbone nga handa munda jwaajoha lilobhe na kulimanya, na bhenabho bhatenda gabhapala Annoongo na hipakubhee handa mbeju, jimo makomi komi, jengi makomi sita na jengi makomi gatatu."

Kulengania kwa maheya

²⁴ Ayesu bhakaalobholela bhandu kulengania kongi, "Umwenye gwa kunani kwa Annoongo gutenda kalandana na munda jwaapandite mbeju jammbone mu ng'onda gwabhe.

²⁵ Nambo kilo bhandu pabhakagolola lugono, apwati bhabhe bhakahika, na bhapandikia maheya pakati ja nakaponga, na bhakajaula.

²⁶ Bahi, mbeju pajikamela na kujemeka kutumbuka, maheya kabhele gakajemeka gutumbuka.

²⁷ Akaatumichi bha akola nng'onda bhakaajabhulila, bhakaalobholela, 'Hangwana, tweenga tupandite mbeju jammbone mu nng'onda gwinu. Bholi maheya gagabhile gabhoka koji?'

²⁸ Bhenabho bhakaajangula, 'Apwati nga bhatendite henela.' Bhenibhala akaatumichi bhakapundanga kwaakonyanga, 'Bholi, mpala tujende tukagatupule?'

²⁹ Na jonojwe akaajangula, 'Ngabha, nkokugatupula, kwa kubhee pampakutupulanga maheya hago nkombola kutupula pamo na ngaano.

³⁰ Nnekange ngaano na maheya gakole pamo mpaka machobha ga kuhuna. Gena machobha mbakwaalobholela bhakuuna, bhakondanike oti maheya bhagatabhe tabhe makendeka na kujochwa mooto. Nambo ngaano muihunange nkajibhekange mu ngokwe jangu.' "

Kulengania na mbeju ja haladali

Amaluko 4:30-32; Aluka 13:18-19

³¹ Ayesu bhakaalobholelanga bhandu kulandanikia kongi, "Umwenye gwa kuani kuli-hunde kwa Annoongo gulandanika na mbeju njoko jijikemwa haladali, yakubhehe amundu bhamo bhakaipetula na bhakapanda mu nng'onda gwabhe.

³² Jene mbeju nga njoko njoko muno kupeta mbeju yoa, nambo jimelite hubhehe ngolongwa kupeta mimela joha. Kola na kubhee nkongo nkolongwa na hijuni ya kunani bhatendakuhikanga na kuchenga hiyua mu matepo gabhe.”

Kulengenikia na ngedule

Aluka 13:20, 21

³³ Ayesu bhakaalobholela kulandanikia kongi, “Umwenye gwa kunani kulihunde kwa Annoongo gutekulandanika henela. Mwikiye bhapetula ngedule na kujihangalanga mu madebe gabhele ga ukobha gwa ngaano na ukobha goa gutendakutupuka.”

Ayesu bhatendakujigana kwa kulandanikia

Amaluko 4:33-34

³⁴ Ayesu bhakaatambulila bhandu genago goa kwa kulandanikia. Bhangaalobholela choachela pangali kulandanikia.

³⁵ Gangani gagateenda ili genigala gagakalobholelwa na alondoi gakweele, “Mbakulongela na bhenaangota kwa kulandanikia.

Mbakugapiya gangamanyikana kubhoka kuhalakiwa kwa chilambo.”

Ayesu bhatendakuatambula nnani ja kulandanikia kwa nakaponga

³⁶ Ngapena Ayesu bhakaatabhuka bhenibhala bhandu, bhakajingila mu nyuumba. Bhabhaajigana bhabhe bhakaajendelela, bhakaalobholela, “Ntuatambulile kono kulandanikia kwa nakaponga kumigonda.”

³⁷ Ayesu bhakaalobholela, “Amundu bhabhapandite mbeju jammbone mu nng’onda nga Mwana bha Amundu.

³⁸ Nng’onda gola nga chilambo, mbeju jammbone nga bhenibhala bhandu yakubhee Umwenye nga gwabhenji. Nambo yenyela nakaponga nga bhenibhala bhandu bha bhenibhala Abohu.

³⁹ Akaapwati bhabhapandite genigala maheya nga Abohu. Mahuno nga kupela kwa chilambo na bhabhaunanga nga akaatumichi bha Annoongo bha kunani kulihunde kwa Annoongo.

⁴⁰ Handa chiibhile yenyela nakaponga pagalondanikwa pamo na kujochwa mooto, nga chiipakubhee lichobha lya kupela chilambo,

⁴¹ Mwana bha Amundu bhapakwaatuma akaatumichi bha kunani kulihunde kwa Annoongo bhabhalondanike kubhoka mu Umwenye gwabhe bhenibhala bhoja bhabhajambukia bhandu bhatendange mabohu, na bhoja bhabhatendite hilebhe hibohu,

⁴² na kwa kwaajeanga mu mooto gwa kalipa gwangahimaka machobha goha na konokwe bhapakugutanga na kuyaga mino.

⁴³ Ngapena, bhenibhala bhandu bhammbone bhapakung’anyima handa lyobha mu Umwenye gwa Atati bhabhe. Henela bhabhakweti na machikilo ga kujahonikia na bhajohanikie!”

Kulandanikia chilebhe cha bei ngolongwa chichiitwe

⁴⁴ “Umwenye gwa kunani kulihunde kwa Annoongo gulandana na hilebhe cha bei ngolongwa chichiitwe kumigonda. Amundu bhamo bhakachibhona, na bhakahiya kabhele. Ngabhakaachuka muno muntima na bhakaula kuucha hilebhe yabhe yoa hibhakibha nayo, na bhakajaula kuguemela nng’onda gola.”

Chilebhe cha bei ngolongwa chichikemwa lulu

⁴⁵ “Kabhele, Umwenye gwa kunani kulihunde gulandanika na amundu bhamo bhabhatendita kulolea lulu jakuhalala.

⁴⁶ Pabhakapata lulu jimo ja bei ngolongwa, bhakajenda kuucha hilebhe yoa yakibha nayo, bhakahemela lulu jela.”

Lijogano kwa lipелеle lya koka homba

⁴⁷ “Kabhele, Umwenye gwa kunani kulihunde kwa Annoongo gukalandanika na lipелеle lilikachubhikwa mu bahali, likatangia homba yengi yengi.

⁴⁸ Lipелеle palikatweelela, bhandu bhakaliuta panja pajomo, bhakatama, bhakaagulangana homba yammbone na kubhabhekanga nkati ja mapakacha gabhe, na bhangammbone bhakailekelanga.

⁴⁹ Nga chiipakubhee machobha ga kupela, akaatumichi bha Annoongo bha kunani kulihunde kwa Annoongo bhapakupitila, bhapakubhalangana bhandu akaabohu na bhandu bhammbone,

⁵⁰ na kwaajeanga bhenabho akaabohu mu mooto gwa kalipa gwangahimika machobha goha. Konokwe bhapakuguta na kuyaga mino.”

Majigano gayono na ga lolo

⁵¹ Ayesu bhakaakonya, “Bholi, haga ganannyigine mgamanyite haga goa?”

Bhakajangula, “Eloo, tugamanyi.”

⁵² Na bhenabho bhakaalobholelanga, “Henela, kila bhabhajigana malagilo ga Amusa bhabhabhee bhabhaajigana bha Umwenye gwa kunani kulihunde bhalandana na akola nyuumba bhabhapiya hilebhe hiyono na ya lolu.”

Ayesu bhakanikwa kono kuchilambo cha ku Nazaleti

Amaluko 6:1-6; Aluka 4:16-30

⁵³ Ayesu pabhakajomola kulobhola kulandanikia hoko bhakabhoka penapo,

⁵⁴ pabhakahika mu chilambo chabhe. Konokwe bhatendita kwaajigana bhandu mu nyumba ja konganilana Bhayahudi mpaka bhakakangachanga, bhakachilobholela, “Habha bhatipite koji malango haga? Na bhatipite koji machili gakutenda gakangachika?”

⁵⁵ Hojo mwana nga jonijola apundi chelemala? Bholi, anyongo bhabhe ngati Amalia, na akaapwanga mundu ngati angota Ayakobo na Ayusufu na Asimoni na Ayuda?

⁵⁶ Bholi, akaalombo mundu nga bhoa bhabhabhilinge pambani na tweenga twabhoa? Bahi, bhatipite koji haga goa?”

⁵⁷ Henela bhakaakana.

Nambo Ayesu bhakaalobholelanga, “Alondohi bhatopewa koakoa ila ngakondekwa kwaachakwe na kwa bhandu bhakwe!”

⁵⁸ Henela, bhangatenda yakangachika hijingi penipala ligongo lya kwangahobholela kwabhe.

14

Malilo ga Ayohana Ambatichaji

Amaluko 6:14-29; Aluka 9:7-9

¹ Machobha gala, Ahelode bhabhakibha atabhala bha chilambo cha ku Galilaya, bhakajoha ngani yoa hibhakaipangana Ayesu.

² Bahi, bhakaalobholela akaatumichi bhabhe, “Habha amundu nga Ayohana Ambatichaji bhabhatekuyoka, nga maana machili gakangachika gatenda lihengo nkati jabhe”

³ Ahelode nga bhabhakaakamula Ayohana na kwaatabha mu nyuumba ja kwaatabhila bhandu, ligongo lya Ahelodia, bhabhakibha hanu bha Afilipo, anung’una bhabhe Ahelode.

⁴ Ligongo mala hijingi Ayohana bhatendita kwaalobholela Ahelode kubhee, “Ngapaa-likwa mwenga kuntola haikege hojo kubhehe hanu bhinu!”

⁵ Ahelode bhakapala kwaakoma Ayohana, nambo bhakajogopa bhandu ligongo bhakaalobholelanga kubhee Ayohana nga alondohi bha Annoongo.

⁶ Palikahika lichobha lya kuhangalala lya kubheleka kwa Ahelode, mwana bha Ahelodia bhakahina nnoongi ja akaageni. Ahelodia bhakaachuka muntima gwabhe,

⁷ mpaka Ahelode bhakalapila kwaapekeke jono mwali choachela chibhapakwajopa.

⁸ Na kongo bhabhi kulobholelwa na anyongo bhabhe, bhakajopa, “Mbekee pambani mutwe gwa Ayohana Ambatichaji muchipalo.”

⁹ Amwenye Ahelode bhakaechuka, nambo ligongo lya konikola kulapila kwabhe nnoongi ja akaageni bhakakulumikia bhapate.

¹⁰ Bahi, Ahelode bhakaatuma linyemba bhajende mu nyuumba ja kutabhila bhandu bhakahekete mutwe Ayohana.

¹¹ Mutwe gwabhe gukaletwa muchipalo, bhakaapekeke bhenibhala haikege, na bhenabho bhakaapelekela anyongo bhabhe.

¹² Bhabhaajigana Ayohana bhakahika, bhakagutola malilo ga Ayohana, bhakajenda kuguchika. Ngapena bhakajaula kwaapelekela ngani Ayesu.

Ayesu bhaapekeke chakulya bhandu elupu nhano

Amaluko 6:30-44; Aluka 9:10-17; Ayohana 6:1-14

¹³ Ayesu pabhakajoha genago, bhakabhoka penapo kwa ntumbwi bhakajenda panga bhandu ili bhabhee jika jabhe. Nambo bhandu pabhakapata ngani hejo, bhakaakagula kwa makongono kubhoka mu hilambo hijingi.

¹⁴ Ayesu pabhakahika kuntundu ja litanda, bhakalibhona lilubhalo likolongwa lya bhandu bhakaakolela kiha na bhakaalamia akaatamwa bhabhe.

¹⁵ Pajikahika kimuho, bhabhachijigana bhabhe bhakaajendelela na kwaalobholela, “Pamba palulemba, na lyobha litekutipika, mwalekange bhandu bhajaulange mu hilambo yabhenji bhakaemelange chakulya bhalyangange.”

¹⁶ Ayesu bhakaalobholelanga, “Ngabha mpaka bhajaulange, mwangota mwapekee chakulya.”

¹⁷ Nambo bhenaangota bhakaalobholela, “Tukweti mikate nhano na homba bhabhele.”

¹⁸ Ayesu bhakaalobholelanga, “Nnetelange pambani.”

¹⁹ Bhakaalobholela bhandu bhatamange mu manyai. Ngapena Ayesu bhakajitola jela mikate nhano na bhenibhala homba bhabhele, bhakalola kunani kulihunde kwa Annoongo, bhakaajopa Annoongo. Penapo bhakahimetula jenijela mikate bhakaapekea bhabhaajigana ili na bhenaangota bhabhapekee bhandu.

²⁰ Bhandu bhoo bhakalyee na kujukuta. Kubhoka penapo bhabhachijigana nga bhakalokota mbakatika hihikagalila, bhakatweelela hikapo komi na jibhele.

²¹ Bhandu bhabhakalyee bhakibha akanalome elupu nhano, pangali kubhalangala haikege na bhaana.

Ayesu bhajenda nnani ja machi

Amaluko 6:45-52; Ayohana 6:15-21

²² Popopo, Ayesu akaalobholela bhabhaajigana bhabhe bhajingilange muntumbwi bhalongolele kujaula kuntundu ja litanda, gono muda bhenabho Ayesu bhatenda kugatabhuka malubhalo ga bhandu.

²³ Ayesu pabhakajomola kwaatabhuka bhandu, bhakakwela palitombi kwaajopa Annoongo, bhakibha konokwe jikajabhe mpaka lubhendu palikahika,

²⁴ na gono muda gonigola ntumbwi gukahika kubhandikila pakati ja litanda, nambo ntumbwi gukapukunya pukunya na mboongo.

²⁵ Kilo, kubhandikila na kuchee, Ayesu bhakaajendelela bhabhaajigana bhabhi kujenda panani ja machi.

²⁶ Bhabhaajigana bhabhe pabhakalola bhabhi kujenda panani ja machi bhakajogopa muno, bhakalobhola, "Nga liimwi!" Bhakapotanga nyenye kwa kujogopa.

²⁷ Nambo Ayesu akaalobholelanga, "Nkoto kujogopanga, ntokokange, nga nenga!"

²⁸ Apetulo bhakaalobholela, "Hangwana, handa nga mwenga kweli, nnobholele nenga nihike panani ja machi konokwe kummile."

²⁹ Ayesu bhakaalobholela, "Bahi nhike" Bahi Apetulo bhakatuluka kubhoka mu gonigola ntumbwi, akajenda panani ja machi, kwaakagula Ayesu.

³⁰ Apetulo pabhakabhona jenijela mboongo, bhakajogopa, bhakajemeka kutibhila, bhakaguta kwa lilobhe likolongwa, "Hangwana, nnjobhole!"

³¹ Penapo, Ayesu bhakagunyulula lubhoko lwabhe, bhakaakamula na kwaalobholela, "Mwe mmi na kuhobhalela kachoko! Kwaniki mkibha na lipamba?"

³² Ngapena bhakajingila muntumbwi, na mboongo jikakotoka.

³³ Bhabhaajigana bhoo bhabhakibha nkati ja ntumbwi nga bhakatindibhala majugwa na kwaakotimia Ayesu, bhakalobhala, "Kweli mwenga nga Mwana bha Annoongo."

Ayesu bhaalamia akaatamwa kuchilambo cha ku Genesaleti

Amaluko 6:53-56

³⁴ Bhakajomboka litanda, bhakahika kuchilambo cha ku Genesaleti.

³⁵ Bhandu bha konokwe pabhakaamanya bhabhatenda yeneyo nga Ayesu. Bhakajijenean ngani yoa mu hilambo yakubhandikila. Bhandu bhakaaletele Ayesu akaatamwa bhoo,

³⁶ bhakaajopa akaatamwa bhalebhatange mbiindo lwa ngobho jabhe, na penapo bhoo bhabhakalebhata bhakalama.

15

Majigano kubhoka kwa akahokolo

Amaluko 7:1-13

¹ Penapo Mafalisayo teno na bhabhajigana Malagilo ga Amusa nga bhakahika kubhoka kuchilambo cha ku Yelusalemu, bhakaajendelela Ayesu, bhakaakonya,

² "Kwaniki bhabhaajigana bhinu ngapokelanga malagilo gatupookile kubhoka kwa akaahokolo bhitu? Ngakuanga mpaka pachindindili handa chiipalikwa pabhapala kulyee chakulya!"

³ Ayesu bhakaajangula, "Kwaniki mwangota ngakagulanga Malagilo ga Annoongo nambo kugapala majigano ginu mwaachina bhene?"

⁴ Annoongo bhalobhola, 'Mwaatopee atati na anyongo bhinu,' na bhoo bhala bhaatukana atati bhabhe au anyongo bhabhe, bhapalikwa bhakomekwe.

⁵ Nambo mwangota mwajigana handa munda akweti chilebhe choachela chibhakombola kwaajangatila atati bhabhe au anyongo bhabhe, nambo bhakalobhola, 'Chilebhe chenje ndekwaabhokea Annoongo,'

⁶ mwangota ntenda kujigana bhena munda, ngapalikwa kwaatopee atati bhabhe na anyongo bhabhe! Henela, nga chintendakubhelua lilobhe lya Annoongo kwa kugakagula majigano ginu mwachina bhene.

⁷ Mwe andendemundu! Alondoi Aisaya pabhakalobhola nnani jinu,

⁸ ‘Annoongo bhalobhola, habha bhandu bhandopeanga nenga kwa malobhe jika jabhe, nambo mumitima jabhenji jibhile kutali na nenga.

⁹ Kukotimia kwabhenji kwanga maana, kwa kubhee hilebhe bhabhajigana nga malagilo ga bhandu tu.’ ”

Hilebhe hiyaatenda amundu bhakanikwe mu kwaakotimia Annoongo

Amaluko 7:14-23

¹⁰ Ayesu bhakagukema gonigola nkutuli gwa bhandu, bhakaalobholelanga, “Nnyoanikiange, na nhelewange!

¹¹ Chilebhe chichaatenda mundu bhakotokondekwa mu kwaakotimia Annoongo, nambo chenichela chichibhoka nkang’wa. Hecho nga chichaatenda mundu bhakotokondekwa mu kwaakotimia Annoongo.”

¹² Ngapena bhabhaajigana bhakaajendelela, na kwaakonya, “Bholi, mwe mmayite kubhee Mafalisayo bhakachimwanga, pabhakajohanga genigala malobhe ginu?”

¹³ Nambo Ayesu bhakaajangula, “Kila chilebhe changapandwa na Atati bhangu bha kunani kulihunde kwa Annoongo chipakutupulikwa.

¹⁴ Nkotokwajogopanga bhandu habho! Bhenaangota ngalola, na handa bhangelola bhaatandie bhangelola ajabhe, bhoa bhabhele bhapakujingilanga muliembo.”

¹⁵ Apetulo bhakalobhola, “Ntuatambulile kono kulengania kubhile na maana niki.”

¹⁶ Ayesu bhakalobhola, “Na mwangota, ngamanyanga?

¹⁷ Bholi, ngamanyanga kubhee kila chichijingila pakang’wa chijenda mulutumbo na kubhoka panja kuliinda?

¹⁸ Nambo hilebhe hihibhoka pakang’wa hibhoka muntima, na genago nga gagalekelela mundu mu kanikwa mu kwaakotimia Annoongo.

¹⁹ Kwa kubhee nkati ja ntima gabhoka maganikilo gabhou, ga koma, ga ngongola, ga uloloi, ga kujibha, ga kopokea hilebhe ya unani na maligo.

²⁰ Genago nga gagaatenda mundu bhakanikwe mu kwaakotimia Annoongo. Nambo kulyee chakulya pangali kuha mabhoko ngaalekela mundu mu kukanikwa mu kwaakotimia Annoongo.”

Kuhobhalela kwa haikege bhamo

Amaluko 7:24-30

²¹ Ayesu bhakabhoka penapo bhakajenda kutama ku hiambo ya ku Tilo na ku Sidoni.

²² Bahi, haikege bhamo bhabhakibha bhatama konokwe yakubhee bhangaabhee Anyahudi bhakaahikila Ayesu, bhakajomboha lilobhe, “Hangwana, mwana bha Adaadi, ngolee kia! Amwali bhangu bhatendakuchukilwa na mahoka na atenda kwaalagia muno.”

²³ Nambo, Ayesu bhangaajangula lilobhe lyoalyela. Bahi, bhabhaajigana bhabhe bhakaajendelela, na kwaalobholela, “Mwaalobholele bhajaule kwaachabhe kwa kubhee bhatenda kutukagula kongo bhabhikulekela nyenye.”

²⁴ Ayesu bhakajangula, “Nenga ndumitwe ligongo lya bhandu bha kuchilambo cha ku Isilaeli bhabhahobhite handa ngondolo bhabhahobhitinge.”

²⁵ Penapo bhenabho haikege bhakahika na kwaakotimia, bhakalobhola, “Choonde Hangwana, nyangatile,”

²⁶ Ayesu bhakaajangula, “Ngabha yammbone kutola chakulya cha bhaana kuilekela hiimbwa.”

²⁷ Bhenabho haikege bhakaajangula, “Kweli, Hangwana, nambo hiimbwa bhatenda kulyee mbakatika hiitekugwee kubhoka pamecha ja Hangwana bhabhe.”

²⁸ Penapo Ayesu bhakajangula, “Haikege, kuhobhalela kwinu nga kukolongwa muno, bahi ibhehe kwaachinu handa chimpala.” Popopo amwali bhabhe bhakalama.

Ayesu bhatenda kwaalamia bhandu bhajingi

²⁹ Ayesu bhakabhoka penapo na kujenda kuntundu ja litanda lya ku Galilaya, bhakakwela palitombi, bhatatama pahi konokwe.

³⁰ Bhandu bhajingi bhakaahikila, bhakaapelekela bhandu bhabhalemile, bhangelola, anangwabha, bhangelola na bhangi bhajingi bhabhakibha akaatamwa, bhakabhabhekanga nnoongi ja makongono gabhe, penapo Ayesu bhakaalamia.

³¹ Lyenilyela lilubhalo lya bhandu likakangachanga muno pabhakalola, bhangelongela, bhatenda kulongela, bhabhakibha bhabhalemile bhamite, anangwabha bhatenda kujenda, na bhangelola bhatenda kulola, bhandu bhakaalumbalila Annoongo bha ku Isilaeli.

Ayesu bhaapekea chakulya bhandu elupu ncheche

Amaluko 8:1-10

³² Ayesu bhakaakemanga bhabhaajigana bhabhe, bhakaalobholela, “Ndendakwaakolekea kiha bhandu habha kwa kubhee bhatamitinge na nanenga kwa machobha

gatatu, nangocheni bhanga chakulya chichiigalile. Nanenga ngapala kwaalekanga bhajaulange kwaachabhe pangali kulyee, bhakoto kuindukanga ndela.”

³³ Bhabhaajigana bhabhe bhakaalobholela, “Pamba tubhile palulemba, tupakupata koji chakulya cha kwaaliyanga habha bhandu bhajingi henela?”

³⁴ Ayesu bhakaakonya, “Mmilinge na mikate jilengwa?”

Bhakaajangula, “Chaba na matobhi kachoko.”

³⁵ Bahi, Ayesu bhakaakulumikia bhandu bhatamange pahi.

³⁶ Ngapena bhakatola jenijela mikate chaba na yenyela homba hibhele, na bhenabho bhakaachukulu Annoongo, bhakahimetula na kwaapekea bhabhaajigana bhabhe, na bhenaangota bhakaapekea bhenibhala bhandu.

³⁷ Bhandu bhoa bhakalyee na kujukuta. Ngapena bhabhaajigana bhakalokota mbakatika hiikahigalila, bhakatwelelanga hijaluba saba.

³⁸ Bhenabho bhabhakalyee bhakibha akanalome elupu ncheche, pangali kubhalangana akaahikege na bhaana.

³⁹ Ngapena Ayesu bhakaatabhukanga bhandu bhajingi bhakakwela muntumbwi, bhakajenda kuchilambo cha ku Magadani.

16

Bhandu bhapalanga yakangachika

Amaluko 8:11-13; Aluka 12:54-56

¹ Mafalisayo na Masadukayo bhakaajendelela Ayesu, na kwaalengela, na kwaajopa bhaalangiange yakangachika kubhoka kunani kulihunde kwa Annoongo.

² Nambo Ayesu bhakajangula, “Handa jiikite kimuho mwangota nnobholanga, ‘Malabhi kupakubhee kwammbone ligongo kunani kumaunde nga kukele!’

³ Na mwangota pajiika kundabhi nnobholanga, ‘Leleni ula jipakoma, ligongo kunani kulihunde nga kukele na kutekubhee na mahunde.’ Mwangota mmanyanga muno kugalambuka namuna mahunde chigabhonekana, nambo ngakombolanga kugalambua hikubho hiibhokela nangocheni gabhii na maana niki.

⁴ Bhandu bha nangocheni yakubhee nga akaabohu na bhangaamimika! Bhapalanga bhaibhone yakangachika, nambo ngaipatanga yakangachika yoayela nambo yenyela yakangachika ya Ayona.”

Bahi, Ayesu bhakaalekanga, bhakajaula kwaachabhe.

Ngedule ya Bhafalisayo na Bhasadukayo

Amaluko 8:14-21

⁵ Bhabhaajigana bhabhe pabhakajomboka kuntundu ja litanda, bhakahimanyanga kubhee bhatekulibhalila kupetula mikate.

⁶ Ayesu bhakaalobholela, “Mmangange miho na nchilolekeange nnani ja ngedule ja Mafalisayo na Masadukayo!”

⁷ Popopo bhakajemekanga kulobholelana akaachinabhene, “Bhalobhola genago ligongo twangapetula mikate.”

⁸ Ayesu bhakagamanya chibhakataukananga, henela bhakaalobholelanga, “Mwangota bhamilinge na kuhobhalela kuchoko! Mbona ntenda kutaukana nnani ja kutopetula mikate?”

⁹ Bholi, tangu mwangahimanya? Ngakombokelanga panakajimetula jeni jela mikate nhano jinakaaliya bhandu elupu nhano? Bholi, nkatwelelanga hijaluba hilengwa ja mbakatika hiikahigala?

¹⁰ Na jenijela mikate saba jijikaaliyanga bhandu elupu ncheche? Bholi, nkakumbanga hijaluba hilengwa ja mbakatika hiikahigalila?

¹¹ Bholi, ngamanyanga kubhee nangalongela nnani ja mikate? Ntamange maha na ngedule ga Mafalisayo na Masadukayo!”

¹² Penapo bhabhaajigana bhakahimanya kubhee bhakaalobholelanga bhatamange maha, ngabha na ngedule ja kuhalakia mikate, nambo nga majigano ga Mafalisayo na Masadukayo.

Apetulo bhalobhola kubhee Ayesu nga Mwana bha Annoongo

Amaluko 8:27-30; Aluka 9:18-21

¹³ Ayesu pabhakahika kuchilambo cha ku Kaisalia Filipi, bhakaakonya bhabhaajina bhabhe, “Bhandu bhalobhola Mwana bha Mundu nga aganiki?”

¹⁴ Bhakaajangula, “Bhangi bhalobhola kubhee nga Ayohana Ambatichaji, bhangi Aelia, na bhangi bhalobhola Ayelema, au bhamo bha Akaalondoi.”

¹⁵ Ayesu bhakaakonyanga, “Bholi, na mwangota mwalobholanga nenga nga aganiki?”

¹⁶ Asimoni jwakemitwa Apetulo bhakaajangula, “Mwenga nga Akilisito Bhabhaokoa Mwana bha Annoongo bhabhile bhamomi.”

¹⁷ Nabhena Ayesu bhakalobhola, “Npakuwachuka mwenga Asimoni mwana bha Ayona, kwa kubhee ngabha mwenga na ngabha mundu bhoabhala bhabhanhunukulile ngani heje, nambo nga Atati bhangu bhabhabhile kunani kulihunde kwa Annoongo.”

¹⁸ Na nenga ndendakunnobholela, mwenga nga Apetulo, mwenga nga luhala na panani ja luhala holo mbakulichenga lilubhalo lya bhandu bhabhaahobhalela Akilisito na wala machili ga malilo ngakooombola kulichinda.

¹⁹ Mbakumpekea chijogolelo cha Umwenye gwa kunani kwa Annoongo, choachela chimpakutabha pachilambo, chipakutabhwikwa na kunani kwa Annoongo, na choachela chimpakujogola pachilambo, chipakujogolekwa na kunani kwa Annoongo.”

²⁰ Ngapena bhakaakanikianga bhabhaajigana bhabhe bhakoto kwaalobholela mundu bhoabhala kubhee bhenabho nga Akilisto.

Ayesu bhalondola nnani ja kulaga, kujomoka na kuyoka kwabhe

Amaluko 8:31-9:1; Aluka 9:22-27

²¹ Kubhokela gono muda Ayesu bhakajemeka kwaalobholela bhabhaajigana bhabhe pangali kuhiya kubhee, “Hipalikwa tujende kuchilambo cha ku Yelusalemu na konokwe bhapakupotekwa muno kubhoka kwa akanahota, akaakung’i akolo, na bhabhajigana Malagilo ga Amusa. Na bhenabho bhapakomekwa nambo lichobha lya tatu bha-pakuyoka.”

²² Penapo Apetulo akaatola nnyenje, bhakajemeka kwaakalipila, “Jikoto kubhee henela Hangwana! Ngani hejo ngankolela mwenga!”

²³ Nambo Ayesu bhakaatendebhukia na kwaalobholela Apetulo, “Mmoke nnongi jangu nenga, Lichetani! Mwenga ntenda kunhibhila mu ndela jangu. Kuganikia kwinu ngabha ga Annoongo, nambo nga ga bhandu!”

²⁴ Ngapena Ayesu bhakaalobholela bhabhaajigana bhabhe, “Mundu bhoabhala handa bhapala kubhee bhabhaajigana bhangu, ipaalikwa bhachikane oti bhene, bhagupetule nchalaba gwabhe, ngapena bhangagule.

²⁵ Kwa kubhee mundu bhoabhala bhabhapala kugaokoa umomi gwabhe bheene, bhapakuguhobhea, nambo mundu bhabhapakugubhoa umomi gwabhe ligongo lyangu nenga, bhapakugupata.

²⁶ Bholi, mundu bhapakupata chiniki handa bhapakupata hilebhe yoa ya pachilambo kongo bhabhoite umomi gwabhe? Chakwa choachela! Ngakombola kupata chilebhe choachela cha kombolea kubhujia umomi gwinu.

²⁷ Kwa kubhee Mwana bha Mundu bhapakuhika mu ng’anyimo na Umwenye gwa Atati bhangu pamo na akaatumichi bha kunani kwa Annoongo, penapo nga pabhapakwaalepa kila mundu ngwahupa jabhe kubhokela na hikubho yabhenji.

²⁸ Nannobholelanga kweli, bhabhile bhandu bhangi panipani pachilambo ngajomokanga, tangu ja kwaabhona Mwana bha Mundu bhabhi kuhika mu umwenye gwabhe.”

17

Ayesu bhatendebhuka pamiho

Amaluko 9:2-13; Aluka 9:8-36

¹ Pagakajomoka machobha sita, Ayesu bhakaatola Apetulo na Ayakobo na Ayohana, anung’una bhabhe, bhakajenda nabho mpaka palitombi litandamao, na bhakatamanga konokwe jikajabhenji.

² Pabhakibhanga konokwe, Ayesu bhakatendebhuka kumiho kwabhe nnoongi jabhe. Kumiho kwabhe kukamulikila handa liobha na ngobho yabhe hikibha hiyuu kuu na kung’anyima.

³ Konokwe bhakabhokela Amusa na Aelia, bhakalongela nabho Ayesu.

⁴ Penapo Apetulo bhakaalobholela Ayesu, “Hangwana, nga yammbone twenga kubhee pambani! Handa mpalite mbakuchenga hilendo hitatu, chimo chinu mwenga, na chimo cha Amusa na chimo cha Aelia.”

⁵ Apetulo pabhakibha tangu bhalongela henela, lihunde lihuu likaawekela, na lilobhe lya Annoongo likajohanika kubhoka mu helyo lihunde, “Habha nga mwana jwangu junampala, ndekubhajilwa nabho.”

⁶ Bhabhaajigana pabhakajoha lilobhe helyo, bhakagwee manguku, bhakajogopa muno.

⁷ Ayesu bhakajabhulila, bhakaakwaanga, bhakaalobholela, “Nnyemange, nkotokujogopanga!”

⁸ Pabhakalola bhangaabhona amundu, nambo bhakibha Ayesu jika jabhe.

⁹ Pabhakatulukanga palitombi, Ayesu bhakaalobholela, “Nkotokwaalobholelanga bhandu hilebhe muibhonitenge mpaka Mwana bha Mundu pabhapakuyoka.”

¹⁰ Bhenibhala bhabhaajigana bhakaakonya Ayesu, “Kwaniki bhabhajigana Malagilo ga Amusa bhalobhola kubhee, Aelia bhapakuhika oti?”

¹¹ Ayesu bhakaajangula, “Kweli, Aelia bhapakuhika oti, bhapakuhika kubheka hilebhe yoa maha.

¹² Nambo ndendakunnobholelanga, Aelia bhahikite na bhenaangota bhangaamanya, nambo bhakaatendelela hilebhe yoa handa chibhakapalanga. Amwana bha Amundu bhapakwaatendela helahela handa chibhakaatendela Aelia.”

¹³ Penapo bhenibhala bhabhaajigana bhakahimanyanga kubhehe bhakaalobholela nnani ja Ayohana Ambatichaji.

Ayesu bhaalamia kakombo jumo jwaabhile na mahoka

Amaluko 9:14-29; Aluka 9:37-43

¹⁴ Pabhakaguhikila kabhele gonigola nkutuli gwa bhandu, amundu bhamo bhakaajendela Ayesu bhakaatindibhalila majugwa,

¹⁵ bhakalobhola, “Hangwana, ngolee kiha mwana jwangu mwanalome ntamwa chi-hinduhindu, bhatendakulaga muno, na bhombe mala jijingi bhatenda kugwela pamooto au mmachi.

¹⁶ Nganneta kwa bhenibhala bhabhajiganwa bhinu nambo bhangakombola kwaalamia.”

¹⁷ Ayesu bhakaajangula, “Mwangota mwa bhandu bha nangocheni mwangahobalelanga, bhannekitinge ndela! Mbakutama na mwangota mpaka lii? Mbakumpumilianga mpaka lii? Munnetange jono mwana pambani!”

¹⁸ Ayesu bhakagakalipila genago mahoka, na bhenabho gakaabhoka, bhenibhala amwana bhakalama popopo.

¹⁹ Ngapena bhenibhala bhabhaajigana bhakaajendelela Ayesu pannyenje pabhakibha jikajabhe, bhakaakonya, “Mbone twenga twangakombola kugabhoa genigala mahoka?”

²⁰ Ayesu bhakaajangula, “Kwa kubhehe kuhobhalela kwinu kuchoko. Nannobholelanga kweli, handa nhobhalilinge hata kachoko handa mbeju ja haladali, mpakombola kulilobholela litombi helyelye, ‘Libhoke pamba lijabhule papala,’ na lyenelo lipakujabhula. Chaakwa choachela changakomboleka kwaachinu.

²¹ Nambo lihoka handa heyeye ngabhoka tu ila kwa kujopa na kutabha, na kutama pangali kulyee na kung’wee choachela.”

Ayesu bhalongela kabhele nnani ja kujomoka na kuyoka kwabhe

Amaluko 9:30-32; Aluka 9:43-45

²² Pabhakibha pamo na bhabhachijigana bhabhe konokwe ku Chilambo cha ku Galilaya, Ayesu bhakaalobholela, “Amwana bha Amundu bhajaula kamulikwa na kwaakamua kwa bhandu.

²³ Na bhena bhandu bhapakwakoma, nambo lichobha lya tatu bhapakuyoka.” Na babhaajigana bhabhe bhakahechukanga muno.

Kubhoa kodi ja Nyuumba ja Annoongo

²⁴ Pabhakahikanga kuchilambo cha ku Kafalanaumu bhandu bhabhakumbanga kodi ja Nyuumba ja Annoongo bhakaajendelela Apetulo, bhakaakonya, “Bholi, bhabhajigana bhinu bhalepa kodi?”

²⁵ Apetulo bhakaajangula, “Elo, bhatendakulepa.”

Apetulo pabhakabhujwa kwaachabhe kabula ja kulobhola lilobhe, Ayesu bhakaakonya, “Mwe Asimoni nnola bholi? Akaakolongwa bha chilambo bhakumbanga kodi kwa bheneki? Kubhoka kwa akaakola chilambo au kubhoka kwa akaageni?”

²⁶ Apetulo bhakajangula, “Kubhoka kwa akaageni.”

Ayesu bhakaalobholela, “Henela, bahi, akaakola chilambo ngapalikwa kulepa.

²⁷ Nambo kwa kupala tukotokwaachimwa, nnyende kulitanda, nkalopoe, ntolle homba hipakujemeka kutangila, nhunukule nkang’wa jabhe, na mpakugukolela ulohi nkati. Ntote gono ulohi nkalepe kodi ligongo lya nenga na ligongo linu mwenga.”

18

Nga bheneki bhabhabhile akolo mu Umwenye gwa Annoongo

Amaluko 9:33-37; Aluka 9:46-48

¹ Gonigola muda bhabhachijigana bhakaajendelela Ayesu, bhakaakonya, “Nga bheneki bhabhile akolongwa muno mu Umwenye gwa Annoongo?”

² Ayesu bhakaankema mwana jumo na kunnyemea pakati jabhenji,

³ ngapena bhakalobhola, “Ndendakunnobholelanga kweli, handa ngatendebhuka kubhehe handa mwana, ngajingilanga mu Umwenye gwa Annoongo.

⁴ Henela, bhoabhala bhabhachitulua handa mwana jonjoni, bhenabho nga bhabhabhile akolongwa mu Umwenye gwa kunani kwa Annoongo.

⁵ Amundu bhoabhala bhabhampokela mwana handa jonjoni kwa lihina lyangu, bhambokela na nenga.”

Malengelo gagaatenda amundu kutenda mabohu

Amaluko 9:42-48; Aluka 17:1-2

⁶ Nambo amundu bhoabhala handa bhapakwajambukia bhamo bha habhaangota bhabhanhobhalela nenga, kutendanga mabhohu, nga mbaya bhaatabhe pantandala liganga likolongwa lya kuyagila na kwaatumbukila mu bahali.

⁷ Mpakulaganga mwangota bhandu bha heche pachilambo babhajambukia bhandu bhabhahobhalela Akilisito bhatendange mabhohu, hikubho hiyaajambua bhandu bhatendange mabhohu nga gapakuhika, nambo bhapakulaganga amundu bhenibhala bhabhajambukia bhandu bhangi bhatendange mabhohu.

⁸ “Handa lubhoko au lukongono lwinu lupakunyambukia mabhohu, muluekete na kulujea kutali na mwenga. Mbaya kwaachinu kujingila mu umomi gwa machobha goa pangali lubhoko au lukongono, kuliko kulekelelwa mu mooto gwa machobha goa gwangahimika pangali mabhoko mabhele na makongono gabhele.

⁹ Na handa lio linu lipakunnyambukia mabhohu, mbaya mulitupule na kulilekela kutaali. Mbaya kwaachinu kujingila mu umomi mmi na lio limo, kupunda kulekelelwa mu mooto gwangahimika machobha goa kongo mmi na miho goa gabhele.”

Kulandanikia kwa ngondolo jwahobhite

Aluka 15:3-7

¹⁰ “Ntamange maha! Nkotokummelua bhamo bha habhaangota bhachoko. Ndenakunnobholelanga, akaatumichi bha kunani kwa Annoongo bhabhabhilinge pamo na Annoongo machobha goa.”

¹¹ “Kwakubhehe mwana jwa mundu akahika kwaalolengea bhenibhala bhabhatamanga handa bhabhahobhitinge.”

¹² “Mnolanga bholi? Handa amundu akweti ngondolo makomi komi, na kuhobha jumo, bhatenda bholi? Kwalekanga bhenibhala makoni tisa na tisa palitombi, na kajaula kunnolea jonijola jwaahobhite.

¹³ Handa bhaapatite, ndendakunnobholelanga kweli, bhapakuhachuka mutima nnani ja bhenabho ngondolo jumo kupunda bhenibhala ngondolo makoni tisa na tisa hiigalile.

¹⁴ Helahela, Atati bhinu bha kunani kwa Annoongo ngapala jumo jwa bhabhabha bhachoko kuhobha.”

Anung'una handa alemwite

¹⁵ “Anung'una handa alemwite, mwaajabhulile nkaakelebbhuhe mmi mwangota jika-jinu. Handa bhannyoine mpakubhehe mumpatite anung'una bhinu.

¹⁶ Handa bhangannyonikia, mwatole amundu bhamo au bhabhele bhabhe pamo na mwenga nyuale nabho ili kwa uchahidi gwa bhandu bhabhele au bhatatu, ili kila chilebhe chibhee maha handa Majaandiko ga Annoongo chigalobhola.

¹⁷ Handa bhangaajonikianga bhenaangota, mugulobholele nkutuli gwa bhandu bhabhanhobhalela Akilisito. Na handa ngagujohanikia nkutuli gwa bhandu bhabhanhobhalela Akilisito, na bhabhe kwaachinu handa amundu bhangaamanya Annoongo au atocha kodi.”

Kukanakia na kulekelea

¹⁸ “Ndendakunnobholelanga kweli, chimpakutabhanga pachilambo chipakutabhwa kunani kwa Annoongo, na chimpakujogola pachilambo chipakujogolekwa na kunani kwa Annoongo.”

¹⁹ “Kabhele ndendakunnobholelanga, bhabhele pakati jinunji handa bhakondikininge pambani pachilambo nnani ja chilebhe choachela cha chibhapakujopanga, Atati bhangu bha kunani kwa Annoongo bhapakutenda chikubho hecho.

²⁰ Kwakubhehe pohapala pabhakongananga bhandu bhabhele au bhatatu kwa lihina lyangu, na nenga mi nkati jabhenji.”

Kulandanikia kwa antumichi bhangaalekelela ajabhe

²¹ Ngapena Apetulo gubhaajendela Ayesu, bhakaakonya, “Bholi, handa anung'una bhangi bhapakupunda kunnemwa nenga, naelekelele palengwa? Mala saba?”

²² Ayesu akaajangula, “Ngalobhola mala chaba tu,” “Nambo mala chabini na chaba.

²³ Kwakubhee Umwenye gwa kunani kwa Annoongo gubhile henele, amwenye bhamo bhakabhoka kujaula kulola mabhalangano kwa akaatumichi bhabhe.

²⁴ Pabhakajemeka kutenda mabhalangano gabhe, amundu bhamo bhabhakibha na ligambo lya mamilioni gajingi ja mbiya bhabhakaleta kwaachabhe.

²⁵ Bhena amundu bhakibha bhangali chilebhe cha kulepa, henela Hangwana bhabhe bhakaakulumika bhauchwe bheene, hanu bhabhe, bhana na hilebhe yoha hibhakibha nabho, kupala bhalepe magambo.

²⁶ Penapo, antumichi habho bhakatindibhala majugwa nnongi jabhe, bhakalobhola, 'Choonde nnende na nenga mbakulepa ligambo linu lyoha!'

²⁷ Hangwana bhenabho bhakaabhonela kiha, bhakaalekelela ligambo lyelya, bhakaaleka bhajende kwaachakwe."

²⁸ "Nambo bhenabho antumichi bhakabhoka, bhakaakolela bhamo bha antumichi nnyakwe bhabhakibha na ligambo lyabhe mbia kachoko. Bhakaahiling'inya pantandala bhabhi kulobhola, 'Nnepe ligambo linu!'

²⁹ Antumichi ajakwe bhakatindibhala majugwa, bhakaapembelela, 'Nnende nanenga mbakunnepa.'

³⁰ Nambo bhenabho bhakakana, na bhakaatabha mu nyuumba ja kutabhila bhandu mpaka penapo pabhapakwalepe ligambo lyabhe.

³¹ Bahi, akaatumichi akaajabhe pabhakalola chilebhe hecho bhakakokolekela muno, bhakajaulanga kwaalobholela amwenye bhabhe nnani ja chikubho hecho chichikabhokela.

³² Penapo bhena amwenye bhakankema bhenabho antumichi, bhakaalobholela, 'Mwenga ngabha antumichi bhammbone! Nkanyopa nenga, na nenga ngannekelela ligambo linu lyoa.

³³ Bholi, jangapalikwa namwenga kunmonela kia ntumichi nnyinu handa nanenga chingammonela kia mwenga?'

³⁴ Penapo amwenye bhenabho hikanchimwa muno, bhakaatabha mu nyuumba ja kutabhila bhandu bhannagie mpaka pabhapakulepa ligambo lyoa."

³⁵ "Ayesu bhakajomola kwa kulongela, Atati bhangu bha kunani kwa Annoongo chibhapakuntendelanga hela hela handa mwangota ngaalekeleanga anung'una bhabhe kwa ntima gwabhe goa."

19

Ayesu bhatendakujigana ngani ja kuleka kwa analome na haikege

Amaluko 10; 1-12

¹ Ayesu pabhakajomola kulongela malobhe genago, bhakabhoka ku chilambo cha ku Galilaya bhakajenda ku chilambo cha Yudea, kuntundu ja loochi lwa Yoludani.

² Nkutuli nkolongwa gwa bhandu gukaakagula konokwe, na bhenaangota bhakaalamianga bhabhakibha na itamwa.

³ Bhangi bha Mafalisayo bhakahika, bhakakonya, "Bholi, hipalikwa amundu kwaaleka hanu bhabhe kwa kulemwa kohakola?"

⁴ Ayesu bhakaajangula, "Bholi, mwangachomanga mu Majaandiko ga Annoongo, kubhee Annoongo bhabhakaatenda amundu tangu kandahi, nga bhakaatenda hanalome na haikege?"

⁵ Na Annoongo bhakalobhola, 'Ligongo helyo mwanalome bhapakwaaleka atati na anyongo bhabhe, bhapakondekana na hanu bhabhe, bhoo bhabhele bhapakubhehe mmele gumo?'

⁶ Henela, bhenaangota ngabha bhabhele kabhele, nambo mmele gumo. Bahi, chibhachilondanike Annoongo, amundu bhakoto kuchilekania."

⁷ Nambo bhenaangota Mafalisayo bhakaakonya, "Kwaniki, bahi, Amusa bhakatulugia hanalome bhaajandikile malobhe ga ulekani hanu mundu na kwaaleka?"

⁸ Ayesu bhakaajangula, "Amusa bhakannyeketela kwaaleka hanu bhinu ligongo lya mwangota nga bhandu bha kulimba yakubhee ngajiganikwa. Nambo pena kandahi ngakibha hopo henela.

⁹ Nenga nannobholelanga, amundu bhoabhala jujwapakwaaleka hanu bhabhe ligongo lyoalyela ngabha ligongo lya ngongola, handa bhapakulombela haikege bhangi, bhenabho bhatenda ngongola."

¹⁰ Bhabhaajigana bhabhe bhakaalobholela, "Handa hikubho ya analome na haikege nga henela, mbaya kutama pangali kulombela."

¹¹ Ayesu bhakaalobholela, "Nga bhoo bhabhakombola kupokela majigano haga, nambo kwa bhenibhala Annoongo bhabhatekwapeka ngani hejo.

¹² Kwa kubhehe kutekubhee na hilebhe hijingi hyatendanga bhandu bhakoto kulombela, bhangi ligongo lya chibhelekwa, bhangi bhatekutendelwa na bhandu bhakoto kubhee na machili gakombola kulombela, na bhangi bhatekuamua bheene akaangweto ngaalombela ligongo lya Umwenye gwa kunani kulihunde. Bhakombolanga kulipokela helye lijigano na bhalipokele.”

Ayesu bhatendakwaatendela gammbone bhana

Amaluko 10:13-16; Aluka 18:15-17

¹³ Ngapena bhandu bhakaaletanga bhana kwa Ayesu ili bhaabhekele mabhoko na kwaajopelanga. Nambo bhabhachijigana bhebhe bhakaakanikianga bhenibhala bhandu bhabhakaaletanga.

¹⁴ Ayesu akalobhola, “Mwaalekange bhena bhana bhachoko bhaikange kwaachangu, wala nkotokwaahibhilanga, kwa kubhee Umwenye gwa kunani kwa Annoongo nga gwa bhandu bhabhilinge handa habha bhana.”

¹⁵ Bahi, bhakaabhekela mabhoko, ngapena bhakabhoka penapo.

Kakombo jumo jwakolite hilebhe hijingi

Amaluko 10:7-31; Aluka 8:18-30

¹⁶ Mundu jumo akola hilebhe akaajendelela Ayesu na kwaakonya, “Bhannyigana, ndende chilebhe niki chammbone ili nigupate umomi gwa machobha goha?”

¹⁷ Ayesu akaajangula, “Mboni ntenda kukonya nnani ja chilebhe chammbone? Jwaakwa jwabhi jwammbone ila jumo tu, nga Annoongo. Nambo handa mpala kujingila mu umomi gwa machobha goa ngakamule malagilo gabhe.”

¹⁸ Jonijola mundu akaakonya, “Malagilo niki?”

Ayesu akaajangula, “Nkotokoma, nkoto kutenda ngongola, nkotokujibha na nkoto kulobhola malobhe ga unami,

¹⁹ mwaatopee atati bhinu na anyongo bhinu na mwaapale ajinu handa mwabhene.”

²⁰ Jonijola kakombo akalobhola, “Gena goha ndekugatenda, ndende niki chengi?”

²¹ Ayesu akaalobholela, “Handa mpala kubhee handa henela Annoongo chibhapala, nnyaule nkauche hilebhe yoha mmi nayo na yene mbiha nkaapekeange akaahocho, na mwenga mpakubhee na chilebhe chammbone kunani kwa Annoongo. Ngapena nhike, ngagule nenga.”

²² Jonijola kakombo paakajoha genago akajaula kongo atekuchimwa ligongo akibha na hilebhe hijingi muno.

²³ Penapo Ayesu akaalobholela bhabhaajigana bhabhe, “Kweli ndendakunnobholelanga, hipakubhee kulimba kwa mundu jwabhi na hilebhe hijingi kujingila mu Umwenye gwa kunani kwa Annoongo.

²⁴ Kabhele ndendakunnobholelanga, ngabha kulimba muno kwa chinyama chichikemwa ngamia kupeta palipobhole lya chindano, ila ngabha kwa mundu jwabhi na hilebhe hijingi kujingila mu Umwenye gwa Annoongo.”

²⁵ Bhabhaajigana bhabhe pabhakajoha genago, bhakakangachanga muno na kwaakonya, “Nga aganiki bahi jwaakombola kuokoka?”

²⁶ Nambo Ayesu akabhalolanga, akabhalobholelanga, “Chikubho hecho ngakomboleka kwa bhandu, nambo kwa Annoongo goa gatenda komboleka.”

²⁷ Ngapena Apetulo akalobhola, “Nnole,” “Tulekite hilebhe yoha na kunkagula. Tupakupata niki?”

²⁸ Ayesu akaalobholelanga, “Nannobholelanga kweli, Mwana jwa Mundu chibhapakutama pachitengu chabhe cha Umwenye cha kung’anyima pachilambo chiyono, na mwan-gota bhanngagulanga mpakutama pahitengu komi na hibhele kongo mmikuhukumulanga hilongelo komi na bhele ya chilambo cha ku Isilaeli.

²⁹ Helahela mundu joajola jwaalekite nyuumba, au akaanung’una mundu, au akaalombo, au atati, au anyongo au bhana, au migonda, ligongo lya nenga, apakupokela mala mia kupunda chenichela chibhaatendite, na kupata umomi gwangapela.

³⁰ Nambo bhabhilinge bhakujemeka, bhapakubhee bha kujomolekea, na bhabhi bha kujomolekea bhapakubhee bhakujemeka.”

20

Bhabhatenda lihengo mu nng’onda gwa mizabibu

¹ “Umwenye gwa kunani kwa Annoongo gulandana na mundu jwalemite ng’onda gwa mizabibu, yakubhee bhakabhoka kundabhi muno na kwaakamuanga bhandu mahengo mu ng’onda gwabhe.

² Na bhena paakajomola kondana nabho na akaalemi kwaalepa mbiha dinali jimo kwa lichobha, ngapena akabhapelekanga mu nng’onda gwabhe gwa mizabibu.

³ Akabhoka saa tatu kundabhi, akabhona bhandu bhangi bhatekujema pakutendela malonda, bhanga mahengo,

⁴ akaalobholelanga, 'Nnyaulange mwangota nkatendange lihengo mu nng'onda gwa mizabibu, na nenga mbakunnepanga chiipalikwa.'

⁵ Bahi, bhakajaulanga. Bhena akola nng'onda bhakabhoka kabhele saa sita na saa ticha, bhakatenda hiyoyo.

⁶ Lyobha palikatipika akabhoka kabhele akajaula palubhanja pabhauchilanga bhandu hilebhe na akaakolelanga bhandu bhangi tangu bhajemite pangali lihengo. Akaakonyanga, 'Kwaniki nnyemite pambani muhi goa pangali kutenda lihengo?'

⁷ Na bhenaangota bhakaajangula, 'Kwa kubhee jwakwa mundu jwaatupekie lihengo.'

Akaalobholelanga, 'Nnyaulange na mwangota nkatendange mahengo mu nng'onda gwa mizabibu.'

⁸ "Pajikahika kimuho, jonijola akola nng'onda akaalobholelanga bhakujemelela bhabhe, 'Mwaakokoleka akola nng'onda mwangatutendela yammbone.

⁹ Ngapena bhakahikanga bhenibhala bhabhapekiwe mahengo saa komi na jimo, bhakapokelanga kila jumo mbiha dinali jimo.

¹⁰ Henela bhenibhala bhabhakalongelela kupekewa mahengo, bhakaganikianga bhapakulepwanga kupunda, na bhenaangota bhakapekewa kila jumo jwabhe malepo ga lichobha limo.

¹¹ Bahi, bhakapokelanga mbiha yabhenji, na bhangachukanga henela bhakaakokoleka akola nng'onda mwangatutendela yammbone.

¹² Bhakalobholanga, 'Habha bhandu bhabhakajomolekewa kwaakamua mahengo bhatenditinge mahengo kwa muda gwa lichaa limo tu, mboni ntutendile kulandana na bhenaangota wakati twenga tutekupumuilia kutenda lihengo muhi goha!'

¹³ Penapo bhenibhala akola nng'onda bhakaajangula jumo jwabhe, 'Aganja,' 'Nangamponja chilebhe, bholi, mwangalagana na nenga kunepa kwa lichobha?'

¹⁴ Ntole ulohi gwinu na nnyaule kwaachinu. Mbala kunnepa hojo mundu bhakujomolekeka kulandana na mwenga.

¹⁵ Bholi, mbalikwa hopo kutenda chimbala na ulohi gwangu? Au ntenda kulola bwihu kwa kubhee nenga nga bhammbone?'

¹⁶ Ngapena Ayesu akalobhola, "Bhoa bhabhabhilinge bhakujomolekeka bhapakubhee bhakujemeka, na bhoa bhabhabhilinge bhakujemeka bhapakubhee bhakujomolekeka."

Ayesu alobhola kwa mala ja tatu nnani ja kujomoka na kuyoka kwabhe

Amaluko 10:32-34; Aluka 18:31-34

¹⁷ Ayesu paakibha atenda kujaula kuchilambo cha ku Yelusalemu, akaapetulanga bhenibhala bhabhaajigana komi na bhabhele pajika jabhenji, na nndela akaalobholelanga,

¹⁸ Nnyoanikiange! Akaalobholelanga kubhee, "Tutenda kujenda kuchilambo cha ku Yelusalemu, na konokwe Mwana jwa Mundu apakubhekwa mmabhoko ga akakolo bha akaakung'i na bhabhajigana Malagilo na bhenaangota bhapakwaahukumula akomekwe.

¹⁹ Ngapena bhapakwaapeleka kwa bhandu bhangabhee Bhayahudi bhapatange kwaatendelanga mbeenje, na kwaapota mihimbati, na kwaabhamba panchalaba na kwaakoma, nambo lichobha lya tatu apakuyoka."

Anyongo bhabhenji Ayakobo na Ayohana bhatenda kwaajopa Ayesu chilebhe

Amaluko 10:35-45

²⁰ Ngapena ahanu bha Azebedayo pamo na bhana bhabhe bhakaajendelela Ayesu bhakaatindibhalila majugwa na kwaajopa chilebhe.

²¹ Ayesu bhakaakonya, "Bholi, mpala niki?"

Nabhena ahikege bhakajangula, "Nnobholele kweli mu Umwenye gwinu, habha bhana bhangu bhabhele bhapakutamanga jumo kunnelo, na jongi kunchiji mu Umwenye gwinu."

²² Ayesu bhakajangula, "Ngachimanya chinnyopanga nga chiniki. Bholi, nkombolanga kuching'wela chikombe cha kulaga ching'wela nenga yakubhee mmi kubhandikila kuching'wela?"

Bhakajangulanga, "Tutenda kombola."

²³ Ayesu bhakaalobholelanga, "Kweli mpakung'wela chikombe changu, nambo kutama upande gwangu gwa kunnelo au kunchiji ngabha mamulaka gangu kunnpekeanga, nambo bhapakupatanga bhenibhala bhabhekitwe tayali na Atati bhangu."

²⁴ Bhenibhala bhabhaajigana komi bhangi pabhakajohanga genago, bhakaachimwanga bhena angota Ayakobo na Ayohana.

²⁵ Ngapena Ayesu akaakemanga bhoa pamo na kwaalobholelanga, “Ntendakuhi-manyanga kubhee chilongola cha bhandu bhanga Bhayahudi, bhatenda kwaatabhalanga bhandu bhabhenji kwa machili, na bhabhaatandaha bhandu na kulangia mamulaka gabhenji.

²⁶ Nambo kwaachinu ikoto kubhee henela, nambo bhabhapala kubhee chilongola nkati jinunji bhapalikwa kubhee antumichi bhinunji,

²⁷ na mundu johajola jwaapala kubhee chilongola kwaachinunji bhapalikwa kwaatu-mikilanga bhangi.

²⁸ Handa henela Mwana jwa Mundu jwangahika ili kwaatumikila, nambo kutumikila na kugubhoa umomi gwabhe ili kwaakomboanga bhandu bhajingi.”

Ayesu atendakwaalamia bhangelola bhabhele

Amaluko 10:46-52; Aluka 18:35-43

²⁹ Ayesu paakabhoka kuchilambo cha ku Yeliko na bhabhaajigana bhabhe, bhandu bhajingi bhakaakagula.

³⁰ Bahi, pakibha na bhangelola bhabhele bhatamitinge nngulugulu ja ndela, na bhenaangota pabhakajoha Ayesu bhatenda kupeta, bhakaajaomboa lilobhe, bhabhi kulobholanga, “Hangwana, Mwana jwa Adaudi, ntukolele kiha!”

³¹ Lyenilyela lilubhalo lya bhandu likaakalipila na kwaalobholelanga bhakotokange. Nambo bhenangota bhakapundanga kujomboha lilobhe, “Hangwana, Mwana jwa Adaudi, ntukolele kiha!”

³² Ayesu akajema na akaakemanga na kwaakonyanga, “Mpalanga nintendelange niki?”

³³ Bhakaajangula, “Hangwana, tupala tulole.”

³⁴ Bahi, Ayesu akaabhonela kiha, akaakwanga miho gabhenji, na popopo bhakakom-bolanga kulola.

21

Ayesu bhajingila ku Yelusalemu kwa kuhangalilwa

Amaluko 11:1-11; Aluka 19:28-40; Ayohana 12:12-19

¹ Ayesu na bhabhachijigana bhabhe pabhakahika mu chijiji cha Betifage, mu litombi lya Mizeituni kubhandikila na kuchilambo cha ku Yelusalemu, ngapena Ayesu apakwa-tumanga bhabhaajigana bhabhele,

² akaalobholelanga, “Nnyaulange mu chijiji chichibhii nnongi jinu na mpakunkolela liponda atabhitwe pamo na mwana jwakwe. Nkaajogolelange na mwaletange kwaachangu.

³ Na handa amundu bhankonyitinge, mwaalobholele, ‘Hangwana bhatenda kwaapala.’ Na bhena bhapakunnekanga guna kamo.”

⁴ Chikubho hecho chikatendeka ili genigala gagakalobholekwa na akaalondoi bha Annoongo gakweele,

⁵ “Mwalobhelele bhandu bha chilambo cha ku Yelusalemu

Nnole, Amwenye bhinu bhatendakuhika!

Bhabhi na kiha na bhatekwela liponda,

mwana liponda, mwana jwa liponda.”

⁶ Henela, bhenibhala bhabhachijigana bhabhe bhakajaulanga handa bhabhakalagikiwa na Ayesu.

⁷ Bhakaaleta bhenibhala liponda na mwana jwakwe, bhakatandika ngobho yabhenji nnani jabhenji na Ayesu bhakatama panani jakwe.

⁸ Nkutuli gwa bhandu bhajingi bhakatandikanga ngobho yabhenji nndela, na bhandu bhangi bhakaeketanga nyaambi ya mikongo kuijanjaa nndela.

⁹ Nkutuli gwa bhandu gugukalongoleta nnongi ja Ayesu na nkutuli gugukaakagula kuyetu gwoa gukapotanga nyenye bhabhi kulobholanga, “Alumbalilwe mwana jwa Adaudi! Atekutendelwa gammbone bhenabho bhabbhika kwa lihina lya Hangwana! Alumbalilwe Annoongo bhabbhahile kunani kwa Annoongo!”

¹⁰ Ayesu pabhakajingila chilambo cha ku Yelusalemu, chilambo choha chikapupulika. Bhandu bhatendita konyananga, “Hojo nga aganiki?”

¹¹ Bhandu bhabhakibha mu lyenilyela lilubhalo bhakalobholanga, “Hojo nga Ayesu bha ku Nazaleti chilambo cha ku Galilaya.”

Ayesu atendakujaula mu Nyuumba ja Annoongo

Amaluko 11:15-19; Aluka 19:45-48; Ayohana 2:13-22

¹² Ngapena Ayesu akahika mu Nyuumba ja Annoongo, akaabhabhenga bhandu panja bhabhakibha bhatenda kuemela na kuuchanga hilebhe mu Nyuumba ja Annoongo,

bhakahipendekula mecha ya bhabhatindigana mbiya, na hitengu yabhenji bhabhahuchitanga nguunda,

¹³ na kwalobholelanga, "Jijaandikwe mu Majandiko ga Annoongo, 'Nyumba jangu jipakemwa nyumba ja kujopela.' Nambo mwangota ntekujitendanga kubhee likunguni ja akaabwii."

¹⁴ Bhangalolanga na akanangwabha bhangi bhakaajendelela Ayesu mu Nyuumba ja Annoongo, na bhena Ayesu bhakaalamia.

¹⁵ Nambo akaakung'i akolongwa na bhabhajigana Malagilo ga Amusa pabhakagalola yakangachika gagatendikwe na Ayesu, na bhana bhapaliana lilobhe lyabhenji mu Nyuumba ja Annoongo bhabhikulobholanga, "Bhalumbalilwe Mwana jwa Adaadi," bhakachimwanga.

¹⁶ Henela bhakaakonya Ayesu, "Bholi, ngajoa chibhalongela bhana?"

Ayesu akabhajangulanga, "Eloo, ndendakujoha," Bholi "Mwangapatanga kuchoma Majandiko gangani? 'Kwa kang'wa ya bhana bhachoko na hilemba bhatendakunnumbalila mwenga.' "

¹⁷ Ayesu bhakabhoka penapo na kujaula ku chilambo cha ku Betania, bhakagoloka konokwe.

Ayesu atendakugulaani nkojo

Amatayo 11:12-14, 20-24

¹⁸ Ayesu akobhoka kundabhi tuputupu mu chilambo cha ku Betania kubhuja ku chilambo ku Yelusalemu, akajoa njala.

¹⁹ Akagubhona nkojo gumo nngulugulu ja ndela, akagujaulila, nambo akagukolela gwanga choachela nambo mahamba jika. Bahi, akagulobholela, "Nkotokuogola matunda ng'o!" Popopo kongo gwa nkojo gukajoma.

²⁰ Bhabhachijigana bhabhe pabhakagulola bhakahechukanga, bhabhikulobhola, "Kwaniki gongo ntini gutekunyulila chindema?"

²¹ Ayesu akaajangulanga, "kweli ndendakunnobholelanga, handa nkahobhalilinge pangali kubhee na lipamba, ngabha kubhee mpakombolanga kutenda tu genigala gagatendikike kwa gongo ntini, nambo hata nkaliobholela litombi, 'Nchitupule nkachijee mu bahali,' na lyene lipakutendeka.

²² Na handa nkahobhalelanga, choachela chimpakujopanga kwa Annoongo, mpakupatanga."

Ayesu bhatendakwakonya ngani ja uwecho gwabhe

Amaluko 11:27-33; Aluka 20:1-8

²³ Ayesu pabhakabhujja kabhele pa Nyuumba ja Annoongo, bhakibha bhatenda kujigana. Pabhakibha bhatenda kujigana, Akaakung'i bhakolongwa na akanahota bhakaakonya, "Ntenda hikubho heye kwa mamulaka niki? Na aganiki bhampile ganga mamulaka?"

²⁴ Ayesu akaajangulanga, "Na nenga mbakunkonyanga nkonnyekelo gumo, handa mpakujangula bahi na nenga mbakwaalobholela ndenda hikubho heye kwa mamulaka niki.

²⁵ Bholi, mamulaka ga Ayohana ga kubaticha bhandu gakabhoka kwa aganiki, gakabhoka kunani kwa Annoongo au kwa bhandu?"

Nambo bhakalobholelana akaachinabhene henela, "Tulobhole chiniki? Handa tulobhwile, 'Gakabhoka kunani kwa Annoongo,' apakutukonya, 'Kwa niki mwanganhobhalelanga Ayohana?"

²⁶ Nambo handa tulobhwile, 'Gakabhoka kwa bhandu,' Tutendakujogopanga bhandu chenichela chibhapakutendanga, ligongo bhenaangota bhatendakondanga kubhee Ayohana nga Alondoi bha Annoongo."

²⁷ Bahi, bhakaajangula Ayesu, "Tuhimanyi hopo!" Na bhena Ayesu akaalobholelanga, "Na nenga kabhele ngannobholelanga ndenda hikubho heye kwa mamulaka niki."

Kulandanikia kwa akachikakombo bhabhele

²⁸ "Mwangota mmonanga bholi? Pakibha na muntu jumo jwakibha na bhana bhabhele. Bhakajabhulila jonijola jwa kujemeka, akaalobholela, 'Mwana jwangu, leneni nnyaule nkatende lihengo mu nng'onda gwa mizabibu.'

²⁹ Jonijola kakombo akaajangula, 'Nalema!' Nambo baadae akagatendebhua maganikio gabhe, akajaula kupangana lihengo.

³⁰ Ngapena bhenibhala atati akaalobholoela mwana jwabhe jwa bhele hela hela. Nabhena bhakajangula, 'Elo, atati,' Nambo bhangajaula kupangana lihengo.

³¹ Bholi! Nga ganiki nkati ja abha bhabhele bhabhakatenda gagapalikwa na atati bhabhe?"

Bhakajangulanga, "Bhenibhala mwana jwa kujemeka."

Bahi, Ayesu bhakaalobholelanga, "Kweli nannobholelanga, bhatochanga kodi na bhandu bha ngongola bhapakunnongolelanga kujingila mu Umwenye gwa Annoongo.

³² Kwa kubhehe Ayohana ambatichaji akahika kwaachinunji kunnangianga namuna chiipalikwa kutama kwa kwabhajila Annoongo, na mwangota mwangahobhalela, nambo bhatochanga kodi na bhangongola bhakaahobhalela, na mwangota hata pamkagabhweni genigala goa mwangagalekanga na kuhobhalela."

Kulandanikia kwa akaalemi na nng'onda gwa mizabibu

Amaluko 12:1-12; Aluka 20:9-19

³³ Ayesu akalobholelanga, "Nnyohanikiange kulandanikia kongi," Pakibha na mundu jumo akola migonda, na jono akalema mizabibu, akalitindila luwani, akahemba lilibha lya kuminyila zabibu jabhe, akachenga hilendo ya akaalendei. Ngapena akalijahika kwa akaalemi na kujaula ulendo gwa chilambo cha kutaali.

³⁴ Muda gwa kuhuna pagukahika, bhakaatumanga akaatumichi bhabhe kwa bhenibhala akaalemi, ili bhakapokelange malepo kubhoka kwa bhena bhandu bhabhakajaika nng'onda gwabhe.

³⁵ Bhenibhala akaalemi bhakaakwenyanga akaatumichi bhenibhala, bhamo bhakaapota, bhangi bhakaakoma na bhangi bhakaapota kwa maganga.

³⁶ Bhenibhala akola ng'onda akaatumanga akaatumichi bhangi, bhajingi kupeta bha kandai. Bhenibhala akaalemi bhakaatendelanga namuna jela jela.

³⁷ Kupela kwa yoa akaatuma mwana jwabhe kongo akiganikia, "Bhapakunnyoanikia mwana jwangu."

³⁸ Nambo bhenibhala akaalemi pabhakaabhona mwana jwabhe akalobholelananga akaachinabhene, "Hojo nga nnekelwa, twaakome ili tupakuhipetula hilebhe yabhenji!"

³⁹ Bahi, bhakaakamula chikwenya, bhakaapia panja ja gonigola nng'onda gwa mizabibu, bhakaakoma.

⁴⁰ Ayesu akaakonyanga, "Nangocheni pabhapakuhika bhenibhala akola nng'onda gwa mizabibu, bhapakwaatenda niki bhenabho akaalemi?"

⁴¹ Bhenabho bhakaajangulanga, "Apakwaakoma bhenibhala akaabhou, na gonigola nng'onda apakugukamua kwa akaalemi bhangi yakubhehe bhapakunpekea lilubhalo lya mahuno kwa muda gugupalikwa."

⁴² Penapo Ayesu akaakonyanga, "Bholi, mwangachomanga ngani heje mu Majandiko ga Annoongo?"

'Liganga bhabhalikanite akaachengi

nangocheni litekubhee liganga lilipalikwa muno.

Hangwana nga bhabhatendite chikubho chenjeni,

na chene chikubho nga chakangachika muno kwaachitu! "

⁴³ "Henela ndendakunnobholelanga." "Umwenye gwa Annoongo bhapakugubhoa na bhapakupekewa bhandu bhangi bhabhapakutendanga gabhagapala Annoongo."

⁴⁴ "Mundu joajola jwapakugwila paliganga helyo apakuhengeleka hipande hipande, nambo jonijola lilipakwagwila liganga helyo apakuyagika muno."

⁴⁵ Akakung'i akolo na Mafalisayo pabhakajohanga kono kulandanikia kwabhe bhakahimanyanga kubhee Ayesu akibha atenda kwaalongela bhenaangota.

⁴⁶ Penapo bhakibha bhalolea ndela ja kwakamula Ayesu, nambo bhakaajogopanga bhandu ligongo bhenaangota bhakahimanyanga kubhee Ayesu nga Alondoi.

22

Kulandanikiha kwa chakulya cha ulombela

Aluka 14:15-24

¹ Ayesu akalongela nabho kabhele kwa kulandanikia, kwa kwaalobholelanga,

² "Umwenye gwa kunani kulihunde gulandana na akolo bhamo bhabhapanganikie chikakombo jwabhe chakulya cha ulombela.

³ Bahi, akaatumanga akaatumichi bhabhe kwaakema bhenibhala bhabhakalalikwa mu lichobha likolongwa lya ulombela, nambo bhandu bhabhakalalikwa bhakakananga kuhika.

⁴ Ngapena bhakaatumanga kabhele akaatumichi bhangi bhabhikulobhola, 'Mwaalobholelange bhenibhala bhabhakalalikwa, yakulya yangu hibhi tayali ligongo linu, ndekuchenja makambako ga ng'ombe na ng'ombe yengi hiinenipe, kila chilebhe chibhi tayali, nhikange kuulombela.'

⁵ Nambo bhenaangota bhangajeketela, bhakajaula kwaachina bhenji, jumo kunng'onda gwabhe, na bhangi ku mahengo gabhe,

⁶ na bhangi bhabhakahigalila bhakaakumulanga akaabhanda bhabhe, na kwapotanga na kwaakomanga.

⁷ Bahi bhenibhala amwenye akachimwa muno, bhakaatumanga manyemba gabhe kwaatinihanga bhenibhala bhoa bhabhakoma bhandu na kutinia chilambo chabhe kwa mooto.

⁸ Ngapena akabhalobholelanga akaabhanda bhabhe, 'Yakulya ya ku ulombela hibhi tayali kweli, nambo bhabhakalalikwa bhangapalikwa kuhika.

⁹ Nangocheni nnyaulange mu ndela ya hlambo ya bhandu bhajingi, na bhenibhala bhoa bhampakwaabhonanga mwaakemange bhahikange ku ulombela.'

¹⁰ Bhenibhala akaabhanda bhakabhokanga, bhakajaulanga mu ndela ya hlambo ya bhandu bhajingi, bhakaakondekananga bhoa bhabhakaabhonanga, bhammbone na akaabhau, chebule jijikandekela ulombela jikatwelela akaageni."

¹¹ "Amwenye pabhakajingila kwaalola akaageni, akaalola mundu jumo jwakibha jwan-gawala ngobho ja kuulombela.

¹² Amwenye akaakonya, 'Aganja, ntekujingilabholi momboni pangali kuwala ngobho ja ulombela?' Nambo jonojwe akatama jii.

¹³ Ngapena amwenye akaalobholelanga akaabhanda bhabhe, 'Muntabhangе makon-gono na mabhoko, mwajee panja palubhendu, konokwe bhapakuguta na kuyaga mino.' "

¹⁴ Ayesu akajomolekea kwa kulobhola, "Bhajingi bhatekulalikwanga, nambo bhab-hatekuagulikwa nga kachoko."

Ayesu bhatekwakonywa ngani ja kodi

Amaluko 12:13-17; Aluka 20:20-26

¹⁵ Ngapena, Mafalisayo bhakajaulanga, na kulolea ndela ja kwaatangia Ayesu kwa malobhe gabhe.

¹⁶ Bahi, bhakaatumanga bhabhachijigana bhabhe pamo na lilubhalo lya Ahelode. Bhakaakonya, "Bhannyigana, tuhimanyi kubhee mwenga nga amundu bhannongela kweli, na ndela ja Annoongo mwahijigana mu kweli, ngaajogopa amundu bhoabhala, kwa kubhee mwenga ngalola ukolo gwa mundu.

¹⁷ Bahi, ntulobholele ching'anikia mwenga. Kwani twenga tupalikwa kulepa kodi kwa Akolo jwa ku Loma?"

¹⁸ Nambo Ayesu akagamanya mabhau gabhenji, akalobholelanga, "Mwangota akaan-dendemundu kwa niki ntendakundeganga?

¹⁹ Nnangiange jene mbiha ja kulepela kodi!"

Na bhenaangota bhakaaletela jene mbiha.

²⁰ Bahi, Ayesu akaakonyanga, "Kumiho na lihina helyelye nga lya aganiki?"

²¹ Bhakaajangula, "Nga ja amwenye bha ku Loma."

Penapo Ayesu akalobholelanga, "Bahi, hiibhile ya akolo bha ku Loma mwapekee Akolo jwa ku Loma, na ga Annoongo mwapekee Annoongo."

²² Pabhakajohanga genago bhakakangachanga, bhakaaleka na kujaulanga.

Masadukayo bhatendakonya Ayesu ngani ja kuyoka

Amaluko 12:18-27; Aluka 20:27-40

²³ Lichobha lyolyolyo, Masadukayo bhabhalobhola bhandu bhabhawilinge ngayoka bhakajendelela Ayesu.

²⁴ Bahi, bhakaalobholelanga, "Bhannyigana, Amusa akalobhola amundu bhabhalom-bile handa ajomwike pangali kuleka bhana, hipalikwa anung'una bhabhe bhaalombele bhena nhwelwa, ili bhaapatile anung'una bhabhe bhana.

²⁵ Bahi, pamba pachitu pakibha na akaanung'una saba. Jwa kujemeka akalombela ngapena akajomoka pangali kubheleka bhana, na anung'una bhabhe akaalombela jono mwikege nhwelwa.

²⁶ Chikubho chochocho chikaabhokela jono jwa bhele, na jwa tatu, mpaka jwaa saba.

²⁷ Kupela kwa yoa bhenibhala mwikege akajomoka.

²⁸ Bholi, lichobha lya kuyoka bhabhawilinge ahikege bhenabho bhapakubhee hanu bha aganiki pakati ja bhenibhala akaanung'una saba? Kwa kubhee bhoa saba bhakibha bhatekwaalombela."

²⁹ Ayesu akaajangula bhenibhala Masadukayo, "Mwangota ntekulemwanga? Ligongo ngahimanyanga Majandiko ga Annoongo wala Machili ga Annoongo.

³⁰ Lichobha lya kuyoka bhandu ngalombela wala kulombwa, nambo bhapakubhee handa Bhatumichi bha kunani kwa Annoongo.

³¹ Nambo nnani ja kuyoka mwangachomanga chenichela Annoongo chibhannobho-lilinge kubhee,

³² 'Nenga nga Annoongo Aaibulahimu, Annoongo bha Aisaka, na Annoongo bha Ayakobo.' Bahi, Annoongo ngabha Annoongo bha bhandu bhabhawilinge nambo nga Annoongo bha bhandu bhabhilinge bhamomi."

³³ Lyenilyela lilubhalo lya bhandu palikajoha genago, likakangacha kwa majigano gabhe.

Amuli jikolongwa

Amaluko 12:28-34; Aluka 10:25-28

³⁴ Mafalisayo pabhakajoha kubhee Ayesu bhakibha bhatekwakotoanga Masadukayo, bhakakongananga pamo.

³⁵ Jumo jwabhenji, jwaajigana malagilo ga Amusa, akaakonya Ayesu kwa kunlengela,

³⁶ "Bhannyigana, nga amuli niki jijibhii ngolongwa mu malagilo?"

³⁷ Ayesu akaajangula, "Mwapale Hangwana Annoongo bhinu kwa ntima gwinu goa, na kwa mbomo jinu joha, na kwa luunda ginu goa.

³⁸ Jenjeni nga amuli jijibhii ngolongwa, kabhele nga ja kujemeka.

³⁹ Na jabhele jijilandana na jenejo nga jenjeni, 'Mwaapale andami ajinu handa chinchipala mwabhene.'

⁴⁰ Malagilo na Majandiko ga Akaalondoi bha Annoongo hitekubhokela na heye Amuli jibhele."

Ayesu atendakwakonya Mafalisayo Amasiha nga ganiki

Amaluko 12:35-37; Aluka 20:41-44

⁴¹ Muda gogogo Mafalisayo bhenibhala tangu bhakondikine penipala, Ayesu akaakonyanga,

⁴² "Mwangota nnolanga bholi kwa ngani ja Akilisto? Bholi, nga amwana bha aganiki?"

Bhakaajangulanga, "Jonojwe nga mwana jwa Adaudi."

⁴³ Ayesu akaalobholelanga, Bahi, Ikombolekabholi "Kwa machili ga Mboomo ja Annoongo, Adaudi ankeme, 'Hangwana?' Kwa kubhee Adaudi akalobhola,

⁴⁴ 'Hangwana bhakaalobholela, Hangwana bhangu.

Ntame lubhoko lwangu lwa kunnelo,

mpaka naabhekange akaapwati bhinu pahi mpaka pampakwapetanga akaapwati bhinu.'

⁴⁵ Bahi, handa jikibha Adaudi bhaakema Akilisito 'Hangwana,' hikombolekabholi Akilisito mwana jwabhe?"

⁴⁶ Jwakwa mundu joha jola jwakakombola kunnyangula Ayesu chilebhe. Kabhele kubhoka lyene lichobha jwakwa jwaakajiga kwaakonya kabhele chilebhe.

23

Ayesu bhatendakwaamukanga bhabhajigananga Malagilo ga Amusa na Mafalisayo

Amaluko 12:38, 39; Aluka 11:43, 46; 20:45, 46

¹ Ngapena Ayesu bhakalilobholela lilubhalo lya bhandu pamo na bhabhachijigana bhakwe, akalobhola,

² "Bhabhajigananga Malagilo ga Amusa na Mafalisayo bhakweti mamulaka ga kugaatambulana Malagilo ga Amusa.

³ Kwa henela mkamulange na kupangana choachela chibhapakunnobholelanga. Nambo nkoto kugajiga gabhatendanga, kwa kubhee ngatendanga genigala handa chibhalobholanga.

⁴ Bhenaangota bhatendakwaapapianga bhandu mihigo ja kutopa na ja kulimba pam-ing'ongo jabhenji, nambo bhenaangota ngakombolanga kunyulula hata lukonji ili kupetula jene mihigo ja kutopa.

⁵ Bhenaangota bhapangana hikubho yabhenji yoa kupala bhabhonekane na bhandu. Bhatenda kuwala hipande ya mambendela hiitekujandikwa malagilo mmutwe na mmabhoko gabhenji hiibhi na Majandiko ga Malagilo ga Amusa.

⁶ Mu lichobha likolongwa bhapalanga kutama mu hitengu yakutopea mu Nyuumba ja konganilananga Bhayahudi.

⁷ Na kupalanga kulamukilwa kwa kutopewa mahali pakonganilana bhandu bhajingi na kupala bhandu bhabhakeme, 'Bhannyigana.'

⁸ Nambo mwangota nkoto kemwa, 'Bhannyigana,' kwa kubhee Bhannyigana bhinu nga bhamo jika jabhe, na mwangota mwabhoha nga ntendakungagula nenga.

⁹ Na nkoto kwaakema mundu bhoa bhala, 'Atati' pamba pachilambo, kwa kubhee Atati bhinu nga jumo jika, bhabhabhile kunani.

¹⁰ Na wala nkoto kemwanga, 'Mwachilongola,' kwakubhee achilongola bhinu nga jumo jika, nga Akilisito.

¹¹ Nabhena bhabhabhile akolongwa pakati jinunji nga bhapalikwa bhabhee oti abhanda bhinu.

¹² Kwa mundu joajola jwaapkuchikwea apakwaatulua, na jwaachitulua apakwaakwea."

Ayesu atendakugukalipila undendemundu gwabhenji

Amaluko 12:40; Aluka 11:39-42, 44, 52; 20:47

¹³ "Mpakulaganga Bhannyigana bha Malagilo ga Amusa na Mafalisayo, munchitendanga kubhee bhammbone! Ntendakwaahibhilanga bhandu bhakotokugubhona nniyango gwa Umwenye gwa kunani kwa Annoongo kongo mwakaachinabhene ngajingila nkati na kwaakanikia bhabhapala kujiingila bhakotokujingilanga monomwe.

¹⁴ Mpakulaganga mwangota Bhannyigana Malagilo ga Amusa na Mafalisayo, akaandendemundu! Ntenda kwatoelanga akaawelwa hilebhe yabhenji, kwa kuchitenda bhammbone ntenda kujopanga kwa kutandamala. Ligongo lyenelyo mpakupatanga ukumu jijiibhi ngolongwa."

¹⁵ "Mpakulaganga mwangota Bhannyigana Malagilo ga Amusa na Mafalisayo, mwangota nga akaandendemundu! Ntenda kujaulanga mu bahali na chilambo chijomo ili kwaapata mundu jumo ahobhalele handa chintendakuhobhalele. Pampakwaapata, muntendanga bhapalikwe mala jibhele kujaula ku mooto gwangahimika machobha goa kupunda mwachinabhene."

¹⁶ "Mpakulaganga akaachilongola bhangelola! Mwangota mulobholanga, 'Amundu handa bhapakulapila ku Nyuumba ja Annoongo, kulapila konokwe nga chilebhe, nambo bhapakulapila kwa chaabu jijing'anyima ja Nyuumba ja Annoongo, kulapila konokwe kwa jono mundu kupakwanamatila.'

¹⁷ Mwangota bhangelola akaajinga! Chiniki chichibhi chammbone muno, chahabu au Nyuumba ja Annoongo lichitenda jene chahabu kondekwa nnongi ja Annoongo?

¹⁸ Kabhele nnyigananga, 'Kila mundu abhapakulapila mu litatali lya kubhokea mbeeko kwa Annoongo, ngabha chilebhe, nambo handa bhapakulapila kwa chadaka jijibhi nnani ja litatali lya kubhokea mbeeko kwa Annoongo, kulapila konokwe kupakwanamatila.'

¹⁹ Mwangota mwangelola! Nga chiniki chichibhi chammbone muno, jenijela chawadi, au mu litatali lya kubhokea mbeeko kwa Annoongo yakubhee bhatendanga jene ngwahupa jikondekwe nnoongi ja Annoongo?

²⁰ Bhabhalapila kwa litatali lya kubhokea mbeeko bhaalapile mu lyene litatali lya kubhokea mbeeko, na kwa choa chela chichibhekitwe nnani jabhe.

²¹ Na bhabhalapila mu litatali lya kubhokea mbeeko kwa Annoongo bhatekulapila kwa lyenelyo litatali lya kubhokea mbeeko kwa Annoongo na kabhele na kwa bhenibhala bhabhatamite bhabhatamanga nkati jabhenji.

²² Na bhena bhabhalapila kunani kwa Annoongo, bhalapila kwa chitengu cha Umwenye gwa Annoongo, na kwa jonojwe jwatama pachitengu chenecho."

²³ "Mpakulaganga, mwanga Bannyigana Malagilo ga Amusa na Mafalisayo! akaandendemundu! Ntochanga bhandu lilubhalo lya komi, hata nnani ja mahamba gakunungila, matoongola na jila, na kongo ntendakulekanga hikubho yammbone ya Malagilo ga Amusa handa henela gagakondekwa kwa Annoongo, kia na kuhengwai. Genago nga gagapaa-likwa kugakamula pangali kulibhalila genigala gangi.

²⁴ Mwangota akaachilongola bhangelola! Ntendakubhoanga mabhembe mu chilebhe ching'wengana, nambo ntendakumilanga ngamia."

²⁵ "Mpakulaganga mwangota Bhannyigana Malagilo ga Amusa na Mafalisayo, mwangota akaandendemundu! Mujelejea panja ja chikombe na bakuuli, nambo nkati mtwelilinge hilebhe muhipatite kwa kwaapokanga bhandu handa chintekupalanga mwakachinabhene.

²⁶ Mwe Mafalisayo mwangelola! Nchijeleeje oti chikombe nkati na panja chipakubhee chwapi hiyoyo!"

²⁷ "Mpakulaganga mwangota Bhannyigana Malagilo ga Amusa na Mafalisayo, mwangota akaandendemundu! Mmilinge handa makabuli gagapakilwe uwakala yakubhee panja gabhonekana gatekuhalala, nambo nkati gatwelile mahupa ga bhabhawilinge na kila namuna ja uwakwa.

²⁸ Hiyoyo mwangota kwa panja mmonekana na kila mundu kubhee mwammbone, nambo nkati mtwelilinge undendemundu na ubohu."

Ayesu alobhola chichipakwaakolelanga bhena bhandu

Aluka 11:47-51

²⁹ “Mpakulaganga Bhanneyigana Malagilo ga Musa na Mafalisayo, mwangota akaanden-demundu! Mchengelanga makabuli ga Akaalondoi na kugatenda makabuli ga bhandu bhammbone gabhonekane maha.

³⁰ Mwalobholanga, handa twenga tukabhee muda gwa akanahota bhitu pabhakibha bhamoni, tukakondikinehopo na bhenaangota mu kwaakomanga Akaalondoi.

³¹ Henela mwachinabhene ntendakondanga kubhee mwangota nga bhana bha bhandu bhabhakaakomanga Akaalondoi.

³² Henela, nkajomolekeange lyeni lyela lihengo lya akanahota bhinu bhabhakalijemekanga!

³³ Mwangota mwakaabhelei bha lijoka, nkombolanga bholi kujibhutuka hukumu ja kujaula kumooto gwangahimika machobha goa?

³⁴ Nenga nannetelanga mwangota akaalondoi na bhandu akaakola malango na bhabhajigana, na bhangi bhabhenji mwangota mpakwaakomanga na kwaabhamba panchalaba, na bhangi bhabhenji mpakwaapotanga mihimbati mu Nyuumba yinunji ya konganilana Bhayahudi na kwaakagulanga kubhoka ku chilambo chimo mpaka chengi.

³⁵ Kulaga kupakuhika kwinu ligongo lya akanahota bhinu bhakaakomanga bhandu bhammbone. Kubhoka pabhakakomekwa Aabeli jwakibha jwanga kulemwa, mpaka kukomekwa kwa Azakalia mwana jwa Abalakia, jonijola munkaaakomanga pa litatali lilichengitwe kwa maganga pakubhokea mbeeko mu litatali lya kubhokea mbeeko kwa Annoongo pakati ja mahali papabhi chwaapi.

³⁶ Ndendakunnobholelanga kweli, chibhelei chenjeni chipakuhukumulikwa ligongo lya genago goal!”

Ayesu bhabhapala bhandu bha chilambo cha ku Yelusalemu

Aluka 13:34, 35

³⁷ “Mwangota bhandu bha ku Yelusalemu! Bhandu bha ku Yelusalemu! Mwakomanga Akaalondoi na kwaapotanga maganga bhenibhala bhabhakatumwanga kwaachinunji! Nga mala jilengwa nyigite kwakondanika bhana bhinu kwaachangu? Handa henela kongo bhabhatendanga kwa yaana yabhe pahi ja mapapatilo gakwe, nambo mwangapala!

³⁸ Nnole nyuumba jinunji jitekulekwa panga chilebhe na ukebha.

³⁹ Ndendakunnobholelanga kweli, ngamona kabhele mpaka pampakulobhola, ‘Bhatekutendelwa gammbone bhenabho bhabhapakuhika kwa lihina lya Hangwana.’ ”

24

Ayesu atendakwalobholela bhandu ngani ja kubomolekwa kwa Nyuumba ja Annoongo

Amaluko 13:1, 2; Aluka 21:5-6

¹ Ayesu akabhoka pa Nyuumba ja Annoongo, na pabhakibha atenda kujaula, bhabhachijigana bhabhe bhakaajendelela, bhakajemekanga kulongela nabho ngani ja Majuumba gangi gagakibha penapo.

² Ayesu akaalobholelanga, “Kombolanga kugalola majuumba ganga goa! Ndendakunnobholelanga kweli, lyakwa hata liganga limo lilipakuigalila pamba panani ja lyengi, kila chilebhe chipakubomolekwa.”

Kulaga na hibhini

Amaluko 13:3-13; Aluka 21:7-19

³ Ayesu pabhakibha atamite palitombi lya Mizeituni, bhabhachijigana bhakaajendelela pantemela, akaakonyanga, “Ntulobholele hikubho heye hipakubhokela lichobha niki?” “Na hilolelo niki hipakulanga kuhika kwinu na kupela kwa chilambo?”

⁴ Ayesu akabhajangulanga, “Mmangange miho nkoto kutembwanga na amundu.

⁵ Kwa kubhee bhajingi bhapakuhika kwa kupetela lihina lyangu, bhabhikulobholanga kila mundu, ‘Nenga nga Akilisito!’ na bhenaangota bhapakwaatembanga bhandu bhajingi.

⁶ Mpakujohanga ngani ja ngondo na nong’ominong’omi ya ngondo, nambo nkotokuchekukanga, kwa kubhee genago gapalikwa kubhokela, nambo kupela hoko kubhii tangu.

⁷ Bhandu bha chilambo chimo chipakupotana na bhandu bha chilambo chengi, ungwana gumo gupakupotana na ungwana gongi. Pambani na penipala papakubhee na njala na milindimilo ja chilambo.

⁸ Genago goha nga handa kujemeka kwa uchuungu gwa kuchijogola mwana.”

⁹ “Ngapena bhapakunkamulanga mwangota na kunpotanga na kunkomanga. Bhandu bha hilambo yoa hipakunchimwanga ligongo lya lihina lyangu.

¹⁰ Muda gonogwe, bhandu bhajingi bhapakulekanga kunhobhalela, na bhenaangota bhapakugalukananga na kuchimwana.

¹¹ Na bhapakupitilanga akaalondoi bhajingi bha unami na bhapakwatembanga bhajingi.

¹² Ligongo lya kujonjokeka kwa ubohu nnyingi, kupalana kwa bhandu bhajingi kupa kupongoka.

¹³ Nambo jwapakupumilia mpaka kupela jonojwe nga apakombolewa.

¹⁴ Kabhele Ngani ja Jammbone ya Umwenye gwa Annoongo jipakutangachika pachilambo choa, ili bhandu bhoa bha chilambo bhajoange, penapo nga konikola kupela pagupakuhika.”

Lichobha lya kulaga muno

Amaluko 13:14-23; Aluka 21:20-24

¹⁵ “Pampakubhonanga, ‘Chilebhe chichileta ubohu’ chichilobholikwe na alondohi Adanieli. Chijemite pa Nyuumbwa ja Annoongo.” Jwaachoma na bhaimanye maana gakwe!

¹⁶ “Ngapena bhandu bhoa bhabhabhile ku chilambo cha ku Yudea na bhabhutukilange muhitombi.

¹⁷ Na jwaabhile nnani ya chipagala cha nyuumbwa jabhe bhakoto kutuluka na kutola chilebhe mu nyuumbwa jabhe.

¹⁸ Na jwabhi kumigonda bhakoto kubhuja kuyeto kutola ngobho jabhe.

¹⁹ Gapakubhee machobha ga kulaga muno kwa akaahikege bhabhabhi na hitumbo na akahikege bhabhabhi na hilemba hijonga machobha genago!

²⁰ Mwajopange Annoongo kutila kwinu kukoto kubhee machobha ga malili au Lichobha lya Kupomolela!

²¹ Kwakubhee machobha genago bhandu bhapakulaganga muno yakubhee kwangapitilanga tangu kujemeka kwa chilambo mpaka leleni, wala ngapitila hopo kabhele.

²² Handa machobha genago ngapongookwa na Annoongo, jwakwa amundu joajola jwaapakuokoka, nambo Annoongo apakugapongoa machobha hago ligongo lya bhenibhala bhabhaagulikwe.”

²³ “Handa amundu apakunnobholelanga, ‘Nnolange Akilisito bhabhi pambani, andaje bhabhi konikola,’ nkoktwahobhalela.

²⁴ Kwa maana bhapakupitilanga akaalondohi bha unami, na bhandu yakubhee bhapakulongelanga unami na kulongela bhenaangota angota Akilisito. Bhapakutendanga yakangachika na hilolelo hikolongwa, ili kwatembenga bhandu, hata kwa bhandu bhabhaagulikwe na Annoongo.

²⁵ Nnyoanikiange, ndekunnobholelanga tangu gangabhokela.”

²⁶ “Handa bhandu bhakannobholelanga, ‘Nnolange, bhabhi kulikonja,’ nkoktwahobhalela. jaulanga konokwe, au, ‘Nnolange, bhatekuchiiya nkati,’ nkoktwahobhalela.

²⁷ Kwa maana handa njai pajimwetuka kubhoka kuulabho hata kuuwelo, nga chipakubhee kuhika kwa Amwana bha Amundu.”

²⁸ “Kwakubhee poapala pachiwile chinyama nga pabhakondanikanga matumbui.”

Kuhika kwa Amwana bha Amundu

Amaluko 13:24-27; Aluka 21:25-28

²⁹ “Pagapakujomoka machobha hago ga kulaga, lihobha lipakulekelwa lubhendu, mwehi ngabho nhana, na ndondwa hipakugwee kubhoka kunani, na kulihunde kupakupukunyika.

³⁰ Kubhoka penapo, hilolelo ya Amwana bha Amundu hipakubhonekana kunani, na penapo hilongelo yoa ya pachilambo hipakuguta, na bhenaangota bhapakwaabhona Amwana bha Amundu abhi kuhika panani ja mahunde ga kunani pamo na machili na ng’anyimo nkolongwa.

³¹ Na bhena apakwaatuma akaatumichi bha kunani kwa Annoongo bhabhabhile na lipenga lilijemba muno, na bhenaangota bhapakwaakondanika bhabhaagulikwe kubhoka kila upande gwa chilambo, kubhoka kujomoka kongo kwa mahunde mpaka kujomoka kongoni.”

Majigano ga nkongo gwa nkojo

Amaluko 13:28-31; Aluka 21:29-33

³² “Muchijigane kulandanikia na nkongo gwa nkojo. Nyaambi yabhe pajjemeka kuhipuka mahamba, mmanyanga kubhee machobha ga hula gabhandikile.

³³ Na mwangota hiyoyo pampakubhona hikubho heye yoa gabhi kutendeka, mmanyange kubhee muda gwa kupitila genago goha gutekubhandikila muno.

³⁴ Ndendakunnobholelanga kweli, chibhelei chenjeni ngapena, tangu ja hikubho yeneyo yoa kupitila.

³⁵ Kulihunde na chilambo hipakupeta, nambo malobhe gangu ngapeta.”

Jwakwa mundu jwalimanya lichobha au muda gwa kubhuja Mwana jwa Mundu

Amaluko 13:32-37; Aluka 17:26-30, 34-36

³⁶ “Nambo, nnani ja lichobha au muda jwakwa mundu jwahimanya hipakubhee lii, ngabha akaatumichi bha kunani kulihunde, wala ngabha mwana, ila Atati jikajabhe nga jwa manyite.

³⁷ Handa chiikabhee machobha ga Anuhu, nga chiipakubhee kuhika kwabhe Amwana bha Amundu.

³⁸ Kwa kubhee machobha gala tangu kwa kupitila hula ngolongwa, bhandu bhabhak-ibha bhatenda kulyee, na kung’wee, bhakilombelanga, na kulombwa, mpaka lichobha lyela Anuhu pabhakajingila nkati ja gonigola ntumbwi nkolongwa gukemitwa chapina,

³⁹ bhandu bhangahimanyanga chichipakupitila hula jikakoma kwa muda ntandamao na bhandu bhakajomokanga ligongo lya machi majingi, hela hela nga chibhapakuhika kwa Mwana jwa Mundu.

⁴⁰ Muda gonogwe bhandu bhabhele bhapakubhee kung’onda, jumo bhapakutolekwa na jongi bhapakulekwa.

⁴¹ Akaahikege bhabhele bhapakukubhee bhayaganga mapemba paliganga, bhamo bhapakutolekwa, na bhamo bhapakulekwa.

⁴² Bahi, mmangange miho, kwa kubhee ngalimanyanga lichobha niki libhapakuhika Hangwana bhinu.

⁴³ Nambo nkombokelange chikubho chenjeni, handa akola nyumba handa bhakali-manyite lichobha abwii chibhapakuhika, akacheite, wala ngaleka nyumba jabhe jibomolekwe.

⁴⁴ Kwa henela, mwangota kabhele mmangange tayali, kwa kubhee Amwana bha Amundu bhapakuhika muda gwangamanyika.”

Antumichi jwammbone na nga jwammbone

Aluka 12:41-48

⁴⁵ Ayesu bhakajendelea kulobhola, “Nga aganiki bhi antumichi jwammbone na bhabhii na malango, yakubhee hangwana bhabhe bhapakwabheka nnani ja bhandu bhabhe, bhaapekee chakulya kwa muda gwabhe?

⁴⁶ Ntumichi jonojwe apakuhangalala muno muda hangwana pabhapakubhuja abhikutenda henela.

⁴⁷ Ndendakunnobholelanga kweli, bhapakwabheka abhanda bhenabho bhailolekee hilebhe yabhe yoa.

⁴⁸ Nambo handa antumichi apakubhee jwangammbone apakuchilobholela mu ntima gwabhe, ‘Hangwana bhangu atenda kabha kubhuja,’

⁴⁹ Ngapena akajemeka kwaapotanga akaabhanda ajabhe, akajemeka kulyee na kung’wee pamo na bhandu bhabhakolelwa,

⁵⁰ akolo bhabhe apakuhika lichobha lyangamanyika ma muda gwangamanyika.

⁵¹ Apakwapota muno na kwabheka chibhoga chimo na bhandu bhangananyikia. Konokwe apakuguta na kuyaga mino.”

25

Kulandanikia kwa akaamwali komi

¹ “Gono muda, Umwenye gwa kunani kwa Annoongo gutenda kulandana henela. Akaamwali komi bhabhatolitinge hibatali yabhenji na kujaula kwaapokela hangwana jwalombela.

² Nhano pakati ja bhenabho komi bhakibhanga akaajinga na nhano bhakibhanga na malango.

³ Bhenibhala akaajinga bhakapetulanga hibatali yabhenji, nambo bhangapetulanga mahuta gangi gakujojokea,

⁴ nambo bhenibhala bhabhabhii na malango bhakapetulanga mahuta mu yupa pamo na hibatali yabhenji.

⁵ Hangwana jwalombela pabhakakabha kuhika bhenibhala akamwali bhoa bhakagochelanga na kugoloka lugono.”

⁶ “Pakati ja kilo mundu jumo akapota nyenye, ‘Hangwana jwalombela bhatenda kuhika! Nnyaulange mkaapokele!’

⁷ Penapo akamwali bhoa bhakajimukanga, bhakahalakia hibatali yabhenji ili hijake maha.

⁸ Bhenibhala akaajinga bhakaalobholelanga bhenibhala bha luunda, ‘Ntupekeange mahuta ginu nkachoko hibatali yitu hitenda kuhimika.’

⁹ Nambo bhenibhala bhabhabhii na malango bhakaajangulanga, 'Ngatutochanga twenga na mwangota, mbaya nnyendange kuliduka nkahemelange ginunji!'

¹⁰ Penapo bhenibhala akamwali akaajinga pabhakajaulanga kuhemela mahuta. Kongo kuyeto hangwana jwalombela bhakahika, na bhenibhala akaamwali bhabhakibha tayali bhakajingilanga pamo na bhena mu nyuumba jijitendeka ulombela, na nniango gukajigalwa."

¹¹ "Pagukapeta muda kachoko bhenibhala akamwali bhajinga bhakahikanga, bhakakema, 'Akolo, akolo, ntujogolele!'"

¹² Nambo jonojwe akaajangulanga, "Ndendakunnobholelanga kweli, 'Nimmanyanga-hopo mwangota.'"

¹³ Ngapena Ayesu akajomolekea kulongela, "Mmangange miho, kwa kubhee ngalimanya lichobha wala muda gupakubhee lii."

Kulandanikia na akaatumichi bhatatu

Aluka 19:11-27

¹⁴ "Kabhele Umwenye gwa Annoongo gupakubhee henela. Mundu jumo jwaapala kujaula ulendo, bhakaakema akaabhandanda bhabhe na kwaabheka bhailolekee hilebhe yabhe.

¹⁵ Bhakaapekea kila mundu kubhokana na uwecho gwabhe, jumo hiyuko nhano ja mbiya, jongi hiyuoko hibhele na jongi chihuko chimo cha mbiya, penapo bhakajaula ulendo.

¹⁶ Mmanda jwaakapata hiyuko nhano bhakajaula na kuhitendela lihengo, akajonjokea hiyuoko yengi ja mbiya nhano.

¹⁷ Hela hela na bhenibhala jwaakapata mihuko hibhele ya mbiya bhakajonjokea yengi hibhele.

¹⁸ Nambo bhenibhala bhabhakapata chihuko chimo bhakajenda, bhakahemba lihembopahi, bhakajihelala mbiha ja hangwana bhabhe."

¹⁹ "Pagakapeta machobha gajingi, bhakahika hangwana na akaabhandanda bhabhe kukonya bhatendite niki mu mbiha jabhe.

²⁰ Jonijola antumichi jwaakaapata chihuko cha mbiya nhano akahika na nnyonjokeo gwa talanta yengi nhano, akaalobholela, 'Hangwana, nkambekea chihuko cha mbiyaa nhano,' 'Nrole mbatite kujonjokea hihuko yengi ya mbiya nhano.'

²¹ Hangwana bhabhe bhakaalobholela, 'Yammbone, mwenga antumichi jwammbone na jwakuaminika.' 'Mmi jwa kuaminika hata kwa hilebhe hichoko hichoko, mbakumkama makolongwa. Nhike nhangalale pamo na hangwana bhinu!'

²² Ngapena jonijola antumichi jwakapata hihuko hibhele ya mbiya hibhele nabhena akahika, akabhoha hihuko yengi hibhele hijonjokike. Akalobhola, 'Hangwana nkambekea hihuko hibhele ya mbiya. Ntole hihuko yinu yengi hibhele niipatite kwa kujonjokea.'

²³ Hangwana bhabhe akajangula, 'Yammbone, abhandanda jwammbone na jwakuaminika!' 'Mmile jwakuaminika mu hikubho hichokochoko, mbakunpekea hikubho hikolongwa. Nhike nhangalale pamo na hangwana bhinu!'

²⁴ Nambo jonijola jwakapata chihuko chimo akahika, akalobhola, 'Hangwana, niimanyi mwenga nga mundu jwakulimba, mwenga ntenda kuhuna penipala pangapanda mbeju, na ntenda kukumba penipala pangamicha mbeju.

²⁵ Ngajogopa, nakahiya mbiha jinu pamandopi. Mpetule jenjeni mihuko jinu ja mbiha.'"

²⁶ "Hangwana bhabhe bhakaalobholela, 'Mwenga nga mmanda abohu na mkata! Muhi-manyi kubhee nenga ndenda kuhuna penipala panangapanda mbeju, na kukumba panga kumicha mbeju.

²⁷ Mkapalikwa kuibheka mbiha jangu kwa bhandu bhabhauchanga na kuhemela bunyu, nanenga chimbakuhika ngajipetula jenijele mihuko jangu na jijijonjokike.

²⁸ Bahi, mumpokange jene mbiha mumpree bhenibhala bhabhabhii na hihuko komi.

²⁹ Kwa maana mundu joajaola jwaatendela lihengo chilebhe chindekwaapekea mbaakwajonjokea na chengi, na jono apakubhee na hijingi. Nambo mundu joajola jwaatendela-hopo lihengo chilebhe chichooko chindekwaapekea, hata chenechela chichoko chibhabhii nacho, na chene chichooko mbaakwapokonyola.

³⁰ Na mmanda ojojo jwangajonjokea mbiha, munlekelange panja palubhendu! Konokwe bhapakuguta na kuyaga mino ligongo lya hibhini muno.'"

Kuhukumula kwa kupela

³¹ "Penapo Amwana bha Amundu pabhapakuhika mu ukolo gwabhe, pamo na akaatumichi bha kunani kwa Annoongo bhoo, penapo bhapakutama nnani ja chitengu chabhe cha ukolo bhene akibha Amwenye.

³² Bhandu bha hilambo yoa bhapakongananga nnongi jabhe, nabhena bhapakwaabheka bhandu kwa malubhalo handa anchungaji chibhaabheka malubhalo ngondolo na mbuhi.

³³ Bhapakwaabheka ngondolo lubhoko lwabhe lwa kunnelo na mbuhi lubhoko lwabhe lwa kunchiji."

³⁴ Ngapena Amwenye bhakaalobholela bhenibhala bhabhabhii lubhoko lwabhe lwa kunnelo, "Nhikange mwangota mubhekitwe ligongo lya Annoongo, Atati bhangu, npoke-lange umwenye gugutekupanganikwa tangu kuhalakiwa kwa chilambo.

³⁵ Kwa kubhee nakibha na njala na mwangota mkambekea chakulya, nakibha na nyoota na mwangota mkambekea machi, nakibha ageni na mwangota mkambokela,

³⁶ nakibha nanga ngobho, na mwangota mkambekeanga ngobho, nakibha ndenda kulwala mkahikanga kunola, nakibha kuchitabho na mwangota mwakahikanga kutyangila."

³⁷ Penapo, bhandu bhabhakamwile bhagapala Annoongo bhapakwajangula, bhabhi kulobhola, "Hangwana, lii tukammona mmi na njala na twenga tukampee chakulya, na mmi na nyota na twenga tukampee machi?

³⁸ Lii tukammona mmi ageni na twenga tukampokela, na mwangawala bhongo, na twenga tukampee ngobho ya kuwala?

³⁹ Lii tukammona mmi mtamwa au ntekutabhwa na twenga tukahikanga kunnola?

⁴⁰ Amwenye bhapakwaajangula, 'Ndendakunnobholelanga kweli, kila chilebhe chintendilinge jumo jwa habha akaalongo bhangu bhangamanyikana, mkandendelanga nenga!'

⁴¹ "Ngapena bhapakwaalobholelanga bhenibhala bhabhabhile lubhoko lwabhe lwa kunnchiji, 'Mmokange nnongi jangu mwangota muntekulaaniwa na Annoongo! Nnyendange kumooto gwangahimika machobha goa gugubhekitwe ligongo lya licheyani bhatumichi bhabhe!

⁴² Kwa kubhee nakibha na njala mwangambee chakulya, nakibha na nyota mwangambee machi ga kung'wee.

⁴³ Nakibha ageni na mwangota mwangambokela, nakibha nangawala ngobho nambo mwangota mwangambee ngobho ya kuwala, nakibha atamwa na kutabhwa muchitabho nambo mwangota mwangahika kunnola.'

⁴⁴ Penapo bhenaangota bhapakujangulanga, 'Hangwana nga lii tukammona mmi na njala au nyoota, mmi ageni au mwangawala ngobho, mmi atamwa na twenga twangan-nyangatila?'

⁴⁵ Na bhena bhapakwaajangulanga, 'Nannobholelanga kweli, kila pamkakananga kwaatendela hikubho heye jumo jwa habha bhangamanyikana, nkakananga kundendela nenga.'"

⁴⁶ "Bahi, habha bhapakupatanga kuhukumu jangapela. Nambo bhenibhala bhabhagakamula bhagapala Annoongo bhenabho bhapakujingila mu umomi gwa machobha goa pangakupela."

26

Chikomiti cha kulolea ndela ja kwaakoma Ayesu

Amaluko 14:1, 2; Aluka 22:1, 2; Ayohana 11:45-53

¹ Ayesu pabhakajomola kulobhola genago goa, akaalobholelanga bhabhachijigana bhabhe,

² "Mmanyanga kubhee pagapakupeta machobha gabhele kupakubhee na lichobha likolongwa lya Pasaka, na Amwana bha Amundu bhapakugalukwa ili bhabhambwe panchalaba."

³ Gono muda Akaakung'i akolo na akanachilongola bha Bhayahudi bhakakongana pamo paluwani lwa nyuumba ja Akayafa jwaakibha Akung'i Amwenye.

⁴ Bhakakongolelana ndela ja kunkamula Ayesu kwa kuhiiya ili bhaakome.

⁵ Nambo bhakalobholanga, "Chikubho chenecho chikotokubhee mu lichobha likolongwa lya Pasaka, ili gukotokupetela ukomo nkati ja bhandu."

Ayesu bhakuchulilwa mahuta kono ku Betania

Amaluko 14:3-9; Ayohana 12:1-8

⁶ Ayesu pabhakibha ku Betania, kaja kwa Asimoni, jwakibha na matana,

⁷ mwikege jumo jwakibha na chupa chichitwelile mahuta ga kunungila ga bei ngolongwa, bhakahika penipala Ayesu pabhatenda kulyee chakulya, bhakaakuchulila gena mahuta mmutwe.

⁸ Bhabhachijigana bhabhe pabhakabhona genago bhakachimwanga, bhakalobholanga, "Janiki achala jenjeni?"

⁹ Kwa kubhee mahuta gangani nga ga bei ngolongwa, hikakombolike kuhuchwa na yene mbiha bhakaapekiinge akaahocho.”

¹⁰ Ayesu bhakagamanya chibhaganikia, bhakaalobholela, “Mboni ntendakunhabhuanga mwikege hojo? Jonojwe atekutenda chikubho chammhone.”

¹¹ Akaahocho mmi nabho machobha goa, nambo nenga mbakubheehopo pamo na mwangota machobha goa.

¹² Hojo mwikege bhatekunguchulila mahuta gakunungila ili kumeka tayali kwa kunjika.

¹³ Nannobholelanga kweli, poa pala pachilambo pabhapakutangachiwanga jenje Ngani Jammhone, chikubho chaachitendite hojo mwikege chipakulongoleka kwa kwaakombokela bhenabho.”

Ayuda atendakoonda kwaagaluka Ayesu

Amaluko 14:10-11; Aluka 22:3-6

¹⁴ Ngapena jumo jwa bhenibhala bhabhachijigana komi na bhabhele, bhakemitwa Ayuda Isikaliote, bhakajaula kwa Akung'i Akolo,

¹⁵ bhakaakonyanga, “Mpakumbee chilebhe niki handa mbakwaagaluka Ayesu kwaachinu?” Bhakaalanga hipande makomi gatatu ga maganga gagakemitwa mbiha.

¹⁶ Kubhoka penapo Ayuda bhakibha bhalolea ndela ja kwaagaluka Ayesu.

Ayesu bhalyee chakulya cha Pasaka pamo na bhabhachijigana bhabhe

Amaluko 14:12-21; Aluka 22:7-13, 21-23; Ayohana 13:21-30

¹⁷ Lichobha lya kujemeka tangu ja lichobha likolongwa lya mikate jangalekelwa chilongo, bhabhachijigana bhakaajendela Ayesu bhakaakonya, “Mpala tumpanganikie koji chakulya cha lichobha likolongwa lya Pasaka?”

¹⁸ Ayesu akaajangulanga, “Nnyaulange kunnyini kwa analome teno, mkaalobholele, ‘Bhannyigana bhalobhola, muda gwangu guikite, kwaachinu mbakulyee chakulya cha Pasaka pamo na bhabhachijigana bhang’u.”

¹⁹ Bhabhachijigana bhakatendanga handa Ayesu chibhakaalagia, bhakaapanganikia chakulya cha Pasaka.

²⁰ Pajikahika kimuho Ayesu na bhabhachijigana bhabhe komi na bhabhele bhakatama kulyee chakulya.

²¹ Pabhatendita kulyee, Ayesu bhakalobhola, “Ndendakunnobholelanga kweli, jumo gwinu bhapakung’aluka.”

²² Bhabhachijigana ikaabhinanga muno mu mitima jabhenji, kila jumo akajemeka kwaakonya, “Hangwana! Bholi, nga nenga?”

²³ Ayesu akajangula, “Jwapakutobhela mkate pamo na nenga mu libakuli nga jwapakung’aluka.

²⁴ Amwana bha Amundu apakujomoka handa chigalobhola Majandiko ga Annoongo, nambo apakulaga mundu jola jwapakwaagaluka Amwana bha Amundu! Jikibha mbaya kwa mundu jonojwe handa akibha angabhelekwa.”

²⁵ Ayuda, joni jola jwaagaluka, akaakonya, “Bhannyigana, bholi, nga nenga?”

Ayesu bhakajangula, “Handa chinongile,”

Chakulya cha Hangwana

Amaluko 14:22-26; Aluka 22:14-20; 1 Bhakolinto 11:23-25

²⁶ Pabhatendita kulyee, Ayesu akatola nkate, akaachukulu Annoongo, akagumetula, akaapekea bhabhachijigana bhabhe abhikulobholo, “Ntolange nlyangange, gongo nga mmele gwangu.”

²⁷ Ngapena bhakatola chikombe cha divai, bhakachukulu Annoongo, bhakaapekea bhabhachijigana babhe bhabhikulobhola, “Nng’wangange mwabhoa mu chikombe chenjeni.

²⁸ Kwa maana jenje nga mihai jangu jijilanga lilagano, jijijitika ligongo lya bhandu bhajingi ili kwaabhokea mabohu.

²⁹ Nambo ndendakunnobholela, ngang’wee kabhele divai mpaka lichobha lyela chimbakung’wee divai jiyono pamo na mwangota mu Umwenye gwa Atati bhang’u.”

³⁰ Na bhenaangota pabhakajomola kujemba, bhakajenda ku Litombi lya Mizeituni.

Ayesu bhatenda kulondola kubhee Apetulo bhapakwaakana

Amaluko 14:27-31; Aluka 22:31-34; Ayohana 13:36-38

³¹ Penapo Ayesu bhakaalobholela, “Kilo cha leleni, mwangota mwabhoa mpakubhutuka na kuneka nenga, kwa kubhee jijaandikwe mu Majandiko ga Annoongo, ‘Mbakwapota anchugaji, na lilubhalo lya ngondolo lipakupwilingana.’

³² Nambo chimbakuyoka, mbakunlongolelanga chilambo cha ku Galilaya.”

³³ Apetulo akaajangula Ayesu, "Hata handa bhoa bhapakubhee na lipamba na mwenga na kunneka, nenga nganneka ng'o."

³⁴ Ayesu bhakaalobholela Apetulo, "Kweli ndendakunnobholela, kilo chenjeni tangu likambaliko lyangajemba, mpakungana patatu."

³⁵ Nambo Apetulo akajangula, "Hata handa hipalikwa kujomoka pamo na mwenga, ngankana ng'o." Na bhenibhala bhabhachijigana bhangi bhoa bhakalobholanga hela hela.

Ayesu aajopa Annoongo ku buchitani ja Getisemane

Amaluko 14:32-42; Aluka 22:39-46

³⁶ Ngapena Ayesu akajenda pamo na bhabhachijigana bhabhe mahali pakemitwa ku Getisemane, na jono akaalobholelanga, "Ntamange pambani na nenga nyaule penipala kwaajopa Annoongo."

³⁷ Bhakaatola Apetulo pamo na bhenibhala bhana bhabhele bha Azebedayo, na bhena bhakajemeka kuhechuka na kuumalika.

³⁸ Penapo akaalobholelanga, "Ndenda kuhechuka muno muntima gwangu hata kub-handikila na kiujomoka. Mtamange pambani ntamange miho pamo na nenga."

³⁹ Bahi, akajaula nnoongi kachoko, akagwee manguku, akajopa, "Atati bhangu, handa ikombolike chikombe heche cha kulaga chimbete, nambo hikoto kubhee handa chimbala nenga, la chimpala mwenga."

⁴⁰ Ngapena Ayesu akabhujia kwa bhabhachijigana bhabhe na kwaakolela bhatekugoloka. Akaakonya Apetulo, "Bholi, mwangota mwangacheanga pamo na nenga hata kwa lichaa limo?"

⁴¹ Ncheange na mwajope Annoongo nkotokujingilanga mmalengelo. Mboomo jitenda kupala nambo mmele gwangamachili."

⁴² Akajaula kabhele pabhele kwaajopa Annoongo, "Atati handa ikombolike chikombe heche cha kulaga chimbete ngoto kung'wela, bahi, upaliho gwinu gukweele."

⁴³ Pabhakabhujia kabhele, akaakolelanga bhagolwikinge, kwa kubhee miho gabhenji gakibha na lugono.

⁴⁴ Ayesu akaalekanga akajaula kabhele patatu na kujopa abhi kulobhola malobhe galagala.

⁴⁵ Ngapena bhakabhujia kwa bhabhachijigana bhabhe na kwaalobholela, "Bholi, tangu mgolwikinge na kupomolela? Nnolange muuda guhikite gwa Amwana bha Amundu bhapalikwa kulekelwa mmabhoko ga bhandu bhabhachii na mabohu.

⁴⁶ Nnyimukange, tujaulange. Atenda kuhika jonijola jwapakung'aluka!"

Kugalukwa na kamulikwa kwa Ayesu

Amaluko 14:43-50; Aluka 22:47-53; Ayohana 18:3-12

⁴⁷ Bahi, Ayesu pabhakibha tangu bhatenda kulongela nabho, popopo akahika Ayuda, jumo jwa bhabhachijigana komi na bhabhele. Pamo na bhenabho bhakahikanga bhandu bhajingi bhabhachii na mapanga na himbonga bhabhatumwanga na Akaakung'i Akolo na akanahota.

⁴⁸ Na jonojwe jwakapala kwaagaluka Ayesu, akibha atekwapekea hilolelo abhi kulobhola, "Amundu jonijola junapakunnamatila na kunchalimaa nga jonojwe munkamulange."

⁴⁹ Bahi, Ayuda akajendelela Ayesu na kwalobholela, "Kunchelile bhannyigana!" Ngapena akaanyambatila.

⁵⁰ Ayesu akaalobholela, "Aganja, ntende chintekuhika kutenda."

Penapo bhenibhala bhandu bhakahikanga, bhakaakamula Ayesu, bhakaalekelela mmachili.

⁵¹ "Jumo jwa jonijola jwakibha na Ayesu akagunyulula lubhoko lwabhe, akaguolomola upanga gwabhe, akaapota antumichi jwa Akaakung'i Akolo, akaaheketa lichikilo.

⁵² Ngapena Ayesu akaalobholela, mmujie upanga gwinu mu lihako lyakwe, maana joajola jwakoma kwa upanga, apakujomoka kwa upanga.

⁵³ Bholi, nng'anikia ngakombola kwaajopa Atati bhangu anyangatile nabhena akanetela manyemba kupunda komi na bhabhele ga akaatumichi bhabhe bha kunani kulihunde?"

⁵⁴ Nambo bholi, Majandiko ga Annoongo gapakweela bholi galalobhola, henela nga chiipalikwa kubhee?"

⁵⁵ Muda gogogo Ayesu bhakagulobholela nkutuli gwa bhandu bhabhakahika kwaalekela mmachili, "Bholi, ntekuhikanga na mapanga na himbonga kuhika kungamula handa henela bhakupokanga bhandu? Machobha goa nakibha mu Nyumba ja Annoongo kwaajigananga bhandu, mboni mwangakamulanga?"

⁵⁶ Nambo haga gangani goa gatekubhee, ili Majandiko ga akaalondoi bha Annoongo gakweele." Ngapena bhabhachijigana bhoa bhakapwilinganika.

Ayesu bhatenda kwapeleka pa chebule

Amaluko 14:53-65; Aluka 22:54-55, 63-71; Ayohana 18:13-14, 19-24

⁵⁷ Bhandu bhenibhala bhabhakaakamula Ayesu bhakaapeleka ku nyumba ja Akayafa, Akung'i akolo, pabhakakongananga na bhabhajigana Malagilo ga Amusa na akanahota.

⁵⁸ Nambo Apetulo bhakaakagula kwa kutali mpaka kulugwani lwa Akaakung'i Amwenye. Bhakajingila nkati bhakatama pamo na akaalendei ili bhapate kulola chi-ipakubhee.

⁵⁹ Bahi, Akaakung'i akolo na chebule joa bhakalolea malobhe ga unami nnani ja Ayesu ili bhapatange kwaakoma,

⁶⁰ nambo bhangapatanga malobhe goagala ga kwakumulila Ayesu, hata handa bhandu bhajingi bhakahikanga bhabhakalobhola malobhe gajingi ga unami. Pakujomoleka kuhika bhakahikanga bhandu bhabhele,

⁶¹ na akalobhola, "Habha amundu bhakalobhola, 'Ngombola kujibomola Nyuumba ja Annoongona na kujichenga kabhele kwa machobha gatatu.'"

⁶² Akung'i akolo akajema, akaakonya Ayesu, "Bholi, ngajangula lilobhe? Nga malobhe ga namuna niki habha bhandu bhagaleta nnani jinu?"

⁶³ Nambo Ayesu akatama jii. Akaakung'i akolo akaalobholela, "Ndenda kunnapila kwa Annoongo bhabhii bhamomi, ntulobholele handa mwenga nga Akilisito Amwana bha Annoongo!"

⁶⁴ Ayesu akaajangula, "Mwenga nnobhwile! Nambo ndendakunnobholelana, kuje-meka nangocheni mpakunnolanga Mwana jwa Amundu atamite upande gwa kunnelo jwa jonijola Hangwana jwabhi na machili, abhikuhika nnani ja mahunde ga kunani kwa Annoongo."

⁶⁵ Penapo Akung'i akolo akapapula ngobho yabhe, akalobhola, "Atendakwatukana Annoongo! Tupalahopo kabhele bhandu bha kongolela, nangocheni ntekunyoanikianga maligo gabhe.

⁶⁶ Mwangota mmonanga bholi?" Bhenaangota bhakaajangulanga, "Jwatekulemwa apalikwa kujomoka."

⁶⁷ Ngapena bhakaahunila mata kumiho, bhakaapota mmajegwa. Bhangi kongo bhabhikwapota mmajegwa,

⁶⁸ na kulobhola, "Ntulondolele, mwee Akilisito, nga aganiki bhabhampotite!"

Apetulo atenda kwaakana Ayesu

Amaluko 14:66-72; Aluka 22:56-62; Ayohana 18:15-18, 25-27

⁶⁹ Apetulo akibha atamite panja palugwani. Bahi, antumichi jumo Ahikege bhakajendelela, bhakalobhola, "Mwenga nkibha pamo na Ayesu bha ku Galilaya."

⁷⁰ Nambo Apetulo akakana nnongi ja bhola bhabhi kulobhola, "Ngachimanya chinlongela."

⁷¹ Akabhoka penipala akajaula panniano, antumichi bhangi ahikege akaalola, bhakaalobholelana bhandu bhabhakibha penapo, "Habha amundu bhakibha pamo na Ayesu Nnazaleti."

⁷² Apetulo akakana kabhele kwa kulapila abhi kulobhola, "Ngaamanya abha amundu."

⁷³ Pagukapeta muuda kachoko, bhandu bhenibhala bhabhakibhanga bhajemite penipala bhakaajabhulila Apetulo bhakaalobholela, "Kweli mwenga nga jumo jwabhe, kwa kubhee namuna chinnongela ntenda kulandana na bhenaangota."

⁷⁴ Ngapena Apetulo bhakajemeka kuchilaani na kulapila abhi kulobhola, "Ngaamanya bhena amundu!" Popopo likambaliko likajemba.

⁷⁵ Apetulo akakombokela malobhe gabhakalobholelwa na Ayesu, "Tangu likambaliko kujemba, mpakungana patatu." Bahi, akabhoka panja, akaguta kwa hibhini.

27

Ayesu atenda kupeleka kwa Apilato

Amaluko 15:1; Aluka 23:1, 2; Ayohana 18:28-32

¹ Kundabhi tuputupu, Amwenye bha akaakug'i bhola na akachilongola bha Bhayahudi bhakatandanga chikomiti pamo nnani ja Ayesu ili bhapatange kwaakoma.

² Bhakaatabha nyololo, bhakaapetula, bhakaapeleka kwa Apilato, jwakibha akolo jwa ku Loma.

Kuchikoma kwa Ayuda bhene

Hikubho 1:18, 19

³ Penapo Ayuda, bhenibhala bhabhakaagaluka Ayesu, pabhakalola kubhee Ayesu bhatekukukumulwa komekwa, bhakachikokolekela na kubhujia yenyela hipande

makomi gatatu ya mbiha bhabhakapekewa na akaakung'i akolo na akachilongola bha Bhayahudi.

⁴ Akaalobholelanga, "Ndekulemwa kwa kwaabhoa amundu bhangakulemwa bhakomekwe."

Nambo bhenaangota bhakalobholanga, "Twenga tutende niki? Genago ginu mwachin-abhene."

⁵ Na jonojwe akahijeha yenyela mbiha mu Nyuumba ja Annoongo, bhakabhoka panja, bhakajaula kuchijomola kwa kuchitabhila nng'oji muntandala gwabhe.

⁶ Akaakung'i akolo akatola ulohi gola, bhakalobhola, "Ngapalikwa kubheka heye mbiha mu nhuko gwa Nyuumba ja Annoongo kwa kubhee mbiha hii bhokile kwa koma mundu."

⁷ Bahi, bhakatendanga chikomiti, bhakakondanga bhakahemele nng'onda gwa jwaalak-
iha undopi, ili pabhee mahali pa kwaachikila akaageni.

⁸ Nga maana mpaka leleni nng'onda gonogwe gukemwa nng'onda gwa mihai.

⁹ Penapo likakweela lyenilyela lilobhe lya alondoi Ayelemia kubhee, "Bhakapetulanga hipande makomi gatatu ga mbiha, Bhandu bha ku Isilaeli bhakakondekananga kulepa ligongo lya mundu hojwe,

¹⁰ bhakahemelela nng'onda gwa amundu bhabhabhomba hibhega, handa henela Hang-wana bhabhakaalangia."

Apilato bhatenda kwaakonya Ayesu

Amaluko 15:2-5; Aluka 23:3-5; Ayohana 18:33-38

¹¹ Muuda Ayesu pabhakannyemekeka nnongi ja chilongola bha ku Lumi, atabhala bhakaakonya, "Mwenga nga Amwenye bha Bhayahudi?"

Ayesu bhakajangula, "Mwenga ntekulobhola."

¹² Nambo akaakung'i na akachilongola bha Bhayahudi pabhakibha bhatenda kunchi-taki, jwangajangula lilobhe.

¹³ Henela Apilato bhakaakonya, "Bholi, mwangajoha haga machitaka goa gabhapianga nnani jinu?"

¹⁴ Nambo Ayesu jwangajangula hata lilobhe limo, hata akolo bha ku Lumi akakangacha muno.

Ayesu atenda kuhukumulikwa komekwa

Amaluko 15:6-15; Aluka 23:13-25; Ayohana 18:39-19:16

¹⁵ Bahi, jikibha jiyobhalilike mu lichobha likolongwa lya Pasaka, achilongola bha ku Lumi kwaagopolela Bhayahudi atabhwa jumo bhandu bhabhaapala.

¹⁶ Gono muda pakibha na atabhwa jumo jwaakamanyika muno kwa ubohu gubhaka-tenda, lihina lyabhe Abalaba.

¹⁷ Henela nkutuli gwa bhandu pabhakakongana Apilato bhakaakonyanga, "Mpala nin-nyogolele aganiki, Abalaba au Ayesu bhakemitwa Akilisito?"

¹⁸ Apilato akalobhola henela kwa kubhee akahimanya kubhee bhakaaleta kwaachabhe ligongo lya bwu.

¹⁹ Apilato pabhakibha atamite pachitebhu cha kuhukumula, hanu bhabhe bhakaapelekela ngani, "Nkotokuntenda lyoalyela lyangammbone mundu hojo jwammbone, kwa kubhee leleni ndekulaga muno kuagamila ligongo lyabhe."

²⁰ Nambo Akaakung'i akolo na akanachilongola bha Bhayahudi bhakaapembelea bhandu bhajingi bhaajope bhajogolekwe Abalaba na Ayesu bhakomekwe.

²¹ Apilato bhakapunda kwaakonyanga, "Nga aganiki nkati ja abha bhabhele mpalanga ninnyogolele?"

Bhakaajangulanga, "Abalaba!"

²² Nambo Apilato bhakaakonyanga kabhele, "Nangocheni naatendele chiniki Ayesu bhakemitwa Akilisito?"

Bhakajangulanga bhoa, "Abhambikwe panchalaba!"

²³ Apilato akakonya kwa mala jengi, "Kwaniki? Bhatendite ubohu niki?"

Bhenaangota bhakapunda kukwela lilobhe, "Mwaabhambe panchalaba!"

²⁴ Bahi, Apilato pabhakahimanya kubhee ngakombola kutenda choa chela, na ukomu gukibha gutenda kujemeka, akatola machi, akakua mabhoko nnoongi ja gonigola nkuli gwa bhandu, abhikulobhola, "Chikubho heche muchipetulange mwakaachinabhene."

²⁵ Bhandu bhoa bhakalobholanga, "Kulemwa konokwe kwa kwaakoma Ayesu kubhee kwitu na bhana bhitu!"

²⁶ Ngapena Apilato bhakaajogolela Abalaba kubhoka kuchitabho, na kwaalagia manyemba bhakwe bhaapote Ayesu mihimbati, ngapena akaabhoa na kubhambikwa panchalaba.

Manyemba bhaatendela mbeenje Ayesu

Amaluko 15:16-20; Ayohana 19:2, 3

²⁷ Ngapena manyemba bha Apilato, bhakaapeleka Ayesu nkati ja luwani lwa nyuumba ja chilongola jwa ku Loma, lilubhalo lyoa lya manyemba bhakakongana kwaatindila bhenabho.

²⁸ Bhakaahula chiwalo chabhe, bhakaaweke chiwalo chikele.

²⁹ Ngapena bhakatotanga hiingwa ya miibha, bhakaaweke mmutwe, bhakaabhekela kabhele nhimbati mu lubhoko lwabhe lwa kunnelo. Bhakatindibhala majugwa nnoongi jabhe, bhakaatendela mbeenje bhabhi kulobholanga, “Kunchelile Amwenye bha Bhayahudi!”

³⁰ Bhakaahunila mata, bhakatola gonigola nhimbati, bhakaapota mmutwe.

³¹ Pabhakajomolanga kwaatendelanga mbeenje, bhakaahula jenijela ngobho, bhakaaweke kabhele ngobho yabhenji, kubhoka penapo bhakampeleka kwaabhamba panchalaba.

Ayesu atenda kubhambwa panchalaba

Amaluko 15:21-32; Aluka 23:26-43; Ayohana 19:17-27

³² Pabhakibhanga nndela bhabhikujaulanga, bhakakongana na mundu jumo lihina lyakwe Asimoni, mundu jwa ku Kilene, na bhenaangota bhakaakulumikia kugupetule nchalaba gwa Ayesu.

³³ Na pabhakahikanga mahali pakemitwa Goligota, maana gakwe, “Lingambwa lya mutwe,”

³⁴ bhakaapekea Ayesu divai jibhakaangalana na chilebhe chakubhabha ili bhang’wee, nambo Ayesu pabhakapaa akakana kung’wee.

³⁵ Pabhakajomola kwaabhamba ngobho jabhe bhakagabhananga kwa gudugudu, ili likweele lyela lilobhe lilikalobholekwa na alondoi, “Bhakagabhananga ngobho yangu kwa kuhitendelanga gudugudu.”

³⁶ Kubhoka penapo, bhakatamanga, kwaalendelela.

³⁷ Panani ja mutwe gwabhe panchalaba pakajandikwa malobhe gangani, “Habha nga Ayesu, Amwenye bha Bhayahudi.”

³⁸ Bhakaabhamba pamichalaba pamo na akaabwii bhabhele, jumo upande gwa kunchiji na jongi upande gwa kunnelo.

³⁹ Bhandu bhabhakibha bhatenda kupeta penapo bhakaatukana Ayesu kongo bhabhi kupukunya mitwe jabhenji na kulobhola,

⁴⁰ “Mwenga! Ngati nkachitenda mpakujibomolana Nyuumba ja Annoongo na kuchenga kwa machobha gatatu? Nangocheni nchiokoe mwabhene. Handa mwenga nga Mwana jwa Amundu, bahi, ntuluke panchalaba!”

⁴¹ Yelayela, Akolo bha akaakung’i pamo na bhabhachijigana Malagilo ga Amusa na akanachilongola bha Bhayahudi bhakaatendela mbeenje bhabhi kulobhola,

⁴² “Bhakaakoa bhangi, nambo ngakombola kuchiokoa mwene! Bhena ngati Amwenye bha bhandu bha ku Isilaeli! Bahi, nangocheni bhatuluke panchalaba, na twenga twahob-halele.

⁴³ Akaahobhalela Annoongo na kulobhola bhena nga Amwana bha Annoongo, bahi, Annoongo na bhakaakoe handa bhatenda kwaapala.”

⁴⁴ Helahela na akabwii bhabhele bhabhakabhambwa pamo na bhena bhakaatukana

Ayesu atendakujomoka panchalaba

Amaluko 15:33-41; Aluka 23:44-49; Ayohana 19:28-30

⁴⁵ jikibha saa sita muhi mpaka saa tisa lubhendu lukawekela chilambo choa.

⁴⁶ Pajikahika handa saa tisa Ayesu akakwea lilobhe akaguta, “Eloi, Eloi, lama Sabakitanani?” Maana gakwe, “Annoongo bhangu, Annoongo bhangu, mboni ntekuneka?”

⁴⁷ Nambo bhenibhala bhandu bhabhakajemanga penipala pabhakajohanga henela bhakalobhola, “Atendakwakema Aelia.”

⁴⁸ Penapo jumo jwabhenji akabhutuka, akatola lidodoki lijomo, akatobhela mu siki, akatabhalila nnani ja nnai, akaapekea ang’wee.

⁴⁹ Bhenibhala bhangi bhakalobholanga, “Tuleke twaalole handa Aelia apakuhika kwaaakoa.”

⁵⁰ Bahi, Ayesu akaguta kabhele kwa lilobhe likolongwa, akajomoka.

⁵¹ Penapo lipanjia lya Nyuumba ja Annoongo likapapuka hipande hibhele, kubhoka panani mpaka pahi, chilambo chikalendemela,

⁵² makabuli gakajogoka na bhandu bhajingi bha Annoongo bhabhakajomokanga bhakayokanga,

⁵³ na bhenaangota bhakabhokanga mumakabuli, na baada ja Ayesu kuyoka bhakajingilanga, mu hilambo ya chwapi na kubhonekana kwa bhandu bhajingi.

⁵⁴ Bahi, jonijola linyemba akolo na bhenibhala bhabhakibha pamo na bhena kwaalendelea Ayesu bhakabhona kulendemela na yeniyela hikubho hiikabhokela, bhakajogopanga muno, bhakalobholanga, “Kweli hojo mundu akibha Amwana bha Annoongo.”

⁵⁵ Penapo pakibha na akaahikege bhabhalolita kwa kutali. Bhenabho bhakibha bhatekwaakagula Ayesu kubhoka ku Galilaya, na kwaatumikila.

⁵⁶ Nkati jabhenji bhakibha Amalia bha ku Magidala, Amalia anyongo bhabhenji Ayakobo na Ayusufu, pamo na anyongo bhabhenji bhana bha Azebedayo.

Kuchikwa kwa Ayesu

Amaluko 15:42-47; Aluka 23:50-56; Ayohana 19:38-42

⁵⁷ Pajikahika kimuhu, akahika mundu jumo akola hilebhe kubhoka ku Alimataya, lihina lyabhe Ayusufu. Jonojwe kabhele akibha bhabhachijigana jwa Ayesu.

⁵⁸ Akaajendelela Apilato, akaajopa mmele gwa Ayesu. Ngapena Apilato akahukumula aapekee.

⁵⁹ Ayusufu akagutola gonigola mmele gwa Ayesu, akaguhiligila chanda ja chitambala chihuu muno,

⁶⁰ akagubheka nkati ja likabuli lyakwe liyono libhakalibhacha pamwala. Ngapena bhakalimbikia liganga likolongwa nnoongi ja nniango gwa likabuli, akajaula.

⁶¹ Amalia bha ku Magidala na jonijola Amalia jongi bhakibhanga mahali penapo, bhakibhanga bhatamitinge bhabhikulilolanga likabuli.

Likabuli lya Ayesu litenda kulendelelwa

⁶² Malabhi jakwe, yakubhee likibha Lichobha lya Kupomolela, akaakolo bha akaakung'i na Mafalisayo bhakaajendelela Apilato,

⁶³ na kulobholanga, “Hangwana, tutekombokela kubhee jonijola anami tangu ja kujomoka akalobhola, ‘Mu machobha gatatu gagahika mbakuyoka.’

⁶⁴ Kwa henela nnagikie likabuli lilendelelwe mpaka lichobha lya tatu ili bhabhachijigana bhabhe bhakoto kujibha mmele gwabhe na kwaalobholela bhandu kubhee bhayokite. Unami gongo gwa kupela gupakubhee gubohu muno kupunda gonigola gwa kujemeka.”

⁶⁵ Apilato akaalobholelanga, “Aya, mmilinge na manyemba gakulendelela, nnyendange mkalendelele handa chinkombolanga.”

⁶⁶ Bahi, bhakajaulanga na akaalendei bha likabuli, ili kulendelela, bhakabhoka chilangia nnani ja liganga lyela na kuleka penapo akaalendei bhabhi kulendelelanga.

28

Kuyoka kwa Ayesu

Amaluko 16:1-10; Aluka 24:1-12; Ayohana 20:1-10

¹ Kubhoka ku Lichobha lya Kupomolela, kubhandikila na kuchee lichobha lyela lya Jumapili, Amalia bha ku Magidala na jonijola Amalia jongi bhakajendanga kulolanga likabuli lyela.

² Popopo kukabhokela na kulendemela kukuolongwa kwa chilambo, kwa kubhee antumichi jwa kunani kwa Annoongo akatuluka kubhoka kunani akajaula konikola kulikabuli akalipilingita na kulibheka nnyenje linganga lyela na akalitamila.

³ Akabhonekana handa njahi na ngobho yabhe hikibha hihuhu kuu.

⁴ Bhenibhala bhakulendelela likabuli bhakandendemelanga kwa bhoga nkolongwa, hata bhakibhanga handa bhatekujomokanga.

⁵ Nambo jonijola antumichi jwa kunani kwa Annoongo akaalobholelanga bhenibhala akaahikege, “Mwangota nkotokujogopanga! Niimanyi kubhee ntendakwaloleanga Ayesu jwakaabhambwa panchalaba.

⁶ Jwakwa pambani, maana ayokite handa chibhakalobhola. Nhikange nkalolange mahali pabhakaagoneka.

⁷ Nyaulange chindema nkaalobholelange bhabhachijigana bhabhe kubhee ayokite, na ngocheni atendakwalongoleanga kujaula konikola ku Galilaya, konokwe nga kumpakumonanga. Ayaga, nenga ndekunnobholelanga.”

⁸ Henela bhenibhala akaahikege bhakabhokanga chindema penipala palikabuli, bhabhi bhatwelilinge na bhoga nkolongwa kongo bhabhikuhangalala, bhakajaulanga lubhelo kwalobholelanga bhabhachijigana bhabhe ngani hejo.

⁹ Popopo, Ayesu akakongana nabho, akalobhola, “Kuhengwa kubhee na mwenga.” Bhenibhala akaahikege bhakaajendelela, bhakatindibhala majugwa nnongi jabhe, bhakagamulanga makongo gabhe.

¹⁰ Ngapena Ayesu akaalobholelanga, “Nkotokujogopanga! Nyaulange nkaalobholelange akaanung’una bhangu bhajaulange ku Galilaya, na konokwe bhapakumona.”

Akaalendei bhalobhola gagabhokile

¹¹ Bhenibhala akaahikege pabhakibhanga nndela bhabhikujaulanga, akaalendei bhangi bha lyenilyee likabuli bhakajaulanga kunnyini na kwalobholelanga akaakolo bha akaakung’i ngani ja hikubho yoha hiitekubhokela.

¹² Ngapena akaakolo bha akaakung’i pamo na akanachilongola bha Bhayahudi bhakakongananga, na pabhakakondananga bhakaapekeanga bhenibhala akaaledei mbiha hijingi

¹³ bhabhikulobholanga, “Mwangota nkalobholange henela, bhabhachijigana bhabhe bhakahikanga kilo na kugujibha mmele gwabhe twenga tubhi tugolwikinge.

¹⁴ Na handa achilongola bha chilambo handaajimanyite ngani heje, twenga mmoange lipamba twenga tupakunnongelesa na mwangota ngapatanga kulemwa koha kola.”

¹⁵ Bhenibhala akaalendei bhakaipetulanga yeniyee mbiya, bhakatendanga handa chibhakajiganwanga. Ngani heyo hitekujeenela pakati ja Bhayahudi mpaka leneni.

Ayesu aabhokelanga bhabhachijigana bhabhe

Amaluko 16:14-18; Aluka 24:36-49; Ayohana 20:19-23; Hikubho 1:6-8

¹⁶ Ngapena bhenibhala bhabhachijigana bhabhe komi na bhamo bhakajaulanga kuchilambo cha Galilaya pa lyenilyee litombi lilyakaalagikia Ayesu.

¹⁷ Pabhakammonanga, bhakaakotimila, nambo bhangi bhakibhanga na lipamba.

¹⁸ Ayesu akahika kubhandikila na bhenaangota, akaalobholelanga, “Mbatite uwecho gwa kutabhala kunani kwa Annoongo na pachilambo.

¹⁹ Nyaulange, nkaatendange bhandu bha hilambo yoha bhabhee bhabhachijigana bhangu, mmikwabatichanga kwa lihina lya Atati, na lya Amwana, na lya Mboomo ja Annoongo.

²⁰ Mwangota mwajiganange kukamula Malagilo goha gandekumpekeanga. Na nenga mi pamo na mwangota machobha goha, mpaka pachipakujomoka chilambo.”